

**MESYUARAT PERTAMA, PENGGAL KEDUA
PARLIMEN KEEMPAT BELAS**

2019

HARI ISNIN : 18 MAC 2019

SOALAN NO. : 01

**DEWAN RAKYAT MALAYSIA
PERTANYAAN JAWAB LISAN**

PERTANYAAN : JAWAB LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 18 MAC 2019 (ISNIN)

SOALAN :

Tuan Ahmad Fahmi bin Mohamed Fadzil [Lembah Pantai] minta MENTERI AIR, TANAH DAN SUMBER ASLI menyatakan jumlah populasi Harimau Malaya di seluruh Malaysia berdasarkan dapatan terkini Survei Harimau Kebangsaan Pertama, dan langkah-langkah yang akan dilaksana untuk mengekal dan meningkatkan populasi Harimau Malaya.

JAWAPAN:

Tuan Yang Dipertua,

Untuk makluman Yang Berhormat, jumlah populasi Harimau Malaya di seluruh Semenanjung Malaysia berdasarkan dapatan terkini Survei Harimau Kebangsaan Pertama (*1st National Tiger Survey - 1st NTS*) yang telah dijalankan di 75% daripada 44,000 km² plot kajian dari tahun 2016-2018 adalah kurang dari 200 ekor. Jumlah sebenar populasi Harimau Malaya akan diketahui setelah Survei Harimau Kebangsaan Pertama selesai pada tahun 2020. Data ini menunjukkan populasi Harimau Malaya berada di tahap yang membimbangkan. Sekiranya tiada tindakan yang drastik diambil bagi mengatasi masalah penurunan populasi Harimau Malaya ini, dianggarkan dalam tempoh lima (5) ke sepuluh (10) tahun Malaysia akan kehilangan spesies ini buat selama-lamanya.

Sehubungan dengan itu, pihak Kementerian Air, Tanah dan Sumber Asli (KATS) melalui Jabatan Perlindungan Hidupan Lair dan Taman Negara (PERHILITAN) dengan kerjasama agensi-agensi kerajaan lain, gabungan NGO alam sekitar, dan agensi-agensi lain kini mengambil langkah proaktif bagi mengekal dan meningkatkan populasi Harimau Malaya seperti berikut:

- (i) Meningkatkan rondaan penguatkuasaan dan pemantauan harimau di kawasan-kawasan hotspot pemburuan haram di mana 200 kakitangan PERHILITAN kini sedang menjalankan rondaan secara berterusan di 20 lokasi hotspot pemburuan haram Harimau Belang;

- (ii) Meningkatkan rondaan penguatkuasaan di dalam dan luar Kawasan Perlindungan (PA) menerusi program operasi bersepadu dengan kerjasama pelbagai agensi seperti Angkatan Tentera Malaysia (ATM), Polis Diraja Malaysia (PDRM) dan Jabatan Perhutanan Semenanjung Malaysia yang akan dibincangkan dan dipersetujui oleh MKN dalam masa yang terdekat. Terdapat juga persetujuan pada dasarnya dari beberapa universiti untuk mendapatkan sukarelawan mahasiswa dari kursus biodiversiti dan perhutanan untuk mengadakan rondaan;
- (iii) Melaksanakan Operasi Jerat secara berkala di habitat harimau bagi mencari dan memusnahkan jerat;
- (iv) Melaksanakan moratorium pemburuan terhadap spesies mangsa harimau seperti Rusa Sambar dan Kijang selama 5 tahun iaitu dari 1 November 2016 hingga 30 November 2021 ;
- (v) Memperbanyakkan program pembiakan (captive breeding) Rusa Sambar dalam kurungan untuk tujuan pelepasan ke habitat asal sebagai memperbanyakkan sumber makanan kepada Harimau Belang;
- (vi) Merancang untuk mewujudkan dan mewartakan Santuari Harimau Belang di tiga landskap utama iaitu Belum-Temengor (Perak), Taman Negara (Pahang, Terengganu, Kelantan) dan Endau-Rompin (Rompin);

- (vii) *National Tiger Conservation Centre* (NTCC) yang kini sedang dalam pembinaan 90% siap di Lanchang, Pahang dijangka siap pada penghujung tahun 2019 bagi tujuan penyelidikan;
- (viii) Meningkatkan program kesedaran awam seperti pameran, ceramah, dialog bersama masyarakat menerusi Jabatan PERHILITAN dan kerjasama dengan pihak NGO yang berkaitan;
- (ix) Menjadikan tahun 2019 sebagai “Tahun Perangi Jenayah Siber Hidupan Liar” (*Combating Wildlife Cybercrime*) sebagai kempen menangani jenayah hidupan liar atas talian yang semakin berleluasa;
- (x) Mengadakan Program Sukarelawan yang melibatkan masyarakat awam untuk bersama-sama terlibat secara langsung membantu kerajaan dalam usaha mencegah jenayah hidupan liar dan pemuliharaan hidupan liar; dan
- (xi) Mengadakan **Kempen Selamatkan Harimau Malaya** selama 2 tahun iaitu 2019 – 2020 dengan tema khusus iaitu “Save Our Malayan Tiger”. Kempen ini telah dilancarkan pada 17 Mac 2019 sempena Hari Hidupan Liar Sedunia 2019.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : TUAN NIK MOHAMAD ABDUH BIN NIK ABDUL AZIZ [BACHOK]

TARIKH : 18 MAC 2019 (ISNIN)

SOALAN : 2

PR-1421-L03947

Tuan Nik Mohamad Abduh bin Nik Abdul Aziz [Bachok] minta **MENTERI KOMUNIKASI DAN MULTIMEDIA** menyatakan tindakan yang dikenakan ke atas pemilik akaun media sosial yang didapati menghina institusi raja dan agama Islam.

JAWAPAN

Tuan Yang Dipertua,

1. Untuk makluman Ahli Yang Berhormat, Kementerian sentiasa komited di dalam usaha untuk menjamin kebebasan bersuara rakyat Malaysia berdasarkan Perlembagaan Persekutuan. Walau bagaimanapun, kebebasan ini perlulah mengambil kira kepelbagaian budaya dan agama di Malaysia.
2. Oleh itu, Kementerian Dalam Negeri - Polis Diraja Malaysia (PDRM) dengan kerjasama Kementerian melalui Suruhanjaya Komunikasi dan Multimedia Malaysia (SKMM) akan mengambil tindakan tegas terhadap pihak-pihak yang terlibat dalam salah laku tersebut.
3. Peruntukan undang-undang sedia ada seperti Akta Hasutan 1948 dan Kanun Keseksaan di bawah bidang kuasa PDRM adalah antara instrumen perundangan khusus yang digunakan oleh pihak Kerajaan bagi menangani kesalahan atau penyalahgunaan yang berupa provokasi dan penghinaan terhadap kaum, agama serta Institusi Beraja.

SOALAN NO : 2

4. Pendakwaan juga pernah dibuat di bawah Akta Komunikasi dan Multimedia 1998 (AKM 1998) bagi kesalahan penggunaan tidak wajar kemudahan rangkaian atau perkhidmatan rangkaian, berasaskan aduan yang diterima daripada masyarakat awam serta daripada pihak yang terkesan.

Tuan Yang Dipertua,

5. Pada masa kini, terdapat undang-undang yang boleh dikuatkuasakan untuk menangani gejala-gejala tersebut, namun langkah pengemaskinian serta penambahbaikan akan dijalankan secara berterusan bagi memastikan peruntukan undang-undang terbabit terus kekal relevan selaras peredaran semasa.

6. Selain usaha bersifat penguatkuasaan, pelbagai program berbentuk kesedaran di seluruh negara turut dijalankan oleh pihak Kementerian. Program yang dijalankan adalah bertujuan mendidik masyarakat dari aspek etika penggunaan media sosial. Program ini berhasrat untuk memupuk pengguna Internet agar lebih bertanggungjawab dan bersama-sama mengekang kandungan berunsur provokasi atau kandungan yang boleh menyentuh sensitiviti rakyat daripada terus disebarluaskan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI
MOHD FAKEH [SABAK BERNAM]**

TARIKH : 18 MAC 2019 (ISNIN)

SOALAN NO. 3

Minta **MENTERI PERTANIAN DAN INDUSTRI ASAS TANI** menyatakan adakah Kerajaan Pakatan Harapan telah merangka Dasar Pertanian Negara (DPN) sebagai persediaan untuk menjadi negara maju dan memastikan negara mengeluarkan hasil pertanian yang mencukupi dan berkualiti tinggi bagi memenuhi keperluan negara.

JAWAPAN

Tuan Yang di-Pertua,

Saya memohon supaya soalan ini dijawab bersekali dengan soalan:

- i. YB Batang Sadong bertarikh 18 Mac 2019; dan
- ii. YB Tapah bertarikh 26 Mac 2019

kerana menyentuh isu yang sama berkaitan Dasar Agromakanan Negara (DAN) 2011-2020.

Tuan Yang di-Pertua,

Pelaksanaan Dasar Agromakanan Negara (DAN) 2011-2020 bermatlamat untuk menjamin bekalan makanan yang mencukupi dan selamat, menjadikan sektor

SOALAN NO: 3

agromakanan sebagai industri yang berdaya saing dan mampan, dan meningkatkan tahap pendapatan usahawan tani akan berakhir pada tahun 2020.

Kajian Separuh Penggal DAN telah dilaksanakan pada tahun 2016. Secara keseluruhan, analisis kajian tersebut mendapati bahawa 5 daripada 15 industri khusus yang telah dikenal pasti di bawah DAN adalah berada dalam landasan (*on track*) bagi mencapai sasaran yang telah ditetapkan. Manakala prestasi beberapa industri khusus seperti buah-buahan, kelapa, akuakultur, ikan hiasan, rumpai laut, herba dan cendawan perlu dipertingkatkan lagi untuk mencapai sasaran pengeluaran sebagaimana yang telah ditetapkan.

Bagi memastikan matlamat DAN tercapai dalam tempoh dua tahun terakhir, '*Hala tuju Kementerian Pertanian dan Industri Asas Tani (MOA): Prioriti dan Strategi 2019-2020*' telah dilancarkan pada 14 Februari 2019. Hala Tuju ini dirangka berdasarkan tiga dimensi sektor agromakanan, iaitu sekuriti makanan negara, pembangunan ekonomi luar bandar serta pelaburan swasta dan perdagangan antarabangsa. Bagi memanfaatkan teknologi pertanian moden yang terkini, Hala Tuju Kementerian ini akan menumpukan pemodenan amalan pertanian melalui peningkatan penerimangunaan teknologi melalui tiga insentif, iaitu menyebarluaskan penggunaan teknologi pertanian (mekanisasi dan automasi), membangunkan model pertanian moden dan membangunkan pangkalan data agromakanan negara (AgF).

Selain itu, Hala Tuju MOA ini juga mengandungi inisiatif bagi menjadikan petani Malaysia mampu beroperasi dan menikmati "economy of scale". Peralihan daripada pertanian berskala kecil kepada berskala besar dan komersial akan dilaksanakan secara inklusif dan bertumpu kepada peningkatan pendapatan petani, penternak dan nelayan kecil.

Bagi tempoh jangka panjang, Kementerian sedang menyediakan Dasar Agromakanan Negara 2.0 (DAN 2.0) yang akan dilaksanakan dari tempoh 2021 sehingga 2030. Sejajar dengan perkembangan Revolusi Perindustrian 4 (4IR), DAN 2.0 akan terus memastikan jaminan bekalan makanan negara yang mencukupi dan selamat menerusi pemodenan sektor agromakanan. Selain itu, komoditi pertanian bernilai tinggi juga akan dibangunkan sebagai sumber kekayaan baharu negara.

NO. SOALAN : 6

PEMBERITAHUAN PERTANYAAN BAGI
JAWAPAN LISAN
MESYUARAT PERTAMA, PENGGAL KEDUA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB TUAN RAMLI BIN MOHD NOR
[CAMERON HIGHLAND]**

TARIKH : 18 MAC 2019

MENJAWAB

SOALAN : 6

YB TUAN RAMLI BIN MOHD NOR [CAMERON HIGHLAND] minta **PERDANA MENTERI** menyatakan standard peratusan keterangan yang diperlukan sebelum seseorang individu dituduh di mahkamah yang diambil kira oleh Jabatan Peguam Negara sebelum sebarang pertuduhan di mahkamah dilakukan terhadap seseorang.

JAWAPAN: YB DATUK LIEW VUI KEONG
MENTERI DI JABATAN PERDANA MENTERI

Tuan Yang Di-Pertua,

Seperti Ahli Yang Berhormat sedia maklum, apabila pihak polis telah melengkapkan siasatan terhadap sesuatu aduan atau kes jenayah, maka pegawai siasatan berkenaan akan menghantar kertas siasatan (I.P) ke pihak Timbalan Pendakwaraya (TPR) untuk mendapatkan consent/ persetujuan daripada Timbalan Pendakwaraya sama ada orang yang disyaki boleh didakwa atau pun tidak di mahkamah.

Secara umumnya terdapat 4 langkah untuk pihak pendakwaraya membuat keputusan sama ada untuk membuat pendakwaan atau tidak iaitu:

Langkah pertama ialah mengetahui apa sebenarnya yang berlaku dan ini adalah tugas pasukan penyiasat daripada PDRM untuk mengumpul maklumat. Pendakwaraya boleh meminta lebih banyak maklumat atau siasatan lanjut daripada mereka.

Langkah kedua ialah pendakwaraya perlu menentukan sama ada kesalahan jenayah telah dilakukan di bawah undang-undang sedia ada contohnya kesalahan jenayah di bawah Kanun Keseksaan atau undang-undang yang lain.

Langkah ketiga adalah pendakwa raya perlu menentukan sama ada elemen-elemen jenayah yang telah dilakukan di bawah undang-undang yang relevan itu dapat dibuktikan di mahkamah ataupun tidak. Harus diingat pendakwaraya perlu membuktikan kesnya melepassi keraguan munasabah (beyond reasonable doubt) apabila kes itu dibicarakan. Tertuduh pula tidak perlu membuktikan dirinya tidak bersalah berdasarkan maxim dengan izin “ every person is innocent until proven guilty”. Maxim ini menunjukkan bahawa beban kebuktian (burden of proof) berada di atas pihak pendakwaan. Manakala, pada peringkat pembelaan semasa perbicaraan, beban kebuktikan atas Tertuduh ialah menimbulkan keraguan dalam kes pendakwaan untuk mendapatkan kebebasan (acquittal).

Di peringkat ini juga pendakwaraya perlu membuat keputusan sama ada keterangan atau bahan bukti sudah cukup untuk dikemukakan di mahkamah termasuklah kenyataan daripada saksi-saksi yang ada.

Sekiranya pendakwaraya telah memenuhi ketiga-tiga langkah tersebut, langkah terakhir ialah sama ada pendakwaan perlu dilakukan atau tidak.

Pendakwaraya perlu membuat keputusan sama ada pendakwaan di mahkamah dilakukan untuk kepentingan umum (public interest). Pendakwaraya mempunyai kuasa atau budi bicara dalam perkara ini sepetimana yang termaktub dalam Perkara 145 (3) Perlembagaan Persekutuan dan di bawah Seksyen 254 Akta Kanun Prosedur Jenayah di mana Pendakwaraya boleh menolak daripada meneruskan pendakwaan selanjutnya di mana-mana peringkat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN TAN KOK WAI
[CHERAS]**

TARIKH : 18 MAC 2019 (ISNIN)

RUJUKAN : L4 [PR-1421-L03990]

SOALAN NO. 7

Tuan Tan Kok Wai [Cheras] minta **MENTERI WILAYAH PERSEKUTUAN** menyatakan bilangan plot tanah Kerajaan yang telah diambil semula oleh DBKL secara membeli balik daripada pembeli-pembeli dan nyatakan sebab-sebab berbuat demikian serta nyatakan lokasi, saiz, tahun jualan, nilai asal jualan, nilai pasaran terkini dan kegunaan tanah-tanah tersebut.

JAWAPAN

Tuan Yang di-Pertua,

Untuk makluman Ahli Yang Berhormat Cheras, di bawah kepimpinan kerajaan sebelum ini, Dewan Bandaraya Kuala Lumpur telah melaksanakan 97 transaksi penjualan tanah. Pihak Kementerian Wilayah Persekutuan (KWP) telah meneliti semula 97 transaksi tanah berkenaan dengan menubuhkan Pasukan Task Force yang diketuai oleh KWP dan dianggotai Bersama Pejabat Menteri Wilayah Persekutuan, DBKL dan Jabatan PEGUAM NEGARA.

Daripada 97 transaksi di atas hanya terdapat 1 transaksi sahaja di mana pihak DBKL telah membeli balik sebahagian keluasan tanah daripada pemaju iaitu Lot 52958 dan Lot 52959 di Taman Desa yang melibatkan tanah yang di anggarkan seluas 27.403 ekar (keluasan asal 41.42 ekar) dengan harga belian berjumlah RM 283 juta berbanding nilaiian

SOALAN NO : 7

RM 334.023 juta. Kegunaan tanah tersebut berdasarkan syarat nyata bagi lot 52958 adalah untuk “Water Theme Park” dan Taman Rekreasi bagi lot 52959.

Untuk makluman Ahli Yang Berhormat juga, 14 transaksi telah berjaya dibatalkan secara ‘*mutual agreement*’ antara pihak DBKL dan Syarikat. Ini melibatkan tanah seluas 53.98 ekar (tanah DBKL seluas 18.87 ekar dan tanah kerajaan seluas 35.11 ekar) dengan anggaran nilai tanah ialah RM 475.2 juta. Dalam kes-kes ini, deposit 10% telah dipulangkan dan surat tawaran dibatalkan.

Secara keseluruhannya, sejumlah 82.40 ekar tanah yang melibatkan tanah DBKL seluas 46.27 ekar dan tanah kerajaan seluas 35.11 ekar telah berjaya diambil semula oleh DBKL dengan nilai tanah dianggarkan RM 809.22 juta yang melibatkan 15 transaksi. (Nilai bayar balik sebanyak RM310 juta)

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI ABDUL AZEEZ BIN ABDUL RAHIM
[BALING]**

TARIKH : 18.3.2019 (ISNIN)

SOALAN NO. 8

Dato' Sri Abdul Azeez bin Abdul Rahim [Baling] minta **MENTERI PENDIDIKAN** menyatakan :-

- a) adakah Kementerian mempunyai perancangan khusus menetapkan satu peraturan atau dasar yang menyeragamkan tempoh sesi praktikal di semua Universiti Awam (UA) dan IPTS di Malaysia; dan
- b) apakah ada usaha untuk menetapkan kadar elauan minimum untuk pelajar praktikal sepanjang masa latihan praktikal dijalankan sama ada bagi sektor swasta atau sektor awam.

JAWAPAN

Tuan Yang di-Pertua,

Untuk makluman Ahli Yang Berhormat, keperluan pelajar mengikuti latihan industri adalah tertakluk kepada Dasar Latihan Industri Negara yang telah diperkenalkan kementerian pada 2010. Walau bagaimanapun, dasar ini sedang disemak semula bagi tujuan penambahbaikan. Antara aspek yang berkemungkinan dibuat penambahbaikan adalah dari segi tempoh sesi praktikal di semua Universiti Awam (UA) supaya ianya selari dengan kehendak dan keperluan semasa. Penyeragaman tempoh sesi praktikal di Institusi

SOALAN NO: 8

Pendidikan Tinggi Swasta (IPTS) pula adalah mengikut standard program yang disediakan oleh Malaysian Qualification Agency (MQA) sebagaimana dipersetujui oleh badan profesional bidang tertentu.

Tujuan utama penempatan pelajar praktikal adalah untuk mempraktikkan pembelajaran teori yang dipelajari di institusi dalam situasi sebenar di tempat kerja. Oleh itu, penetapan elaun atau pemberian elaun kepada pelajar praktikal adalah bergantung kepada peruntukan majikan masing-masing. Pelajar berhak membuat pilihan penempatan praktikal yang bersesuaian termasuklah pemilihan majikan yang memberi elaun dengan pemantauan pensyarah institusi masing-masing. Walaupun sesetengah majikan tidak memberi elaun, namun terdapat majikan yang menyediakan kemudahan lain antaranya kemudahan tempat tinggal, pengangkutan dan lain-lain.

Bagi latihan praktikal di agensi-agensi kerajaan, surat edaran JPA Bil. 10 (2011) mengenai Elaun Latihan Amali Pelajar Institusi Pengajian Tinggi di Agensi Kerajaan menyatakan bahawa pelajar yang sedang menjalani latihan praktikal dibenarkan menerima bayaran elaun sebanyak RM15 sehari untuk tempoh maksimum tiga (3) bulan.

Sebarang cadangan bagi menetapkan kadar elaun minimum latihan praktikal perlu dikaji dengan lebih mendalam kerana dikhuatiri akan membebankan industri terutama Perusahaan Kecil dan Sederhana (SME). Jika penetapan ini dilaksanakan, besar kemungkinan SME tidak lagi akan mampu untuk mengambil pelajar untuk tujuan praktikal.

Sekian, terima kasih.

RJM 28

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN JONATHAN YASIN
[RANAU] PH-PKR**

TARIKH : 18 MAC 2019 (ISNIN)

SOALAN NO. 9

Minta **MENTERI HAL EHWAL EKONOMI** menyatakan apakah langkah-langkah baru yang sudah dibuat oleh Kementerian Hal Ehwal Ekonomi sejak 9 Mei 2018 untuk memastikan tahap pembangunan di Sabah dipertingkatkan untuk menyeimbangkan pembangunan yang tidak seimbang di antara Sabah dan Semenanjung.

JAWAPAN

Tuan Yang di-Pertua,

1. Usaha untuk mengurangkan ketidakseimbangan antara wilayah dan negeri telah diberi penekanan khusus dalam Kajian Separuh Penggal Rancangan Malaysia Kesebelas (KSP RMKe-11) yang telah dibentangkan oleh YAB Perdana Menteri pada 18 Oktober 2018. Tonggak Ke-3 KSP RMKe-11, Menuju ke arah Pembangunan Wilayah yang Seimbang menumpukan kepada usaha untuk mengurangkan ketidakseimbangan melalui pengagihan manfaat sosioekonomi yang lebih baik dalam kalangan wilayah. Strategi-strategi untuk mempercepat pembangunan Sabah telah diperincikan dalam dokumen RMKe-11.

Tuan Yang di-Pertua,

2. Dalam tempoh dua tahun terakhir RMKe-11, peruntukan pembangunan Kerajaan akan diagih dengan keutamaan diberi kepada enam negeri yang kurang membangun, termasuk negeri Sabah. Di bawah *Rolling Plan 4* (2019), negeri Sabah telah pun diperuntukkan sejumlah RM5.01 billion atau 9.2% daripada jumlah peruntukan pembangunan keseluruhan. Jumlah peruntukan ini telah meningkat 21.3%, iaitu sebanyak RM879 juta daripada tahun sebelumnya (RM4.13 billion pada 2018). Peruntukan tersebut adalah bagi melaksanakan sebanyak 119 projek baharu dan 519 projek sambungan melalui pelbagai kementerian.

Tuan Yang di-Pertua,

3. Akses kepada kemudahan asas dan perkhidmatan di kawasan luar bandar Sabah adalah menjadi salah satu tumpuan utama Kerajaan. Dalam hal ini, sebanyak RM654 juta telah diluluskan di bawah peruntukan RP4 (2019) untuk pembangunan luar bandar Sabah. Jumlah peruntukan ini telah meningkat 35.9%, iaitu sebanyak RM173 juta daripada tahun sebelumnya (RM481 juta pada 2018). Peruntukan ini adalah bagi melaksanakan program/projek seperti Jalan Luar Bandar (JALB), Bekalan Air Luar Bandar (BALB), Bekalan Elektrik Luar Bandar (BELB) dan Jalan Perhubungan Desa melalui Kementerian Pembangunan Luar Bandar (KPLB).
4. Selain itu, bagi meningkatkan bekalan elektrik di Sabah, Kerajaan melalui Kementerian Tenaga, Sains, Teknologi, Alam Sekitar dan Perubahan Iklim (MESTECC) juga telah meluluskan peruntukan pembangunan sebanyak RM498 juta pada tahun 2019 bagi pembinaan pencawang masuk utama (PMU), pencawang pembahagi utama (PPU) dan pengukuhan sistem sedia ada.

Tuan Yang di-Pertua,

5. Selain itu, sektor terpilih yang boleh meningkatkan potensi ekonomi akan terus dibangunkan di Sabah. Dalam hal ini, beberapa projek berimpak tinggi sedang dilaksanakan oleh Kerajaan bagi pembangunan negeri Sabah. Antaranya adalah projek Kelompok Industri Berasaskan Kelapa Sawit (*Palm Oil*

NO SOALAN : 9

Industrial Cluster) di Sandakan dan Lahad Datu serta pembinaan blok dan kompleks 50 inkubator di Sabah Agro-Industrial Presinct (SAIP) di Papar. Projek ini akan menjadi pemangkin kepada perkembangan industri pembuatan dan pertanian di negeri Sabah.

Sekian, terima kasih.

Kementerian Hal Ehwal Ekonomi

18 Mac 2019

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN ANYI NGAU [BARAM]

TARIKH : 18.3.2019 (ISNIN)

SOALAN NO. 10

Tuan Anyi Ngau [Baram] minta **MENTERI PENDIDIKAN** menyatakan jumlah peruntukan serta sekolah daif di Sarawak amnya dan kawasan Baram khasnya yang akan dibaik pulih dalam tahun 2019. Senaraikan sekolah yang akan dibaik pulih di kawasan Baram.

JAWAPAN

Tuan Yang di-Pertua,

Sehingga kini, pelaksanaan naik taraf dan pembangunan semula sekolah daif di negeri Sarawak melibatkan 198 buah sekolah dengan peruntukan berjumlah RM557 juta melalui peruntukan pembangunan dan *Private Finance Initiative (PFI)*. Untuk tahun 2018 sahaja, sebanyak 116 buah sekolah daif telah dinaik taraf dengan kos sebanyak RM416.58 juta. Sehingga 28 Februari 2019 sebanyak 66 buah sekolah telah siap dan telah digunakan manakala baki 50 sekolah lagi masih dalam peringkat pelaksanaan dan dijangka akan siap pada bulan April 2019.

Bagi pelaksanaan tahun 2019, peruntukan sebanyak RM100 juta telah diluluskan melibatkan naik taraf dan pembangunan semula 32 buah sekolah daif di Sarawak. Kesemua projek ini akan dilaksanakan oleh pihak Jabatan Kerja Raya (JKR) secara tender terbuka dan pelaksanaan dijangka bermula secara berperingkat pada Mei tahun ini.

NO SOALAN: 10

Manakala khusus untuk parlimen Baram, sebanyak lima (5) buah sekolah yang memiliki bangunan daif telah dinaik taraf pada tahun 2018. Bagi tahun 2019, tiga (3) sekolah yang mempunyai bangunan daif akan dinaik taraf iaitu Sekolah Kebangsaan Long Lapok, Sekolah Kebangsaan Long Laput dan Sekolah Kebangsaan Sungai Buri yang melibatkan peruntukan sebanyak RM16 juta. Pelaksanaan akan dilaksanakan oleh JKR sepenuhnya.

Sekian, terima kasih.

RJM 36

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : DATO' DR HAJI NOOR AZMI BIN GHAZALI
[BAGAN SERAI]
TARIKH : 18 MAC 2019 (ISNIN)

SOALAN NO. 11

Minta **MENTERI KESIHATAN** menyatakan bilakah Kementerian bercadang untuk meratifikasi (ratify) protokol berkaitan kawalan penyeludupan tembakau di bawah Framework Convention On Tobacco Control (FCTC), sebagai langkah strategik bagi mengurangkan bilangan perokok di Malaysia.

JAWAPAN

Yang di-Pertua,

WHO Framework Convention on Tobacco Control (FCTC) telah dibangunkan sebagai response kepada globalisasi wabak tembakau. Ia bertujuan untuk menangani beberapa punca wabak itu, termasuk faktor yang kompleks dengan kesan rentas sempadan, seperti liberalisasi perdagangan dan pelaburan asing langsung, pengiklanan tembakau, promosi dan penajaan di luar sempadan negara serta perdagangan haram dalam produk tembakau.

WHO-FCTC menyediakan satu rangka kerja bagi langkah-langkah kawalan tembakau yang akan dilaksanakan di peringkat kebangsaan, serantau dan antarabangsa. Malaysia telah meratifikasi konvensyen tersebut sejak tahun 2005.

Untuk makluman Yang Berhormat, *Protocol to Eliminate Illicit Trade in Tobacco Products* merupakan satu protokol yang lahir daripada Artikel 15 WHO-FCTC. Protokol ini mengandungi 47 Artikel bagi menggariskan kawalan ke atas masalah penyeludupan rokok tidak sah seperti *supply chain control* (kawalan rangkaian bekalan) yang merangkumi perlesenan, *tracking and tracing*, *free zones and international transit* dan penjualan di zon bebas cukai.

Protokol ini telah dikuatkuasakan semenjak 25 September 2018 di mana seramai 48 negara anggota kepada WHO FCTC telah menyertainya. Sehingga kini, penyertaan Malaysia ke dalam protokol ini masih belum diputuskan.

Yang di-Pertua,

Penguatkuasaan rokok tidak sah adalah di bawah bidang kuasa **Jabatan Kastam Diraja Malaysia**. Kementerian Kesihatan Malaysia selaku urusetia kepada WHO-FCTC telah mengadakan beberapa siri perbincangan bersama agensi peneraju iaitu Kementerian Kewangan dan Jabatan Kastam Diraja Malaysia serta agensi-agensi berkaitan untuk meratifikasi Protokol ini.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : PERTANYAAN-PERTANYAAN JAWAB LISAN

DARIPADA : TUAN HAJI AWANG BIN HASHIM

TARIKH : 18 MAC 2019

SOALAN :

Tuan Haji Awang bin Hashim [Pendang] minta MENTERI INDUSTRI UTAMA menyatakan adakah pihak Kementerian telah melaksanakan harga lantai pembelian getah (*cup lump*) seperti yang dijanjikan RM2.50, dan apakah kaedahnya sekiranya tidak dilaksanakan.

JAWAPAN

Tuan Yang Di-Pertua,

Kerajaan belum lagi bercadang untuk menetapkan harga lantai bagi getah sekerap. Ini kerana pelaksanaan harga lantai akan memberikan impak kewangan yang besar kepada Kerajaan. Kerajaan belum dapat mempertimbangkan cadangan mewujudkan harga lantai berdasarkan kepada faktor-faktor berikut:

- i. Penetapan harga lantai memerlukan sumber kewangan yang tinggi bagi menyokongnya sekiranya harga getah asli dunia mengalami tren penurunan yang mendadak;
- ii. Menyediakan ruang kepada aktiviti spekulasi harga dalam kalangan para penjual getah dengan menekan harga ke paras rendah dan mengharapkan Kerajaan akan menampung perbezaan di antara harga pasaran dan harga lantai; dan
- iii. Menyediakan ruang kepada aktiviti penyeludupan getah dari luar negara memandangkan harga tempatan adalah lebih tinggi berbanding dengan harga antarabangsa.

Namun begitu, Kerajaan tentunya amat prihatin dengan cabaran yang dihadapi oleh pekebun kecil getah terutamanya apabila berlaku kejatuhan harga pasaran getah. Sehubungan itu, Kerajaan terus melaksanakan Insentif Pengeluaran Getah (IPG) sebagai langkah untuk menstabilkan harga dan pengeluaran getah. Berdasarkan harga getah yang terlalu rendah pada penghujung tahun 2018, Kerajaan telah menambahbaik pelaksanaan IPG pada 21 November 2018 dengan menaikkan Paras Harga Pengaktifan (PHP) daripada RM2.20 kepada RM2.50 sekilogram getah sekerap. Kadar PHP baru ini telah berkuat kuasa bermula 1 Januari 2019 dan Kementerian melalui LGM telah menyalurkan IPG dengan kadar baru ini bermula awal Februari 2019.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 18 MAC 2019 (ISNIN)

SOALAN NO. 13

Tuan William Leong Jee Keen [Selayang] minta **MENTERI WILAYAH PERSEKUTUAN** menyatakan status dan kejayaan Pelan Induk Rangkaian Ekologi *Central Forest Spine* sebagai tulang belakang kepada Kawasan Alam Sekitar ataupun *Environmentally Sensitive Area* (ESA) di Semenanjung Malaysia untuk pemuliharaan biodiversiti dan ekosistem daripada ancaman fragmentasi hutan.

JAWAPAN

Tuan Yang di-Pertua,

Untuk makluman Yang Berhormat Selayang, Kementerian Wilayah Persekutuan (KWP) melalui PLANMalaysia (Jabatan Perancangan Bandar dan Desa) telah menyediakan Pelan Induk Rangkaian Ekologi *Central Forest Spine* (CFS) sebagai tulang belakang kepada Kawasan Alam Sekitar ataupun *Environmentally Sensitive Area* (ESA) di Semenanjung Malaysia untuk pemuliharaan biodiversiti dan ekosistem daripada ancaman fragmentasi hutan.

Berdasarkan pelan induk tersebut di bawah tempoh pelaksanaan RMKe-10 dan RMKe-11 sebanyak 3 komponen utama telah dijalankan bagi pemuliharaan biodiversiti dan ekosistem daripada fragmentasi hutan iaitu:

- (i) pemulihan habitat bagi pemeliharaan/konservasi biodiversiti;
- (ii) pembinaan struktur fizikal; dan
- (iii) pelaksanaan program di kawasan koridor ekologi CFS mengikut strategi CFS.

Pelaksanaan Pelan Induk CFS melibatkan pelbagai agensi khususnya Kementerian Air, Tanah dan Sumber Asli (KATS) di mana Jabatan Perhutanan Semenanjung Malaysia (JPSM) adalah agensi peneraju utama (*lead agency*). Matlamat pelaksanaan program CFS ini telah dapat dicapai walaupun belum sepenuhnya lagi kerana program ini masih berjalan.

Pembinaan struktur fizikal melibatkan pembinaan *viaduct* di Sungai Deka di Terengganu, Sungai Yu di Pahang dan di Gerik - Kota Bharu. Pembinaan *viaduct* ini bertujuan memudahkan pergerakan haiwan tanpa mengganggu lalulintas dan mengelakkan *inbreeding*. Projek-projek fizikal yang lain adalah:

- (i)pemasangan tanda amaran hidupan liar melintas;
- (ii)pemasangan pagar elektrik;
- (iii)pembinaan *artificial salt licks*; dan
- (iv)pembinaan *speed breaker* dan lampu solar di kawasan-kawasan tumpuan dan laluan hidupan liar di sepanjang jalan raya.

Kerajaan Persekutuan telah memperuntukan RM60 juta pada RMKe-10 (2011-2015) dan sebanyak RM50 juta bagi RMKe-11 (*Rolling Plan 1*) kepada JPSM bagi melaksanakan aktiviti-aktiviti yang telah dikenalpasti dalam Pelan Induk Rangkaian Koridor Ekologi CFS.

Di samping itu, pelan induk ini telah mendapat pengiktirafan di peringkat nasional dan antarabangsa iaitu Pengukuhan dan Kerjasama

Antarabangsa dengan *United Nations Development Programme* (UNDP)/*Global Environment Facility* (GEF). Di mana KATS melalui JPSM telah menerima pembiayaan sebanyak USD10 juta selama 6 tahun bermula tahun 2014-2019. Projek ini melibatkan program konservasi biodiversiti, pengurusan hutan dan tanah secara mampan.

Tuan Yang di-Pertua,

Secara keseluruan CFS ini yang melibatkan KATS di mana KWP melalui PLANMalaysia yang menyediakan pelan tersebut telah berjaya dalam memelihara alam sekitar khususnya hutan di negara ini. Di dalam masa yang sama, Kajian CFS2 iaitu Kajian Semula untuk memantapkan dan menambahbaik CFS ini akan dijalankan pada tahun ini sehingga 2021.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KE-EMPAT BELAS**

PERTANYAAN : JAWAB LISAN

**DARIPADA : DATO' MOHD NIZAR BIN HAJI ZAKARIA
[PARIT]**

TARIKH : 18 MAC 2019 (ISNIN)

SOALAN NO. 14

Minta **MENTERI PENGANGKUTAN** menyatakan

- (a) apakah usaha yang telah dijalankan oleh Kementerian bagi membanteras gejala pembelian 'lesen terbang' atau palsu; dan
- (b) apakah tindakan yang telah dikenakan terhadap warga asing yang memiliki 'lesen terbang'.

JAWAPAN

Yang di-Pertua,

1. Untuk makluman Yang Berhormat, satu Jawatankuasa Siasatan Dalaman (JKSD) telah ditubuhkan oleh Pengurusan Tertinggi Jabatan Pengangkutan Jalan Malaysia (JPJ). Jawatankuasa tersebut bertanggungjawab untuk mengenal pasti senarai pemegang lesen yang tidak sah hasil daripada siasatan pihak Suruhanjaya Pencegahan Rasuah Malaysia (SPRM) dan juga siasatan Bahagian Integriti JPJ.
2. Selain itu, bagi membanteras gejala lesen terbang ini berleluasa, JPJ telah mengemas kini dan menambah baik Prosedur Pengoperasian Standard (SOP) bagi pengeluaran lesen memandu kepada pemegang lesen memandu luar negara supaya proses kelulusan dibuat lebih ketat.
3. Tindakan penambahbaikan yang telah dilaksanakan adalah:
 - a. Menggantungkan semua proses permohonan pertukaran lesen memandu luar negara bermula pada 24 September 2018 kecuali bagi pemegang pas diplomatik dan lesen negara Singapura (bagi warganegara Malaysia yang pernah menukar lesen memandu Malaysia untuk mendapatkan lesen memandu Singapura sahaja); dan
 - b. Melantik pegawai yang lebih kanan bagi mengesahkan dan meluluskan permohonan pertukaran lesen luar negara dan kelulusan pinda butir maklumat.
4. JKSD juga berperanan untuk memantau dan mencadangkan langkah penambahbaikan bagi kes-kes pengeluaran lesen memandu yang tidak sah (lesen terbang).
5. Untuk makluman Yang Berhormat juga, sejumlah lima puluh (50) kes serahan lesen terbang / tidak sah secara sukarela oleh orang

awam telah direkodkan oleh JPJ sepanjang tempoh 13 September 2018 sehingga 12 Oktober 2018. Daripada jumlah tersebut, sebanyak lapan (8) kes lesen terbang telah diambil tindakan pembatalan dan baki empat puluh dua (42) kes di dalam tindakan pembatalan lesen JPJ.

6. Di samping itu juga, sebanyak empat belas (14) kes lesen terbang telah dikenal pasti oleh JPJ yang mana melibatkan kes lesen terbang yang telah melebihi tempoh penyerahan secara sukarela. Berdasarkan senarai tersebut, kesemua pemegang lesen yang tidak sah ini akan dipanggil temu siasat di bawah seksyen 114, Akta Pengangkutan Jalan (APJ) 1987. Jika didapati bersalah, individu tersebut boleh disabitkan kesalahan di bawah Seksyen 108, APJ 1987, di mana hukumannya ialah denda tidak kurang RM 5000 atau dipenjarakan tidak kurang daripada satu (1) tahun atau keduanya sekali. Sehingga kini belum ada sebarang pendakwaan dibuat ke atas mana-mana pemegang lesen tidak sah ini kerana kesemua kes masih dalam siasatan.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB TUAN CHAN FOONG HIN
(KOTA KINABALU)

TARIKH : 18 MAC 2019 (ISNIN)

SOALAN NO. 15

Minta **MENTERI SUMBER MANUSIA** menyatakan adakah Kerajaan Persekutuan bercadang memperkenalkan gaji minimum berdasarkan kemahiran seseorang pekerja.

PN-1412- L03533

JAWAPAN

Tuan Yang Di-Pertua,

1. Kerajaan tidak bercadang untuk memperkenalkan gaji minimum mengikut kemahiran buat masa sekarang. Namun sebagai sebuah Kerajaan yang terbuka terhadap setiap pandangan dan cadangan, Kementerian melalui Majlis Perundingan Gaji Negara (MPGN) akan meneliti cadangan ini sama ada ia benar-benar sesuai dan memberi manfaat kepada rakyat serta ekonomi negara secara keseluruhannya.
2. Asas pendirian Kerajaan untuk tidak membezakan gaji minimum seragam seluruh negara RM1,100 sebulan (RM5.29 sejam) adalah seperti berikut:
 - (a) kos sara hidup untuk barang asas adalah sama di seluruh negara;
 - (b) tujuan pelaksanaan gaji minimum adalah untuk melindungi *vulnerable group* (pekerja-pekerja asas yang mempunyai tahap akademik dan kemahiran rendah atau kurang berpengalaman) yang mana mereka majoritinya banyak bekerja di perusahaan kecil dan sederhana (PKS); dan

SOALAN NO: 15

(c) bagi memastikan aktiviti penguatkuasaan dan pemantauan yang berkesan agar objektif asas dasar gaji minimum dapat dicapai.

Tuan Yang di-Pertua,

3. Buat masa sekarang Kementerian Sumber Manusia telah menerbitkan Panduan Gaji Permulaan 160 Pekerjaan Terpilih Berasaskan Kemahiran (Panduan Gaji). Intipati utama pengenalan panduan gaji adalah untuk mengiktiraf graduan lepasan institusi latihan kemahiran dan seterusnya meningkatkan penyertaan tenaga mahir dalam pasaran buruh negara. Kewujudannya tidak bersifat mandatori tetapi sebagai panduan yang berguna bagi majikan menetapkan gaji permulaan bagi sesuatu pekerjaan berasaskan kemahiran

4. Kesimpulannya, Kerajaan akan mengarahkan MPGN mengkaji cadangan dan pandangan berkaitan gaji minimum ditetapkan mengikut kemahiran pekerja.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 18.3.2019 (ISNIN)

SOALAN NO. 16

Tuan Ahmad Fadhl bin Shaari [Pasir Mas] minta **MENTERI PENDIDIKAN** menyatakan bilakah *MyBrain* akan mula beroperasi kepada program Sarjana kepada seluruh bidang.

JAWAPAN

Tuan Yang di-Pertua,

Pada masa ini Kementerian Pendidikan Malaysia (KPM) ada menawarkan tajaan Biasiswa **Program MyBrainSc** merangkumi peringkat pengajian dari Ijazah Pertama ke peringkat Ph.D. Tajaan MyBrainSc adalah hanya merangkumi bidang Sains Tulen sahaja iaitu empat (4) bidang: Matematik, Fizik, Kimia dan Biologi.

Program tajaan Biasiswa MyBrainSc ini diperkenalkan pada tahun 2012 bertujuan untuk melahirkan pemenang Anugerah Nobel Laurete pertama dari Malaysia di dalam bidang penyelidikan. Sehubungan dengan itu, biasiswa ini hanya ditawarkan di dalam bidang Sains Tulen sahaja (Matematik, Fizik, Kimia dan Biologi) dan Kementerian tidak merancang untuk memperluaskan ke bidang-bidang yang lain.

Selain daripada program MyBrainSc, Kementerian turut menjalankan operasi tajaan Biasiswa **Program MyBrain15** yang merangkumi pelbagai bidang pengajian dari peringkat Sarjana ke Ph.D (termasuk Ph.D Industri). Walau bagaimanapun **tawaran baru** Program MyBrain15 pada masa ini terpaksa ditangguhkan akibat kekangan kewangan negara. Namun demikian, Kementerian masih meneruskan pembiayaan baki 1,606 orang pelajar di bawah program MyBrain15 yang masih dalam tempoh penajaan sehingga tahun 2023.

Kedua-dua program MyBrain ini diperkenalkan sebagai sebahagian daripada subset untuk menyokong sasaran melahirkan 60,000 orang pemegang Ph.D warganegara Malaysia menjelang tahun 2025 seperti yang digariskan di bawah Pelan Strategik Pengajian Tinggi Negara (PSPTN). Walaupun Program MyBrain15 ditangguhkan pada tahun 2019, Kementerian masih meneruskan pemberian *Fundamental Research Grant Scheme (FRGS)* kepada Universiti Awam di Malaysia yang dilihat mampu melahirkan pemegang Ph.D melalui pengajian peringkat pasca-siswazah yang lebih bersasar samada berfokus terhadap skop penyelidikan yang dilaksanakan oleh pihak UA mahupun pelajar yang lebih bertanggung jawab dalam menamatkan pengajian dengan kualiti akademik yang cemerlang mengikut tempoh masa yang ditetapkan (Graduate on Time) melalui seliaan ketat penyelia kajian yang juga merupakan pensyarah mereka di UA berkaitan.

Sekian, terima kasih

RJM 34

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI DR. SANTHARA
[SEGAMAT - PKR]**

TARIKH : 18 MAC 2019 (ISNIN)

SOALAN NO. 17

Minta **MENTERI BELIA DAN SUKAN** menyatakan apakah strategi Kementerian untuk membantu menaikkan prestasi sukan catur di Malaysia.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian melalui Majlis Sukan Negara (MSN) memberi tumpuan kepada 16 jenis sukan teras dalam pelaksanaan pembangunan sukan berprestasi tinggi negara. Persediaan kontinjen negara khusus ke arah penyertaan di temasya-temasya sukan utama seperti Sukan SEA, Sukan Asia, Sukan Komanwel dan Sukan Olimpik.
2. Sukan catur tidak tersenarai di bawah kategori 16 jenis sukan teras. Sukan ini juga tidak dipertandingkan secara konsisten di temasya-temasya sukan utama antara tahun 2012 hingga 2018 yang lalu.
3. Berdasarkan sejarah penglibatan sukan di temasya utama, sukan catur hanya dipertandingkan di Sukan Asia, Guangzhou 2010 dan Sukan SEA, Palembang 2011 sahaja. Di Guangzhou 2010, kontinjen negara menerusi tiga (3) atlet telah menyertai dua (2)

SOALAN NO : 17

acara iaitu “Men’s” dan “Women’s Individual Rapid” (meraih kedudukan ke-22, 29 dan 38). Manakala, penyertaan di Palembang 2011 pula, pasukan catur hanya meraih satu (1) pingat gangsa menerusi acara “Mixed Double Standard Class”.

4. Bagi temasya Sukan SEA Filipina yang akan diadakan pada tahun ini, pihak pengajur telah menyenaraikan lima (5) acara bagi sukan catur ini. Oleh itu, pihak Kementerian akan menilai prestasi atlet-atlet menerusi penyertaannya di temasya tersebut dan akan menimbangkan bantuan yang sewajarnya kepada Persekutuan Catur Malaysia.
5. Kementerian melalui MSN amat menggalakkan Persatuan Sukan Kebangsaan (PSK) membangunkan sukan dari peringkat akar umbi hingga ke peringkat yang lebih tinggi. Kerajaan juga akan mempertimbangkan bentuk bantuan kewangan bagi PSK yang tidak disenaraikan di bawah 16 jenis sukan teras termasuk sukan catur ini. PSK juga seringkali disyorkan untuk menerokai peluang tajaan syarikat korporat bagi mengelakkan kebergantungan sepenuhnya daripada pihak kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 18 MAC 2019 [ISNIN]

SOALAN NO. 19

Minta **MENTERI PERUMAHAN DAN KERAJAAN TEMPATAN** menyatakan perkembangan permohonan Pulau Pinang untuk membina Projek Perumahan Rakyat di lima daerah negeri ini. Jelaskan juga status Projek Perumahan Rakyat 1 Malaysia (PR1MA) dan Program Tabung Penyelenggaraan 1 Malaysia (TP1M) di Pulau Pinang termasuk bantuan peruntukan penyelenggaraan dan kelulusan permohonan.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) telah menerima permohonan untuk membina Program Perumahan Rakyat (PPR) baharu daripada Kerajaan Negeri di kawasan Bandar Jelutong, Pulau Pinang dan permohonan ini telah dipertimbangkan oleh KP KT untuk diangkat kepada Kementerian Hal Ehwal Ekonomi (MEA) sebagai salah satu cadangan projek baharu bagi tahun 2020.
2. Untuk makluman Yang Berhormat juga, sehingga 31 Januari 2019 KP KT telah menyiapkan 4 Projek (999 unit) PPR di Negeri Pulau Pinang iaitu PPR Lorong Selamat, Georgetown (316 unit), PPR Jalan Thamby, Butterworth, (382 unit), PPR Mak Mandin (70 unit) dan PPR Kg. Tok Suboh, Seberang Perai Tengah (231 unit).
3. Bagi Projek Perumahan Rakyat 1 Malaysia (PR1MA) di Pulau Pinang pula, sebanyak 3,170 unit (3 projek) telah diluluskan yang terdiri daripada 1,017 unit sedang dalam pembinaan. Manakala jumlah selebihnya iaitu 2,153 unit masih dalam peringkat perancangan. Projek-projek ini terletak di kawasan Parlimen Bukit Bendera, Bukit Gelugor, dan Permatang Pauh.
4. Bagi program Tabung Penyelenggaraan Perumahan Malaysia (TPPM) pula, KP KT telah menerima sebanyak 73 permohonan (50 projek rumah kos rendah dan 23 projek rumah kos sederhana rendah) daripada Joint Management Body/ Management Corporation (JMB/MC) dan Pihak Berkuasa Tempatan (PBT) di Pulau Pinang dengan melibatkan kos berjumlah RM27.9 juta di sepanjang tahun 2014-2017. Daripada jumlah tersebut, sebanyak 32 permohonan (merangkumi 21 projek rumah kos rendah dan 11 projek rumah kos

sederhana rendah) dengan kos berjumlah RM19.46 juta telah diluluskan oleh KPKT bagi tujuan pelaksanaan.

6. Kelulusan ini adalah bagi tujuan kerja-kerja pembaikan seperti penggantian lif, penggantian tangki air, mengecat bangunan dan membaiki kerosakan harta bersama (*common property*) di sesebuah kawasan strata tersebut.
7. Bagi tahun 2018 dan 2019, tiada permohonan TPPM yang diluluskan di negeri Pulau Pinang. Ini adalah kerana peruntukan yang diterima oleh KPKT hanya untuk membiayai projek-projek sedia ada (sambungan tahun 2017).
8. Untuk makluman Yang Berhormat, KPKT akan melihat semula permohonan yang dikemukakan oleh seluruh PBT pada tahun ini. Walau bagaimanapun, kelulusan adalah tertakluk kepada peruntukan yang diterima oleh KPKT pada tahun 2020. Kelulusan juga akan memberi keutamaan kepada pembaikan yang melibatkan isu keselamatan seperti lif, tangki air, bumbung dan susur tangga.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT PERTAMA, PENGGAL KEDUA
PARLIMEN KEEMPAT BELAS
MAJLIS MESYUARAT DEWAN RAKYAT

PERTANYAAN : LISAN

DARIPADA : DATUK ZAHIDI BIN ZAINUL ABIDIN [PADANG BESAR]

TARIKH : 18 MAC 2019 (ISNIN)

SOALAN :

Datuk Zahidi bin Zainul Abidin [Padang Besar] minta MENTERI INDUSTRI UTAMA menyatakan :-

- (a) apakah langkah drastik yang diambil Kementerian bagi menangani stok minyak sawit yang berkurangan hasil daripada kejatuhan harga sawit sejak September 2018; dan
- (b) adakah dengan pengurangan keluaran minyak sawit dapat mengekalkan harga di pasaran, apakah kesan kepada pekebun sawit ketika stok minyak sawit dikurangkan yang sudah tentu jualan pekebun kepada peraih akan berkurangan dan terhad.

JAWAPAN (a)

Tuan Yang Di-Pertua,

Untuk makluman Ahli Yang Berhormat, stok minyak sawit negara telah meningkat ke paras 3.22 juta tan pada Disember 2018 dan keadaan ini telah menjelaskan harga sawit. Dalam hal ini, Kementerian telah dan akan melaksanakan beberapa mekanisme pengurusan bekalan minyak sawit dalam usaha untuk menstabilkan harga sawit antaranya:

SOALAN NO : 20

- (a) pelaksanaan Program Biodiesel B10 (adunan 10% biodiesel sawit dan 90% diesel petroleum) bagi sektor pengangkutan mulai 1 Februari 2019 dan B7 bagi sektor industri mulai 1 Julai 2019;
- (b) pelaksanaan Skim Pensijilan Minyak Sawit Mampan Malaysia (MSPO) secara mandatori pada Januari 2020 bagi membuka akses pasaran yang lebih luas untuk pasaran minyak sawit mampan Malaysia;
- (c) memperkuatkan pasaran eksport sedia ada serta meneroka pasaran baharu bagi produk-produk berasaskan sawit; dan
- (d) menjalankan penyelidikan dan pembangunan (R&D) dalam penghasilan produk-produk baru bernilai tambah tinggi.

JAWAPAN (b)

Tuan Yang Di-Pertua,

Untuk makluman Ahli Yang Berhormat, permintaan eksport yang kurang menggalakkan akan menyebabkan paras stok minyak sawit yang tinggi dan ini akan menjelaskan permintaan untuk pemprosesan buah tandan segar (BTS) atas faktor tempat simpanan yang terhad. Keadaan ini menyebabkan kejatuhan harga sawit dan memberi kesan kepada pengusaha tanaman sawit terutamanya pekebun kecil.

Sekiranya stok minyak sawit dapat dikurangkan melalui mekanisme pengurusan bekalan minyak sawit yang sedang dilaksanakan, harga sawit dijangkakan akan lebih stabil dan ini akan memberi kesan positif kepada pekebun kecil sawit dari segi jualan BTS mereka.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : YB PUAN HAJAH NATRAH BINTI ISMAIL
(SEKIJANG)

TARIKH : 18 MAC 2019 (ISNIN)

SOALAN NO. 21

Minta **MENTERI SUMBER MANUSIA** menyatakan jumlah terkini pekerja asing yang telah berdaftar di negara ini dan adakah Kerajaan berhasrat untuk mengurangkan kebergantungan negara kepada pekerja asing khususnya dalam sektor pekerjaan “3D” (*Dirty Dangerous and Difficult*).

PN-1412- L02957

JAWAPAN

Tuan Yang Di-Pertua,

1. Untuk makluman Ahli Yang Berhormat, berdasarkan statistik Jabatan Imigresen Malaysia sehingga 31 Januari 2019, jumlah pekerja asing yang berdaftar dan dikeluarkan Pas Lawatan Kerja Sementara (PLKS) adalah seramai 2,018,240 orang.

2. Kerajaan sememangnya telah dan sedang mengambil langkah-langkah berkaitan untuk mengurangkan kebergantungan negara kepada pekerja asing. Hanya jawatan-jawatan yang tidak dapat diisi oleh pekerja tempatan dalam sektor-sektor yang diluluskan sahaja dibenarkan untuk menggaji pekerja asing. Ini termasuklah melihat semula jenis-jenis pekerjaan bersifat 3D (*Dirty, Dangerous and Difficult*) yang lazimnya tidak diminati oleh rakyat tempatan dan kaedah bagaimana jenis pekerjaan ini boleh ditambah baik. Peranan majikan dalam hal ini adalah sangat signifikan untuk menarik lebih ramai pekerja tempatan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN HASSAN BIN ABDUL KARIM
[PASIR GUDANG]
TARIKH : 18 MAC 2019 (ISNIN)

SOALAN NO. 23

Y.B. TUAN HASSAN BIN ABDUL KARIM [PASIR GUDANG] minta **MENTERI KEWANGAN** menyatakan kenapakah firma Great Eastern dipilih untuk menyertai Skim Perlindungan Nasional B40 (mySalam). Tidakkah ini akan mewujudkan monopoli dan sekaligus membunuh syarikat insurans tempatan.

JAWAPAN

Yang di-Pertua,

1. Untuk makluman Yang Berhormat, pemegang saham asing *Great Eastern Life Assurance (Malaysia) Berhad* telah memilih untuk memberi sumbangan kepada skim MySalam sebagai penyelesaian alternatif kepada komitmen mereka bagi mengurangkan pegangan saham mereka kepada tahap tidak melebihi 70%. Pemegang saham asing lain yang perlu mematuhi syarat pelupusan saham asing juga diberi pilihan yang sama.
2. Semua syarikat insurans dan pengendali takaful di Malaysia dialu-alukan untuk menyertai skim ini selaras dengan inisiatif untuk memenuhi tanggungjawab sosial korporat dan menyokong matlamat pembangunan negara.

Yang di-Pertua,

1. Syarikat insurans dan pengendali takaful yang menyertai skim ini, termasuk *Great Eastern Takaful Berhad*, dikehendaki mematuhi prinsip berikut:-
 - Kecekapan kos - Perlindungan tersebut akan diunderait dan diuruskan pada harga kos, di mana keuntungan akan dikembalikan semula kepada skim ini;
 - Perkhidmatan dan jangkauan yang berkesan - Tahap standard perkhidmatan perlu dikekalkan dan usaha meningkatkan kesedaran yang memuaskan perlu dilaksanakan untuk penerima skim ini; dan
 - Pengurusan data skim - Segala undang-undang dan peraturan yang berkaitan dengan perlindungan dan kerahsiaan data, termasuk Akta Perlindungan Data Peribadi 2010 (*Personal Data Protection Act 2010*) perlu dipatuhi. Data yang dikumpul ialah kepunyaan skim ini.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : **Datuk Halimah binti Mohamed Sadique [Kota Tinggi]**

TARIKH : **18 MAC 2019**

SOALAN : **NO. 24**

Datuk Halimah binti Mohamed Sadique [Kota Tinggi] minta **PERDANA MENTERI** menyatakan apakah tindakan Kementerian bagi memastikan setiap keluarga Orang Asli mendapat rumah kediaman yang selesa dengan kemudahan infrastruktur dan prasarana serta setakat manakah penyertaan dan pulangan yang dinikmati oleh masyarakat Orang Asli dalam projek tanaman seperti kelapa sawit dan getah yang diusahakan oleh FELCRA dan RISDA.

JAWAPAN

Tuan Yang Dipertua,

Usaha menyediakan rumah kediaman yang selesa dengan kemudahan infrastruktur lengkap merupakan antara fokus dan komitmen JAKOA untuk meningkatkan kualiti dan kesejahteraan hidup masyarakat Orang Asli. Bantuan perumahan di perkampungan Orang Asli dilaksanakan melalui Program Perumahan Rakyat Termiskin (PPRT), Skim Pembangunan Kesejahteraan Rakyat (SPKR), di bawah peruntukan Kementerian Pembangunan Luar Bandar (KPLB) yang melibatkan bantuan bina baharu rumah dan baik pulih rumah sedia. Rumah yang dibina turut dilengkapi dengan kemudahan asas iaitu bekalan elektrik dan bekalan air namun pelaksanaan bantuan rumah adalah tertakluk kepada kelulusan peruntukan oleh KPLB.

**RUMUSAN PROGRAM PERUMAHAN SEPANJANG RMK-11 (2016-2018) OLEH
JAKOA**

TAHUN	BINA BARU	KOS (RM)	BAIK PULIH	KOS (RM)	JUMLAH
2016	531	21,240,000	311	3,421,000	24,661,000
2017	90	5,040,000	169	2,080,000	7,120,000
2018	70	3,920,000	180	2,340,000	6,260,000
JUMLAH	691	30,200,000	660	7,841,000	38,041,000

Tuan Yang Di-Pertua,

Dalam usaha melonjakkan pembangunan ekonomi yang berdaya maju kepada masyarakat Orang Asli, projek perladangan di bawah Program Tanam Semula Komersial (TSK) dengan kerjasama Pihak Berkuasa Pekebun Kecil Perusahaan Getah (RISDA) dan Rancangan Orang Asli (ROA) dengan kerjasama Lembaga Penyatuan dan Pemulihan Tanah Persekutuan (FELCRA) telah melaksanakan 204 projek berkeluasan keseluruhan 30,545.4 hektar sehingga Jan 2019 dengan pulangan faedah kepada 13,021 peserta Orang Asli yang menerima dividen sebanyak RM350 hingga RM1,000 sebulan bergantung kepada prestasi ladang dan harga komoditi. Selain itu, peserta juga diberikan peluang pekerjaan sebagai buruh ladang untuk menambah pendapatan. Sehingga kini juga, sebanyak 34 buah ladang telah diserahkan kepada peserta untuk diuruskan oleh peserta sendiri.

Untuk mengurangkan kebergantungan JAKOA terhadap agensi RISDA dan FELCRA di bawah skop perladangan, JAKOA juga telah memperluaskan Projek Ladang Masyarakat Orang Asli (PLMOA) yang diimplementasikan sebagai konsep perladangan dengan upah berinsentif (incentive wage concept) kepada masyarakat Orang asli di bawah B40. Selain daripada insentif, peserta akan dibekalkan dengan latihan secara teori dan praktikal mengenai tanaman komoditi dan mengusahakanya dengan sendiri.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 18 MAC 2019 (ISNIN)

SOALAN : 25

Tuan Cha Kee Chin [Rasah] minta MENTERI KOMUNIKASI DAN MULTIMEDIA menyatakan apakah hasil siasatan ke atas insiden TV1 yang tidak menyiaran secara langsung ucapan YAB Menteri Besar Negeri Sembilan dan YB Menteri Pengangkutan ketika Majlis Rumah Terbuka Malaysia Tahun Baru Cina anjuran Kementerian Pelancongan, Seni Dan Budaya di Dataran Centrio, Seremban pada 17 Februari 2019 yang lepas.

JAWAPAN

Tuan Yang Di-Pertua,

1. Untuk makluman Ahli Yang Berhormat, Kementerian Komunikasi dan Multimedia (KKMM) menerusi siasatan dan laporan yang diterima daripada Jabatan Penyiaran Malaysia (RTM) mendapati liputan siaran langsung TV1 ketika sambutan Tahun Baharu Cina peringkat kebangsaan di Seremban, Negeri Sembilan yang lalu adalah mematuhi prosedur operasi standard, SOP yang ditetapkan.
2. Pada tahun 2000 telah diputuskan sebanyak enam perayaan kaum atau agama diangkat sebagai perayaan utama negara. Ia dikenali sebagai Rumah Terbuka Malaysia dan diraikan di peringkat kebangsaan anjuran bersama kerajaan pusat dan kerajaan negeri.

3. Kerajaan melalui Kementerian Kebudayaan Kesenian dan Warisan dengan kerjasama kerajaan - kerajaan Negeri buat pertama kali telah mengadakan majlis rumah terbuka Malaysia Hari Raya Aidilfitri pada 6 Januari 2001 di Kuala Lumpur dengan dihadiri oleh Seri Paduka Baginda Yang Di-Pertuan Agong.
4. Bermula tahun 2013 Kementerian Pelancongan dan Seni Budaya telah menaja penerbitan siaran langsung Majlis Rumah Terbuka Malaysia. Melalui kaedah ini, Kementerian membeli membeli waktu siaran dan bersama-sama merancang kandungan siaran langsung tersebut. Pendekatan ini masih dilaksanakan di bawah kepimpinan kerajaan Malaysia baharu menerusi perbincangan dan kerjasama Kementerian Pelancongan, Seni dan Budaya Malaysia, MOTAC.
5. SOP RTM menyatakan dengan jelas bahawa apabila Perdana Menteri menghadiri sebuah majlis rasmi, maka hanya ucapan beliau yang akan disiarkan secara langsung melalui RTM.
6. Bagaimanapun masih ada ruang bagi pihak pengajur sesebuah acara untuk berbincang dengan RTM bagi membuat perubahan kepada perkara-perkara yang perlu disiarkan secara langsung di sesuatu acara. Ia termasuklah memberikan liputan secara langsung bagi individu lain, lebih daripada apa yang tertera dalam SOP, berdasarkan nilai berita bagi acara tersebut.
7. Sebagai kesimpulan apa yang dilakukan oleh RTM adalah bertepatan dengan apa yang telah diatur dengan pihak pengajur dan SOP yang terpakai untuk majlis sedemikian.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH SOALAN : 18 MAC 2019 (ISNIN)

SOALAN NO. 26

Minta **MENTERI PEMBANGUNAN USAHAWAN** menyatakan usaha yang dilakukan oleh Kementerian di dalam meningkatkan kepelbagaian produk halal keluaran usahawan Bumiputera bagi memenuhi permintaan terhadap produk tersebut yang semakin meningkat di dalam dan di luar negara.

JAWAPAN

Tuan Yang Dipertua,

1. Adalah menjadi tumpuan Kementerian Pembangunan Usahawan (MED) untuk meningkatkan kepelbagaian produk halal usahawan Bumiputera, melihat kepada potensi industri halal di mana jumlah keseluruhan eksport barang halal telah mencatatkan peningkatan dari RM26.2 bilion pada tahun 2010 kepada RM43.3 bilion pada tahun 2017. Bagi membantu usahawan Bumiputera, beberapa program telah dipergiatkan oleh MED, antaranya:

(a) Program Peningkatan Enterpris Bumiputera (BEEP)

Bertujuan meningkatkan daya saing PKS Bumiputera menerusi bantuan bersepadu yang meliputi persijilan halal, khidmat nasihat, latihan dan sokongan kewangan. Program ini dilaksanakan dengan kerjasama Kerajaan Negeri dan bantuan kewangan yang diberikan

NO. SOALAN: 26

adalah dalam bentuk geran bersamaan. Untuk tempoh 2014 sehingga 31 Januari 2019, sejumlah 1,995 kelulusan telah diberikan melibatkan geran berjumlah RM189 juta.

(b) Program Pementoran PKS

SME Corp dan Perbadanan Pembangunan Industri Halal (HDC) dengan kerjasama syarikat multinasional telah melaksanakan Program Pementoran PKS bertujuan untuk membangun, meningkat keupayaan dan menambah baik prestasi perniagaan PKS tempatan dalam industri makanan dan minuman Halal di Malaysia, bagi membolehkan mereka bersaing di pasaran global. Sehingga kini sebanyak 570 PKS telah menyertai dan mendapat manfaat daripada program ini.

(c) Program *Showcase Satu Daerah Satu Industri* (SDSI)

Di bawah MED, program SDSI kini lebih bersasar ke arah memasarkan produk halal PKS dan mikro PKS serta koperasi di peringkat daerah dan negeri ke pasaran yang lebih luas melalui sesi pemasaran perniagaan yang telah diadakan dengan syarikat peruncitan tempatan dan pasar raya besar. Dua siri SDSI telah dilaksanakan setakat ini iaitu SDSI Perak pada 19-20 Januari 2019 (jualan sebanyak RM4.4. juta) dan SDSI Terengganu (RM6.9 juta) pada 15-16 Februari 2019. Siri SDSI ini akan diteruskan ke negeri-negeri lain bagi membantu mempromosi produk-produk IKS di setiap negeri.

Tuan Yang diPertua,

2. Untuk membantu usahawan tempatan mengeksport produk dan perkhidmatan Halal ke luar negara, MED juga terus melaksanakan program seperti:

(a) Program Going Export (GoEx)

Melalui program ini, usahawan akan diberikan bimbingan kawalan mutu, rekabentuk dan penjenamaan yang memenuhi standard antarabangsa. Sejak 2014, 287 PKS telah menyertai program ini

dengan 40 pasaran baharu telah diteroka dan nilai potensi jualan eksport sebanyak RM503.8 juta.

(b) Program Galakan Eksport Bumiputera (GEB)

Bantuan geran bersamaan dan skim pinjaman mudah disediakan bagi membantu meningkatkan keupayaan eksport syarikat PKS Bumiputera serta menambah bilangan PKS Bumiputera yang mampu untuk menembusi pasaran global. Untuk tempoh 2016 sehingga Januari 2019, sejumlah 46 permohonan telah diluluskan dengan nilai geran dan pinjaman berjumlah RM44 juta.

(c) Ekspo Halal Malaysia 2019

Ekspo HALAL Malaysia 2019 telah diadakan buat julung kalinya pada 24 - 26 Januari 2019 khusus untuk meneroka pasaran Jepun sempena Sukan Olimpik Jepun 2020. Sepanjang tiga (3) hari acara ini berlangsung, sebanyak 223 Sesi Pemadanan Perniagaan telah direkodkan dengan 144 PKS telah mengambil bahagian yang menjana potensi jualan sebanyak RM135 juta.

3. Fokus MED juga ke arah pembangunan sumber bahan utama dalam penghasilan produk-produk halal bagi meningkatkan kepelbagaiannya produk halal usahawan Bumiputera. Antara langkah yang sedang diusahakan MED ialah untuk menghasilkan industri pembuatan gelatin halal di Malaysia dengan penglibatan sektor swasta. Perbincangan awal telah diadakan dengan Jabatan Kemajuan Islam Malaysia (JAKIM) dan beberapa negara pengekspor lembu terbesar bagi merealisasikan hasrat ini dengan kadar segera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 18 MAC 2019 (ISNIN)

SOALAN NO. 27

Minta **MENTERI HAL EHWAL EKONOMI** menyatakan adakah Kerajaan mengkaji semula Pendapatan Garis Kemiskinan (PGK) supaya PGK itu adalah lebih menggambarkan situasi terkini.

JAWAPAN

Yang di-Pertua,

1. Untuk makluman Ahli Yang Berhormat, Kerajaan kini dalam proses membuat kajian semula pengukuran Pendapatan Garis Kemiskinan (PGK) yang menggunakan PGK nasional iaitu RM980. Model PGK semasa ini dibuat kajian semula dengan mengambil kira corak penggunaan (*consumption pattern*) makanan dan bukan makanan serta keperluan dan demografi semasa isi rumah. Keperluan kalori semasa dalam komponan makanan bagi PGK rakyat Malaysia dinilai semula dan dikemaskini. Hasil kajian semula ini dijangka akan dijadikan input penting dalam merumus strategi pembasmian kemiskinan dalam Rancangan Malaysia Ke-12 (RMK-12) 2021-2025.
2. Agensi pemberi bantuan Kerajann telahpun mengguna pakai PGK mengikut negeri supaya bantuan dapat disampaikan kepada kumpulan sasar berdasarkan keperluan sebenar penerima faedah mengikut lokasi bermula pada tahun 2019.
3. Untuk pengukuran garis kemiskinan yang lebih inklusif selaras dengan amalan antarabangsa, Indeks Kemiskinan Pelbagai Dimensi (MPI) akan diguna sebagai pelengkap kepada PGK. Model MPI Malaysia bukan sahaja mengukur kemiskinan dari segi pendidikan, kesihatan dan taraf hidup tetapi juga dari segi pendapatan.

Sekian, terima kasih.

Kementerian Hal Ehwal Ekonomi
18 Mac 2019

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN ARTHUR JOSEPH KURUP
[Pensiangan]**

TARIKH : 18.3.2019 (ISNIN)

SOALAN NO. 28

Tuan Arthur Joseph Kurup [Pensiangan] minta **MENTERI PENDIDIKAN** menyatakan apakah status permohonan pembinaan Sekolah Menengah Kebangsaan Pagalungan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian dan keutamaan kepada pembangunan pendidikan di Sabah dan Sarawak khususnya di sekolah-sekolah yang memerlukan kerja-kerja pembaikan serta naik taraf kemudahan sekolah. Justeru, melalui inisiatif Pelan Pembagunan Pendidikan Malaysia (PPPM) 2013-2025, KPM dari semasa ke semasa mengenal pasti sekolah atau bangunan sekolah yang perlu dibaiki dan diselenggarakan bagi memastikan sekolah mempunyai kemudahan pendidikan yang sempurna.

Pembinaan SMK Pagalungan, Nabawan dicadangkan pembinaannya memandangkan jarak sekolah menengah terdekat adalah 100 kilometer. Namun demikian, status pembinaan sekolah tersebut masih dalam perancangan memandangkan tapak cadangan pembinaan sekolah tersebut masih dalam proses permohonan. Projek akan dimohon setelah permohonan tanah selesai dalam Rancangan Malaysia Ke-12.

Sekian, terima kasih.

**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : LISAN

TARIKH : 18.03.19

**DARIPADA : YB DATO' JOHARI BIN ABDUL
[SUNGAI PETANI]**

SOALAN

YB DATO' JOHARI BIN ABDUL [SUNGAI PETANI] minta **PERDANA MENTERI** menyatakan perkembangan terkini rundingan Projek Pembinaan Rangkaian Keretapi Timur (ECRL).

JAWAPAN

Tuan Yang di-Pertua dan Ahli Yang Berhormat,

Kerajaan masih dalam rundingan dengan kontraktor utama China Communications Construction Company (CCCC) bagi mengurangkan kos Projek Laluan Rel Pantai Timur (ECRL); yang bakal menentukan sama ada projek ini akan diteruskan atau sebaliknya.

Pada masa ini, semua kerja-kerja dan perkhidmatan berkaitan projek ECRL masih digantung oleh Malaysia Rail Link Sdn Bhd (MRL), syarikat khusus di bawah milik penuh Menteri Kewangan Diperbadankan semenjak notis penggantungan dikeluarkan pada 3hb Julai 2018.

Terima kasih

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : DATUK SERI DR. RONALD KIANDEE
[BELURAN]**

TARIKH : 18 MAC 2019

**SOALAN : Datuk Seri Dr. Ronald Kiandee
[Beluran]** minta **MENTERI LUAR NEGERI** menyatakan :-

- (a) apakah langkah-langkah terkini yang diambil oleh ASEAN untuk menangani masalah penindasan yang berlaku ke atas etnik minoriti Rohingya di Myanmar; dan
- (b) adakah Kerajaan akan mecadangkan kajian semula Dasar Tidak Campur Tangan ASEAN jika dasar ini menjadi penghalang kepada penyelesaian isu ini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Beluran di atas pertanyaan yang dikemukakan.

2. Di Sesi Pemukiman Menteri-menteri Luar ASEAN yang telah diadakan di Chiang Mai, Thailand pada Januari 2019 yang lalu, YB Menteri Luar Negeri dan rakan-rakan sejawatan ASEAN telah bersetuju supaya ASEAN diberikan peranan yang lebih (enhanced) dan yang dapat dilihat (visible) berkaitan dengan keadaan di Wilayah Rakhine, demi menyokong usaha-usaha Myanmar. Peranan ini meliputi isu-isu seperti bantuan kemanusiaan, sokongan untuk penghantaran balik golongan tersasar (displaced persons), dan bantuan pembangunan mampan di Wilayah Rakhine.

Tuan Yang di-Pertua,

3. Mengenai isu repatriasi, beberapa negara anggota ASEAN melihat bahawa tidak mungkin proses penghantaran balik akan berlaku dalam masa terdekat kerana kekurangan kepercayaan dan keyakinan oleh golongan tersasar itu sendiri. Usaha harus dilakukan oleh kedua-dua pihak iaitu Myanmar dan Bangladesh untuk memastikan kembalinya golongan tersasar ini adalah secara sukarela dan bermaruah.

4. Dalam hal ini, sesetengah negara anggota ASEAN berpendapat adalah lebih berguna jika Myanmar memanfaatkan peranan ASEAN dalam memperbaiki keadaan di Wilayah Rakhine, termasuk dengan mempromosikan langkah-langkah membina keyakinan dan/atau menyediakan bantuan pembangunan jangka panjang.

5. Sebahagian daripada langkah-langkah membina keyakinan ini termasuk golongan tersasar yang berpotensi untuk pulang melawat sendiri Wilayah Rakhine untuk melihat persiapan untuk penghantaran balik; serta lawatan oleh wakil-wakil komuniti di Wilayah Rakhineke Cox's Bazaar.

Tuan Yang di-Pertua,

6. Tentang isu kewarganegaraan, ASEAN mengalu-alukan usaha Myanmar untuk berkerjasama (engage) dengan Suruhanjaya Bebas Siasatan (Independent Commission of Enquiry) yang diketuai oleh Duta Besar Rosario Manalo. Malaysia berpendapat bahawa isu kewarganegaraan ini merupakan isu yang asas bagi penyelesaian jangka panjang yang perlu ditangani oleh Myanmar.

Tuan Yang di-Pertua,

7. Pada tahun 2017, ASEAN telah menghantar bantuan kemanusiaan melalui AHA Centre kepada golongan tersasar di Maungdaw, Myanmar. Pada November 2018, Kerajaan Myanmar telah menjemput ASEAN melalui AHA Centre untuk menghantar Pasukan Penilaian Keperluan (Needs Assessment Team) bagi mengenal pasti keperluan dan bidang kerjasama di Wilayah Rakhine. Negara-negara ASEAN memberi sokongan kepada misi penilaian keperluan ini dan berharap supaya ia dapat dijalankan sebaik sahaja keadaan keselamatan membenarkan.

Tuan Yang di-Pertua,

8. Pendirian Malaysia adalah jelas bahawa kita menggesa Kerajaan Myanmar untuk mencapai penyelesaian dengan segera dan mapan kepada isu etnik Rohingya di Myanmar demi kepentingan keselamatan dan kestabilan rantau ini. Seperti yang pernah kita sebutkan dalam Dewan yang mulia ini, ada tiga perkara yang melibatkan isu Rohingya. Pertama, ialah soal kerakyatan, kewarganegaraan bagi orang Rohingnya di Myanmar. Selaras dengan itu, ialah membawa penjenayah-penjenayah ke muka pengadilan. Kedua, penghantaran pulang (repatriation) orang Rohingya dari Bangladesh ke Myanmar. Ketiga, ialah bagaimana kita boleh meningkatkan bantuan-bantuan kemanusiaan yang diberikan oleh kerajaan dan rakyat Malaysia kepada etnik Rohingya sama ada di dalam negara kita sendiri ataupun melalui contohnya, hospital medan yang diuruskan oleh MINDEF di Cox's Bazar, Bangladesh.

9. Ini akan kita teruskan, misalnya, hospital medan di Cox's Bazar, Kabinet telah membuat keputusan hospital ini akan diteruskan sehingga bulan Disember 2019. Di peringkat antarabangsa, kita terus mengetengahkan isu Rohingya sama ada kerangka ASEAN dalam OIC dan juga di PBB.

Tuan Yang di-Pertua,

10. Bagi memastikan persahabatan dan kerjasama yang berterusan, ASEAN mengamalkan prinsip tidak campur tangan dalam hal ehwal dalaman dan menghormati kedaulatan Negara-negara Anggotanya seperti yang termaktub di dalam Piagam ASEAN. Piagam ASEAN turut memperuntukkan dengan jelas bahawa ASEAN dan Negara Anggotanya hendaklah menghormati hak setiap Negara Anggotanya untuk memerintah dan mentadbir negaranya sendiri bebas daripada campur tangan luar, perbuatan subversif dan paksaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 18 MAC 2019 (ISNIN)

SOALAN NO : 31

Minta **PERDANA MENTERI** menyatakan perancangan pelan perpaduan rakyat oleh Kementerian dalam masa 5 tahun akan datang.

JAWAPAN

Yang Di Pertua,

Jabatan Perpaduan Negara dan Integrasi Nasional (PERPADUAN) dari masa ke semasa sentiasa merancang inisiatif dan strategi tertentu melalui pelan tindakan perpaduan bagi terus memelihara dan mengekalkan keharmonian antara masyarakat berbilang kaum di negara ini. Antara inisiatif dan strategi yang telah dirancangkan adalah seperti berikut:-

- a) Menjenamakan semula Majlis Konsultasi Perpaduan Negara (MKPN) kepada Majlis Perundingan Keharmonian Rakyat (MPKR) di mana ianya akan menjadi satu platform ke arah penyatuan nasional (*national reconciliation*) bagi mengurangkan polarisasi kaum dan membina bangsa Malaysia yang bersatu padu. Penubuhannya adalah untuk membincangkan isu-isu sukar dalam kalangan masyarakat Malaysia yang kompleks serta merintis jalan penyelesaian ke arah merapatkan jurang yang menghalang perpaduan. Selain itu, Majlis ini akan berperanan mewujudkan kesedaran dan memupuk nilai-nilai murni dalam kalangan rakyat Malaysia agar bersikap moderat bagi mengelakkan perpecahan antara kaum dan agama.

Langkah ini adalah selaras dengan aspirasi dan hasrat kerajaan baharu untuk mewujudkan urus tadbir negara yang baik, progresif dan inklusif ke arah menjamin kesejahteraan hidup seluruh rakyat negara ini tanpa mengira latar belakang kaum, bangsa dan agama;

- b) Cadangan penubuhan Suruhanjaya Keharmonian dan Rekonsiliasi Nasional (*National Harmony Reconciliation Commission*) bagi menangani isu-isu sensitif yang timbul akibat kesalahfahaman antara masyarakat Malaysia yang terdiri dari pelbagai kaum, etnik, agama, keturunan dan budaya. Penubuhan suruhanjaya ini dapat mengatasi isu dan sentimen perkauman yang cuba dimanipulasikan oleh pihak-pihak tertentu bagi kepentingan sendiri bagi memecahbelahkan rakyat;
- c) Pembangunan Instumen Indeks Perpaduan Nasional sebagai suatu model struktur yang komprehensif di peringkat nasional untuk mengukur dan memantau tahap pencapaian perpaduan di Malaysia secara saintifik dan sistematik menggunakan data empirikal yang diperolehi daripada masyarakat Malaysia. Indeks ini dibina berdasarkan beberapa konstruk tertentu yang meliputi seperti tahap keetnikan, hubungan sosial rentas etnik, etos bangsa, tadbir urus dan pembangunan, kesepadan sosial dan lain-lain lagi yang akan menjadi kayu pengukur kepada tahap perpaduan negara ini. Indeks ini akan menjadi alat pemantauan peringkat nasional yang dapat memperlihatkan keperluan program intervensi sebenar oleh Kerajaan kepada masyarakat berdasarkan isu-isu semasa yang berlaku kerana nilai indeks yang diukur akan menjadi satu petunjuk sebenar pencapaian tahap perpaduan di Malaysia kelak;
- d) Menjadikan kaedah mediasi komuniti sebagai usaha berterusan untuk menangani pertikaian, pertelingkahan dan persengketaan dalam komuniti setempat yang terdiri dari penghuni yang berbilang kaum dan agama dengan meningkatkan bilangan mediator komuniti yang terlatih di seluruh negara. Dengan cara ini, konflik yang wujud di peringkat akar umbi dapat ditangani dengan lebih berkesan sebelum ianya menular menjadi lebih besar dan mencetuskan pergaduhan, serangan ataupun rusuhan kaum;

e) Pemerkasaan Jabatan Perpaduan Negara dan Integrasi Nasional melalui langkah meremajakan agen-agen perpaduan di peringkat akar umbi agar mereka dapat berkhidmat kepada komuniti tanpa sebarang prejedis dan prasangka sesama mereka agar selari dengan usaha kerajaan bagi melahirkan bangsa Malaysia yang berdikari, inovatif dan kreatif. Selain itu, Jabatan juga telah membuat anjakan paradigma dengan mengadakan kerjasama dan kolaborasi strategik dengan pelbagai pertubuhan, badan bukan kerajaan (NGO), kelab dan sektor swasta, institusi pengajian tinggi bagi memastikan mereka dapat menyumbang dengan melakukan usaha-usaha mempromosikan perpaduan sebagai memenuhi sebahagian daripada tanggungjawab sosial mereka melalui pelaksanaan pelbagai program seperti dialog antara penganut agama, larian perpaduan, pemberian pengiktirafan terhadap ikon-ikon perpaduan, hari toleransi, anugerah Rukun Tetatangga, MyHero Awards;

f) Jabatan Perpaduan Negara dan Integrasi Nasional juga komited dalam terus menerajui pendidikan perpaduan memandangkan inisiatif-inisiatif pemupukan perpaduan bermula di peringkat pra-sekolah lagi. Jabatan bercadang meningkatkan kualiti guru-guru di Tabika dan Taska Perpaduan melalui latihan yang lebih komprehensif agar mereka dapat mendidik anak-anak kecil sejak di bangku sekolah lagi untuk menghargai perpaduan yang merupakan hadiah yang tidak ternilai terutamanya di negara ini yang masyarakatnya terdiri dari pelbagai keturunan kaum, agama dan budaya. Ini kerana sekiranya anak-anak dipupuk dengan pengamalan nilai-nilai murni sejak kecil seperti sikap saling hormat-menghormati, bekerjasama, bertoleransi, bersifat patriotik dan menghargai kepelbagaian masyarakat yang wujud di Malaysia, nescaya sentimen-sentimen perkauman tidak lagi akan menggugat generasi akan datang dan mereka tidak mudah terpengaruh dengan berita-berita yang diviralkan dan anasir-anasir yang jahat;

g) Meneruskan pelaksanaan program-program sedia ada seperti Program Sayangi Komuniti (PSK) yang telah disasarkan untuk dilaksanakan di 456 lokasi miskin bandar dan pinggir bandar (B40) bagi meningkatkan keharmonian masyarakat setempat agar mereka

hidup dengan selamat, aman dan sejahtera. Pelaksanaan PSK telah mencapai sasaran sebanyak 103 lokasi sehingga tahun 2018 dan akan diteruskan di 49 lokasi baru yang disasarkan pada tahun 2019 dan 48 lokasi baru pada tahun 2020 bagi membolehkan PERPADUAN melaksanakan pelbagai aktiviti dan program bersama penduduk melalui kerjasama strategik dengan pelbagai agensi dan badan bukan kerajaan (NGO) bagi membendung, menangani dan menyelesaikan isu/masalah yang dihadapi oleh penduduk sebagai salah satu usaha untuk mengintegrasikan masyarakat pelbagai kaum di kawasan ini agar dapat terus memelihara perpaduan negara dan kesejahteraan sosial; dan

h) Pelaksanaan Program Latihan Industri Perpaduan (PLIP) turut diteruskan kerana ia merupakan salah satu platform untuk mengintegrasikan golongan muda melalui program *internship* di syarikat-syarikat swasta dan *Government Linked Companies* (GLCs) sebagai usaha untuk menggalakkan perkongsian silang kerjaya dan budaya antara golongan mahasiswa universiti yang terdiri dari pelbagai kaum dan latarbelakang keturunan. Bermula dari 2015 hingga 2018, seramai 5,218 orang pelajar telah menyertai program ini.

PERPADUAN telah merancang untuk melipatgandakan pelbagai usaha untuk membentuk masyarakat yang lebih bersatu-padu dan berintegrasi di negara ini, namun usaha-usaha tersebut tidak dapat dilaksanakan tanpa kerjasama semua pihak kerana usaha memelihara perpaduan bukanlah tanggungjawab kerajaan semata-mata tetapi tanggungjawab bersama semua lapisan masyarakat di negara ini.

Sekian, terima kasih.

**DEWAN RAKYAT
PEMBERITAHUAN PERTANYAAN
MESYUARAT PERTAMA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

TARIKH : 18 MAC 2019 (ISNIN)

**DARIPADA : Dato' Seri Dr. Ahmad Zahid bin Hamidi
[Bagan Datuk]**

SOALAN : 32

Dato' Seri Dr. Ahmad Zahid bin Hamidi [Bagan Datuk] minta **PERDANA MENTERI** menyatakan apakah pendirian terkini Kerajaan berkenaan Akta Anti Berita Tidak Benar 2018, adakah Kerajaan masih ingin menghapuskan akta ini ataupun mengekalkannya.

**JAWAPAN: YB DATUK LIEW VUI KEONG
MENTERI DI JABATAN PERDANA MENTERI**

Tuan Yang di-Pertua,

1. Seperti mana Ahli Yang Berhormat sedia maklum, Rang Undang-undang Antiberita Tidak Benar (Pemansuhan) telah ditolak di Dewan Negara. Dalam hal penolakan ini, Fasal (2) Perkara 68 Perlembagaan Persekutuan memperuntukkan Rang Undang-Undang Antiberita Tidak Benar (Pemansuhan) 2018 tersebut perlu dibentangkan semula di Dewan Rakyat dan diluluskan sekali lagi oleh Dewan Rakyat.

2. Proses ini tidak boleh dimulakan lebih awal dan hanya boleh dimulakan setahun selepas Rang Undang-Undang Antiberita Tidak Benar (Pemansuhan) 2018 mula-mula diluluskan oleh Dewan Rakyat. Rang

NO. SOALAN: 32

Undang-Undang Antiberita Tidak Benar (Pemansuhan) 2018 telah diluluskan di Dewan Rakyat pada 16 Ogos 2018 justeru proses ini hanya boleh dimulakan selepas 16 Ogos 2019.

3. Selepas Rang Undang-Undang Antiberita Tidak Benar (Pemansuhan) 2018 dibentangkan semula di Dewan Negara, sama ada Rang Undang-Undang Antiberita Tidak Benar (Pemansuhan) 2018 diluluskan ataupun tidak oleh Dewan Negara, Rang Undang-Undang Antiberita Tidak Benar (Pemansuhan) 2018 hendaklah dikemukakan kepada Yang di-Pertuan Agong untuk diperkenankan olehnya untuk menjadi suatu undang-undang sepetimana yang termaktub dalam Fasal (2) Perkara 68 Perlembagaan Persekutuan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 18.3.2019 (ISNIN)

SOALAN NO. 33

Tuan Wong Ling Biu [Sarikei] minta **MENTERI PENDIDIKAN** menyatakan adakah kita akan dapat mencapai sasaran 90% tenaga guru mengajar di Sarawak adalah anak jati Sarawak menjelang tahun 2020. Berapa ramaikah anak jati Sarawak yang telah memohon untuk berpindah balik ke Sarawak dalam tempoh 5 tahun yang lalu dan berapa ramaikah yang telah berjaya.

JAWAPAN

Tuan Yang di-Pertua,

Kementerian Pendidikan Malaysia (KPM) sedang berusaha untuk mencapai sasaran 90 peratus tenaga guru mengajar di Sarawak adalah anak jati Sarawak menjelang tahun 2020. Sehingga 26 Februari 2019, terdapat seramai 41,549 guru yang sedang berkhidmat di Sarawak. Daripada jumlah tersebut sebanyak 87 peratus (36,026) merupakan guru kelahiran Sarawak manakala 13 peratus (5,624) adalah guru bukan kelahiran Sarawak.

KPM ingin memaklumkan bahawa dalam tempoh lima (5) tahun bermula 2015 hingga 2019, sebanyak 841 permohonan anak jati Sarawak yang memohon ke Sarawak telah berjaya dilaksanakan. Bagi tahun 2015 hingga 2019, permohonan anak jati Sarawak yang memohon ke Sarawak yang telah diluluskan masing-masing adalah sebanyak 177 (Tahun 2015), 198 (tahun 2016), 201 (tahun 2017), 129 (tahun 2018), dan 136 (tahun 2019).

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : **JAWAB LISAN**

DARIPADA : **DATO' SRI REEZAL MERICAN BIN NAINA MERICAN [KEPALA BATAS]**

TARIKH : **18 MAC 2019**

SOALAN : **Dato' Sri Reezal Merican bin Naina Merican [Kepala Batas]** minta **MENTERI LUAR NEGERI** menyatakan mengenai komitmen Kerajaan dalam gerakan BDS (Boycott, Divestment & Sanctions) terhadap Israel. Apakah ada usaha libat urus (engagement) dilakukan bersama NGO seperti BDS Malaysia; dan apa jalan hadapan yang wajar buat Malaysia dalam konteks BDS ini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Kepala Batas atas pertanyaan yang dikemukakan.

Tuan Yang di-Pertua,

2. Seperti mana Dewan yang mulia ini sedia maklum, Dasar Luar Negara Malaysia sejak dahulu lagi adalah tidak menjalin hubungan diplomatik dengan Israel. Secara dasarnya juga, Kerajaan Malaysia tidak menjalin sebarang hubungan ekonomi secara rasmi dengan Israel.

3. Malaysia adalah sebuah negara yang menitikberatkan prinsip-prinsip kemanusiaan dan kita amat prihatin terhadap penderitaan rakyat Palestin. Malaysia secara konsisten menentang dan mengutuk dengan sekeras-kerasnya apa juu tindakan tidak berperikemanusiaan Israel

terhadap rakyat Palestin di Gaza sama ada dari sekatan ekonomi atau tindakan kententeraan dan pencabulan rejim tersebut.

4. Sejajar dengan dasar tersebut dan ditunjangi prinsip kemanusiaan dan keamanan dunia, Kerajaan Malaysia menyokong seruan dan gesaan komuniti antarabangsa dalam mendesak agar kekejaman dan penindasan ke atas rakyat Palestin di Gaza dihentikan serta merta. Malaysia juga adalah sebuah negara yang menitikberatkan prinsip-prinsip kemanusiaan dan amat prihatin terhadap penderitaan rakyat Palestin. Status ini tidak pernah berubah dan masih kekal.

Tuan Yang di-Pertua,

5. Gerakan untuk memboikot barang dari Israel dipelopori oleh badan-badan bukan Kerajaan (NGO) tempatan serta rakyat Malaysia sendiri yang berasa terpanggil untuk menunjukkan solidariti mereka terhadap rakyat Palestin dengan memboikot barang buatan serta syarikat-syarikat yang dikaitan dengan Israel. Gerakkan akar umbi ini termasuklah dengan usaha Kerajaan Malaysia membuktikan sokongan kuat Malaysia untuk rakyat Palestin mencapai aspirasi mereka.

6. Malaysia Baharu telah membawakan satu wadah yang segar dan lebih terbuka di mana usaha libat urus (engagement) bersama NGO bukanlah satu perkara yang luar biasa. Ini dapat dilihat dengan penubuhan Majlis Perundingan Mengenai Dasar Luar Negeri oleh Kementerian Luar Negeri yang melibatkan bukan sahaja pegawai-pegawai Kerajaan, tetapi juga wakil-wakil dari Badan Bukan Kerajaan, ahli akademik, badan pemikir, pakar sesuatu bidang, badan profesional, badan perniagaan dan sebagainya.

7. Di sini kita dapat lihat bahawa kewujudan amalan tersebut sama sekali tidak menjaskan pendirian dan ketegasan Kerajaan Malaysia dalam hal ini. Justeru, Kerajaan akan terus memperhalusi amalan penglibatan Badan Bukan Kerajaan dalam perkara-perkara yang tertentu.

Sekian, terima kasih.

**MESYUARAT PERTAMA, PENGGAL KEDUA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN
DARIPADA : YB DATO' SRI MUSTAPA BIN MOHAMED
KAWASAN : JELI
TARIKH : 18 MAC 2019 (ISNIN)

SOALAN :

YB DATO' SRI MUSTAPA BIN MOHAMED minta **MENTERI KERJA RAYA** menyatakan tindakan yang diambil Kerajaan untuk mengurangkan kemalangan di sepanjang FT 004, Jalan Gerik-Jeli, khususnya Seksyen 206, Batu 14 yang merupakan kawasan berisiko tinggi kemalangan.

JAWAPAN :

Tuan Yang Di-Pertua,

Untuk makluman Ahli Yang Berhormat, pihak Kementerian Kerja Raya amat prihatin dan sentiasa komited bagi memastikan semua pengguna jalan raya berada dalam keadaan selamat dan selesa. Antara faktor-faktor utama kemalangan yang sering berlaku ialah faktor manusia, kenderaan dan kejuruteraan jalan.

Bagi jalan yang dimaksudkan oleh Yang Berhormat, iaitu Jalan Persekutuan FT004, Jalan Gerik – Jeli (Lebuhraya Timur Barat), Seksyen 206.00, Kementerian Kerja Raya (KKR) telah mengambil maklum berhubung kekerapan berlakunya kemalangan jalan raya di kawasan ini.

Tuan Yang Di Pertua, dalam usaha untuk mengurangkan kadar kemalangan jalan raya di kawasan Yang Berhormat dan juga di kawasan – kawasan lain yang telah dikenalpasti sebagai kawasan kerap berlaku kemalangan, setiap tahun Kementerian Kerja Raya melaksanakan Program Keselamatan Jalan Raya bagi merawat lokasi kerap berlaku kemalangan di seluruh negara. Pihak Kementerian bersama dengan Jabatan Kerja Raya (JKR) melaksanakan pembaikan di lokasi kerap berlaku kemalangan ini.

Bagi Tahun 2019, sebanyak 56 lokasi kerap berlaku kemalangan telah dikenalpasti di seluruh negara bagi rawatan yang bersesuaian dengan peruntukan sebanyak RM19.7 juta. Untuk makluman Ahli Yang Berhormat, lokasi di Jalan Persekutuan FT004, Jalan Gerik – Jeli (Lebuhraya Timur Barat), Seksyen 206.00 yang dibangkitkan oleh Yang Berhormat turut tersenarai dalam pelaksanaan pada tahun 2019. Kementerian ini secara berterusan sentiasa komited dalam memastikan semua jalan persekutuan sentiasa dalam keadaan selamat dan selesa untuk digunakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 18.3.2019 (ISNIN)

SOALAN NO. 36

Datuk Seri Panglima Madius Tangau [Tuaran] minta MENTERI PENDIDIKAN menyatakan :-

- a) apakah ada perancangan Kementerian untuk mewujudkan lagi universiti awam dan universiti swasta di Sabah; dan
- b) apakah status terkini pembinaan SMK Pekan Nabalu, Tuaran

JAWAPAN

Tuan Yang di-Pertua,

(a) Untuk makluman Ahli Yang Berhormat, Kementerian Pendidikan Malaysia (KPM) tidak bercadang untuk menambah bilangan Universiti Awam (UA) pada masa ini memandangkan jumlah 20 UA sedia ada ini adalah mencukupi. Merujuk kepada Institusi Pendidikan Tinggi Swasta (IPTS) pula, sehingga 31 Januari 2019 terdapat sebanyak 24 buah IPTS di Sabah. Oleh kerana pihak Kementerian telah pun melaksanakan moratorium ke atas penubuhan IPTS baharu sehingga 31 Disember 2020, tiada IPTS baharu yang diluluskan penubuhannya buat masa ini.

Pelaksanaan moratorium penubuhan IPTS bertujuan untuk melestarikan perkhidmatan IPTS terutama dari segi kewangan dan melahirkan IPTS yang lebih kompetitif. Pelaksanaan moratorium ini juga dapat

NO. SOALAN: 36

memfokuskan pelaksanaan rasionalisasi dan konsolidasi sektor pendidikan swasta melalui kaedah penggabungan dan pemerolehan, kolaborasi atau penstrukturran semula IPTS. Dalam hal ini, kelestarian pembangunan IPTS dan meningkatkan kualiti program yang ditawarkan disamping memastikan graduan yang dilahirkan adalah memenuhi keperluan masa depan.

(b) Untuk makluman Ahli Yang Berhormat, pembinaan SMK Nabalu telah ditamatkan pada tahun 2015 atas nasihat Jabatan Mineral dan Geosains disebabkan tapak tidak sesuai dan tidak selamat kerana berada di dalam kawasan lingkaran gempa bumi.

Sebagai ganti, Kementerian telah mengenal pasti tapak cadangan di Kampung Giok dan masih dalam proses pengambilalihan tanah. Proses ini dijangka selesai akhir 2019. Oleh yang demikian, KPM akan memohon projek pembinaan sekolah ganti dalam Rancangan Malaysia Ke-12.

Sekian, terima kasih

RJM 31

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK SERI M. SARAVANAN [TAPAH]

TARIKH : 18 MAC 2019 (ISNIN)

SOALAN NO. 37

Minta **MENTERI PERTANIAN DAN INDUSTRI ASAS TANI** menyatakan apakah pihak Kementerian akan meneruskan usaha Kerajaan terdahulu dalam membuka pintu dan inisiatif bagi memecahkan kartel import daging yang sudah dikuasai berpuluh-puluh tahun oleh beberapa syarikat sahaja. Contohnya mewujudkan kerjasama antara syarikat milik Kerajaan (GLC) dan pengimport sederhana dan kecil di Malaysia serta menubuhkan konsortium yang mana GLC menjadi peneraju utama dalam perkara tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Asas Tani telah mengambil langkah untuk meliberalisasikan pengimportan daging.

Mulai 28 Januari 2016 dasar pengimportan ini adalah terbuka kepada syarikat yang berkelayakan dan pengimport hanya dibenarkan dari loji-loji yang telah diluluskan oleh Kementerian melalui Jabatan Perkhidmatan Veterinar dan status ancaman penyakit berkaitan ternakan di negara sumber.

Pemain industri yang berhasrat untuk mengimport daging perlu memohon kelulusan mengimport produk haiwan melalui Jabatan Perkhidmatan Veterinar. Antara syarat asas permohonan kelulusan pengimportan adalah pengimport mestilah mempunyai premis penyimpanan produk haiwan, mempunyai maklumat pengeksport yang lengkap dan mempunyai senarai pembeli atau pengedar produk haiwan yang diimport tersebut.

Kementerian mengalu-alukan jika terdapat cadangan dari pihak syarikat berkaitan Kerajaan (GLC) untuk bertindak sebagai peneraju utama dalam penubuhan konsortium pengimport daging dengan kerjasama syarikat-syarikat pengimport sederhana dan kecil di Malaysia.

Kementerian boleh bertindak sebagai pemudah cara dalam konteks pelaksanaan dasar pengimportan semasa namun mekanisme kerjasama antara pihak swasta / syarikat / GLC yang bakal terlibat adalah inisiatif swasta (*private driven*) dan *commercial decision*. Pihak Kementerian tidak akan campur tangan dalam sebarang urus niaga yang bakal berlangsung.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 18.3.2019 (ISNIN)

SOALAN NO. 38

Tuan Shaharizukirnain bin Abd. Kadir [Setiu] minta **MENTERI PENDIDIKAN** menyatakan langkah-langkah yang telah diambil bagi mengetatkan undang-undang dan mengelakkan kes penipuan sijil pengajian daripada berleluasa.

JAWAPAN

Tuan Yang di-Pertua,

Untuk makluman Ahli Yang Berhormat, bagi mengekang penularan kes-kes kelulusan akademik palsu yang semakin menjadi-jadi ketika ini, Kementerian telah mengambil pelbagai inisiatif yang mencakupi langkah-langkah pemantauan dan pencegahan serta tindakan bersifat punitif sekiranya mempunyai keterlibatan institusi pendidikan tinggi swasta (IPTS).

Antara langkah-langkah yang diambil ialah bekerjasama dengan Suruhanjaya Komunikasi dan Multimedia Malaysia (SKMM) bagi menyekat akses ke laman-laman sesawang yang disyak menawarkan atau menjual sijil palsu, perkongsian maklumat dan risikan dengan agensi penguatkuasaan lain, memberi penerangan dari semasa ke semasa kepada masyarakat untuk meningkatkan kesedaran, semakan status

SOALAN NO: 38

program melalui *Malaysia Qualification Agensi* (MQA) atau menggalakkan penggunaan teknologi dan ciri keselamatan terkini bagi menjamin ketulenan sijil dan lain-lain lagi.

Dalam konteks pengurusan pendidikan tinggi swasta pula, pihak Kementerian sentiasa menjalankan pemantauan dan penguatkuasaan ke atas IPTS bagi memastikan IPTS sentiasa mematuhi akta dan peraturan di bawah Akta 555 (Akta IPTS 1996). Bagi kes-kes pemalsuan ijazah yang pernah dilaporkan, ianya disiasat oleh pihak Polis DiRaja Malaysia (PDRM) di bawah Seksyen 465 Kanun Keseksaan.

Sekian, terima kasih.

RJM 32

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WONG KAH WOH
[IPOH TIMUR]
TARIKH : 18 MAC 2019 (ISNIN)

SOALAN NO. 39

Y.B. TUAN WONG KAH WOH [IPOH TIMUR] minta **MENTERI KEWANGAN** menyatakan jumlah RPGT yang telah dikutip untuk pelupusan hartanah melebihi 5 tahun sejak pelaksanaannya pada 1 Januari 2019 sehingga sekarang. Sama ada Kerajaan mempunyai hasrat untuk mempertimbangkan semula polisi pada masa hadapan memandangkan tujuan asal RPGT adalah untuk menyekat spekulasi hartanah.

JAWAPAN

Tuan Yang di-Pertua,

Untuk maklumat Ahli Yang Berhormat, Kerajaan dalam Belanjawan 2019 telah menaikkan kadar CKHT bagi pelupusan hartanah dan saham dalam syarikat hartanah yang dibuat dalam tahun ke-6 dan tahun seterusnya seperti berikut:

- i. Bagi syarikat dan individu bukan warganegara, kadar CKHT dinaikkan daripada 5% kepada 10%; dan
- ii. Bagi individu warganegara Malaysia dan pemastautin tetap, kadar CKHT dinaikkan daripada 0% kepada 5%.

Setakat 5 Mac 2019, Kerajaan telah mengutip CKHT sebanyak RM813,400.27 bagi pelupusan hartanah untuk tempoh pegangan melebihi 5 tahun. Pecahan kutipan CKHT ini mengikut kategori adalah seperti berikut:

Kategori pelupus	Bilangan pelupusan	Nilai CKHT (RM)
Syarikat	4	709,788.60
Individu warganegara dan pemastautin tetap	17	103,611.67
Jumlah	21	813,400.27

Pasa masa ini, Kerajaan tidak bercadang untuk mengkaji semula langkah kenaikan kadar CKHT kerana ia baru sahaja dilaksanakan.

**MESYUARAT PERTAMA, PENGGAL KEDUA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN
DARIPADA : YB DATO' TUAN IBRAHIM BIN TUAN MAN
KAWASAN : KUBANG KERIAN
TARIKH : 18 MAC 2019 (ISNIN)

SOALAN :

YB DATO' TUAN IBRAHIM BIN TUAN MAN minta **MENTERI KERJA RAYA** menyatakan bilakah Kerajaan akan menghapuskan Tol Gombak yang merupakan faktor utama kesesakan lalu lintas pada setiap kali musim perayaan.

JAWAPAN :

Tuan Yang Di-Pertua,

Untuk makluman Ahli Yang Berhormat, Kerajaan sentiasa berusaha sebaik mungkin bagi memenuhi janji-janji dalam buku Pakatan Harapan dan ini termasuklah cadangan menghapuskan tol lebuh raya di negara ini. Namun begitu, Kerajaan mengakui cadangan itu bukanlah sesuatu yang mudah untuk dilaksanakan, khususnya akibat dari tekanan kewangan semasa yang sedang dihadapi Kerajaan.

Untuk makluman Ahli Yang Berhormat, Kerajaan telah meneliti dan mengambil kira secara mendalam pelbagai faktor serta implikasi yang mungkin akan timbul akibat dari cadangan penghapusan tol lebuh raya di negara ini. Sehubungan itu, Kerajaan bersetuju untuk menangguhkan dahulu cadangan penghapusan tol termasuklah tol Gombak, Lebuhraya Kuala Lumpur-Karak sehingga keadaan ekonomi negara benar-benar stabil dan mengizinkan.

Dalam masa yang sama, Kementerian Kerja Raya telah melantik juru perunding audit bebas bertauliah pada 28 Januari 2019 bagi membantu Kerajaan menganalisa data dan cadangan berkenaan. Ini termasuklah mengemukakan cadangan mengurangkan beban tol secara jangka pendek, jangka sederhana dan jangka panjang. Hasil kajian dijangka akan dibentangkan untuk pertimbangan dan persetujuan Jemaah Menteri pada bulan Mei 2019 nanti.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
**DARIPADA : Y.B. DATO' SERI HAJI MUKHRIZ BIN TUN DR.
MAHATHIR**
[JERLUN]
TARIKH : 18 MAC 2019 (ISNIN)

SOALAN NO. 41

Y.B. DATO' SERI HAJI MUKHRIZ BIN TUN DR. MAHATHIR [JERLUN] minta **MENTERI KEWANGAN** menyatakan perancangan Kerajaan untuk membangunkan kawasan sempadan di Kedah, selain Zon Ekonomi Bebas Bukit Kayu Hitam, dalam usaha menggalakkan pertumbuhan ekonomi setempat.

JAWAPAN

Tuan Yang di-Pertua,

Untuk maklumat Ahli Yang Berhormat, Pihak Berkuasa Pelaksanaan Koridor Utara (NCIA) berperanan sebagai pihak berkuasa yang bertanggungjawab untuk menyediakan hala tuju, merangka dasar dan strategi untuk menggalakkan dan mempercepatkan pembangunan di Wilayah Ekonomi Koridor Utara (NCER), yang terdiri daripada empat buah negeri iaitu Perlis, Perak, Kedah dan Pulau Pinang. Terdapat pelbagai inisiatif yang dilaksanakan oleh Kerajaan Persekutuan melalui NCIA dengan kerjasama Kerajaan Negeri Kedah yang telah menyumbang secara signifikan terhadap pembangunan di negeri tersebut dan NCER. Peranan NCIA untuk menarik pelabur ke negeri Kedah melalui insentif cukai khas bertindak sebagai faktor pemangkin di dalam pertumbuhan pelbagai jenis industri yang berjaya mewujudkan peluang pekerjaan berkemahiran tinggi, meningkatkan kualiti kehidupan dan memberi kesan limpahan yang lain untuk masyarakat setempat.

Untuk makluman Ahli Yang Berhormat, Pihak Kerajaan melalui NCIA telah mengambil beberapa langkah untuk merancang dan memacu pembangunan ekonomi di kawasan-kawasan sempadan negeri dengan mengambil kira pendekatan ekonomi agglomerasi (*agglomeration economies*) yang akan memberi penumpuan kepada kawasan yang berpotensi tinggi berdasarkan fungsi sempadan ekonomi (*functional economic boundary*). Bagi tujuan ini, satu kajian Border Economic Transformation Programme (BETP) telah dijalankan oleh NCIA dengan kerjasama East Coast Economic Region Development Council (ECERDC). Hasrat program BETP ini adalah untuk membangunkan ekonomi Malaysia di kawasan sempadan Malaysia-Thailand dengan memanfaatkan pelan infrastruktur dan pembangunan yang sedia ada, serta memantapkan lagi perdagangan di kawasan sempadan Malaysia-Thailand, supaya berlaku pergerakan aktif dalam aktiviti import, eksport dan perdagangan rentas-sempadan.

Di antara perancangan Kerajaan untuk membangunkan kawasan sempadan di

Kedah yang akan berperanan sebagai pemangkin utama untuk menggalakkan pertumbuhan ekonomi setempat adalah seperti berikut:

1. Program Pembangunan Kedah Rubber City (KRC)

Inisiatif Pembangunan Kedah Rubber City (KRC) yang akan dilaksanakan di kawasan seluas 1244.88 ekar di Ladang Bukit Ketapang, Padang Terap, Kedah adalah bertujuan untuk memperkuuhkan lagi sektor getah hiliran atau pembuatan barang industri getah di Malaysia. Projek pembangunan ini merupakan projek pembangunan nasional yang akan dibangunkan bersama oleh Kerajaan Persekutuan, Kerajaan Negeri Kedah dan Lembaga Getah Malaysia. KRC juga merupakan projek pembangunan sempadan antara Malaysia-Thailand yang telah dipersetujui oleh kedua-dua buah negara serta dilaporkan di bawah Program Joint Development Strategy Malaysia-Thailand dan Zon Pembangunan Indonesia-Malaysia-Thailand Growth Triangle (IMT-GT).

2. Program Pembangunan Kedah Science & Technology Park (KSTP)

Inisiatif Pembangunan Kedah Science & Technology Park (KSTP) yang akan dilaksanakan di kawasan berkeluasan 1,938 ekar di Bukit Kayu Hitam, Kedah bakal menjadi pemangkin untuk menggalakkan perkembangan penyelidikan berkemampuan tinggi serta memastikan pertumbuhan ekonomi yang lebih cepat dan pesat, terutamanya di bahagian utara negeri Kedah. Projek pembangunan KSTP juga secara tidak langsung akan dapat membantu penjanaan pendapatan yang lebih tinggi untuk rakyat negeri Kedah. Pelaksanaan projek pembangunan ini adalah selaras dengan laporan Kajian Program Transformasi Ekonomi Sempadan (*Border Economic Transformation Programme*) yang telah dijalankan oleh Unit Perancang Ekonomi (UPE), Jabatan Perdana Menteri. Pembangunan Fasa pertama KSTP akan merangkumi dua kluster pertama iaitu “*Advance Materials*” dan “*Agro-Science*”. Pembangunan di KSTP dijangka akan mewujudkan lebih 23,244 peluang pekerjaan baharu serta mampu menarik anggaran pelaburan sebanyak RM12.9 billion menjelang tahun 2030. Untuk makluman, Kementerian Kewangan juga telah meluluskan pakej insentif khusus khas bagi pembangunan KRC dan KSTP di bawah NCER Special

Tax Incentive Package (STIP) untuk menarik kemasukan para pelabur berpotensi.

3. Pembangunan Special Border Economic Zone (SBEZ), Kota Perdana di Bukit Kayu Hitam

Untuk makluman lanjut, SBEZ akan dibangunkan di kawasan seluas 4,451 hektar dan ia membabitkan pembangunan pelabuhan darat, zon perdagangan bebas, hab logistik dan pusat komersial. Projek ini akan dibangunkan oleh anak syarikat milik penuh Kerajaan, melalui Menteri Kewangan Diperbadankan, Northern Gateway Sdn. Bhd dan NCIA memainkan peranan sebagai fasilitator projek ini. SBEZ dijangka bakal memberi kelebihan besar kepada negeri dan rakyat terutama melalui 50,000 peluang pekerjaan sepanjang tempoh 30 tahun pembinaan keseluruhan dan mampu menyumbang antara RM30 bilion hingga RM40 bilion setahun kepada Keluaran Dalam Negara Kasar (KDNK) negara. Penyusunan semula zon-zon sedia ada di KSTP dan SBEZ sedang diselaraskan secara sistematik supaya kawasan perindustrian dan perdagangan bebas di Bukit Kayu Hitam dapat diperluaskan serta mengelak dari sebarang pertindihan atau kekeliruan maklumat apabila disalurkan kepada para pelabur.

Selain daripada yang dinyatakan di atas, program lain yang akan dan masih di dalam proses perancangan adalah:

4. Program pengendalian kargo di Padang Besar, Perlis dan Bukit Kayu Hitam, Kedah; dan penambahbaikan sambungan rel ke Penang Port

NCIA juga bertindak sebagai penyelaras untuk projek mempertingkatkan kecekapan operasi dan pengendalian kargo di sempadan Thailand seperti di Padang Besar dan Bukit Kayu Hitam. Usaha utama termasuk mempercepatkan proses perancangan dan pembiayaan untuk memastikan kelestarian operasi. Program Integrasi Logistik dan Menaik Taraf Fasiliti Terminal Kargo Keretapi Tanah Melayu Berhad (KTMB) Padang Besar dan Bukit Kayu Hitam; dan penambahbaikan sambungan rel ke Penang Port akan menghasilkan

peningkatan kapasiti terminal dan pengendalian kargo. Usaha ini dijangka mampu meningkatkan jumlah pengendalian kargo yang lebih cepat dan efisyen dari Selatan Thailand melalui pintu masuk di Padang Besar, Perlis kepada 150,000 TEUs setahun daripada hanya 120,000 TEUs setahun. Di samping itu, ia juga berpotensi untuk mengurangkan kos pengangkutan berkaitan kargo yang akan menggalakkan penggunaan rel berbanding pengangkutan jalan.

5. Pembinaan “*Landbridge*” Malaysia-Thailand

Perancangan ke arah pembinaan “*Landbridge*” Malaysia-Thailand telah bermula pada awal 2018 di mana komponen-komponen untuk pelaksanaan “*Landbridge*” telah dibincangkan di dalam platform seperti Joint Development Strategy (JDS), IMT-GT. Pembinaan “*Landbridge*” merupakan perancangan strategik jangka masa panjang untuk meningkatkan dan memudahkan cara hubungan dan pergerakan perdagangan antara Malaysia dan Thailand. Di antara komponen-komponen yang telah dikenalpasti sebagai pemungkin pelaksanaan seperti operasi pintu sempadan 24 jam, single clearance serta kolaborasi operasi di antara KTMB dan State Railway of Thailand (SRT) untuk pengendalian kargo merentas sempadan dari Selatan Thailand ke Kedah dan Pulau Pinang. Untuk inisiatif operasi pintu sempadan 24 jam, Malaysia dan Thailand telah bersetuju untuk membuka laluan keluar masuk di Kompleks Imigresen, Kastam, Kuaranin dan Keselamatan (ICQS) Bukit Kayu Hitam / Customs, Immigration, and Quarantine Complex (CIQ) Sadao untuk tujuan pergerakan kargo dan kenderaan berat yang akan bermula pada 1 April 2019 untuk tempoh percubaan selama tiga bulan.

NCIA akan terus mengambil langkah strategik untuk merancang dan memacu pembangunan ekonomi berkaitan rentas-sempadan untuk pembangunan NCER secara menyeluruh. Usaha ini dipercayai akan mewujudkan lebih banyak peluang pekerjaan kepada penduduk setempat, di samping membantu menaikkan taraf hidup rakyat di NCER menjelang tahun 2030. NCIA juga akan meneruskan kerjasama dengan pihak-pihak berkepentingan di dalam menarik pelaburan domestik dan antarabangsa untuk menggalakkan pertumbuhan ekonomi penduduk setempat.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DR. NIK MUHAMMAD ZAWAWI
BIN HAJI SALLEH
[PASIR PUTEH]**

TARIKH SOALAN : 18 MAC 2019 (ISNIN)

SOALAN NO. 42

minta **MENTERI PEMBANGUNAN USAHAWAN** menyatakan apakah rasional Kerajaan dalam menjenamakan semula program Skim Latihan Satu Malaysia (SL1M) kepada Program *Profesional Training And Education For Growing Entrepreneurs*.

JAWAPAN

Tuan Yang Dipertua,

1. Program Skim Latihan 1 Malaysia (SL1M) yang dahulunya di bawah seliaan Unit Perancang Ekonomi, Jabatan Perdana Menteri (UPE, JPM) telah dipindahkan ke Kementerian Pembangunan Usahawan (MED) berkuatkuasa pada 22 Oktober 2018 dan dijenamakan semula kepada *Professional Training and Education for Growing Entrepreneurs (PROTÉGÉ)* mulai 28 Januari 2019.
2. Penjenamaan semula ini adalah bertujuan mengembangkan lagi fungsi sedia ada agensi merangkumi elemen penekanan kepada latihan keusahawanan bagi menggalakkan lebih ramai usahawan berdaya maju selaras dengan matlamat Kementerian Pembangunan Usahawan (MED) untuk melahirkan 50,000 usahawan setahun.
3. Penjenamaan baharu ini masih mengekalkan modul kebolehpasaran sedia ada untuk membantu graduan menambah pengalaman melalui latihan dan penempatan di syarikat yang mengambil bahagian dalam program ini.
4. Rasional penjenamaan baharu ini adalah bagi memastikan lebih ramai anak muda mendapat pendedahan kepada program *PROTÉGÉ* dengan memperluaskan sasaran kepada golongan pelajar lepasan sekolah, diploma dan ijazah ke atas.
5. *PROTÉGÉ* turut mengadakan kempen kesedaran kepada anak muda melalui beberapa program *outreach* keusahawanan dan kebolehpasaran. Program yang telah dirangka ini mengambil kira penambahbaikan dan pendekatan baru yang lebih mantap dalam memperkasakan belia. Ia mampu melahirkan modal insan yang seimbang dan berkemahiran untuk industri dan mewujudkan generasi usahawan atau *job creator* bagi mengembangkan ekonomi negara dengan lebih pesat lagi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' ROSOL BIN WAHID
[HULU TERENGGANU]**

TARIKH : 18.3.2019 (ISNIN)

SOALAN NO. 43

Dato' Rosol bin Wahid [Hulu Terengganu] minta **MENTERI PENDIDIKAN** menyatakan cadangan menubuhkan cawangan Institusi Pendidikan Tinggi Awam (IPTA) di Empangan Kenyir, fokus kepada program meningkatkan biodiversiti dan integriti ekosistem flora dan fauna di empangan tersebut, yang kekal merupakan tasik buatan manusia terbesar di Asia Tenggara dan kawasan tumpuan pelancong dari seluruh pelusuk dunia.

JAWAPAN

Tuan Yang di-Pertua,

Kementerian tidak bercadang untuk membina kampus cawangan Institut Pendidikan Tinggi Awam (IPTA) di Empangan Kenyir. Untuk makluman, pada masa kini Universiti Malaysia Terengganu sedang membangunkan Pusat Penyelidikan Tasik Kenyir di mana status kemajuan pelaksanaan sehingga 4 Mac 2019 adalah 96% dan projek ini dijangka siap pada 31 Mac 2019.

Apabila siap kelak, pusat penyelidikan ini akan digunakan sebagai stesen penyelidikan dalam bidang biodiversiti dan akuakultur merangkumi Kajian Ekologi Akuatik, Kajian Limnologi Air, Batimetri, Kualiti Air dan Tahap Pencemaran, Kajian Arkeologi, Kajian Hidrologi dan Kajian Biodiversiti.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN FONG KUI LUN
[BUKIT BINTANG]
TARIKH : 18 MAC 2019 (ISNIN)

SOALAN NO. 44

Y.B. TUAN FONG KUI LUN [BUKIT BINTANG] minta **MENTERI KEWANGAN** menyatakan kedudukan kutipan Tabung Harapan terkini dan sejauh mana ia telah membantu kewangan Kerajaan dalam menurunkan hutang negara.

JAWAPAN

Tuan Yang Dipertua,

Untuk makluman Yang Berhormat, Kerajaan melalui siaran media Kementerian Kewangan bertarikh 7 Februari 2019 telah memaklumkan bahawa baki akhir setakat 14 Januari 2019 iaitu tarikh akhir penerimaan sumbangan ke dalam Tabung Harapan Malaysia (THM) adalah sebanyak RM202,716,775.10.

Siaran media tersebut juga turut memaklumkan bahawa Jawatankuasa Akaun yang dipengerusikan oleh Ketua Setiausaha Perbendaharaan akan memutuskan penggunaan wang THM ini mengikut tatacara yang termaktub di dalam arahan amanahnya iaitu akan digunakan untuk pembayaran hutang Kerajaan Persekutuan dan pembayaran balik yang perlu dilakukan bagi tujuan akaun amanah ini sahaja.

Untuk makluman Yang Berhormat juga, akaun amanah tersebut kini di peringkat awal pengauditan oleh Jabatan Audit Negara iaitu selaras dengan peraturan dan perundangan semasa yang berkuat kuasa agar THM ditadbir secara teratur, telus dan berintegriti. Sebarang penggunaan dana THM hanya dapat dimaklumkan setelah dipertimbangkan oleh Jawatankuasa Akaun Amanah THM yang bertanggungjawab dalam pengurusan THM selepas pengauditan selesai dilaksanakan.

Walaupun THM tidak mungkin boleh melangsaikean semua hutang Kerajaan Persekutuan, THM akan kekal menjadi simbol semangat taat setia dan patriotisme rakyat Malaysia untuk melangsaikean hutang negara.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPATBELAS**

PERTANYAAN : JAWAB LISAN

DARIPADA : TUAN NOOR AMIN AHMAD [KANGAR]

TARIKH : 18 MAC 2019

SOALAN : 45

Tuan Noor Amin bin Ahmad [Kangar] minta **MENTERI DALAM NEGERI** menyatakan adakah pemberian taraf warganegara kepada kaum India yang berusia 60 tahun ke atas akan diperluas kepada kumpulan lain misalnya kaum Siam yang sudah lama menetap di negara ini.

JAWAPAN

Tuan Yang di-Pertua,

Selaras dengan pengumuman YAB Perdana Menteri pada 14 Ogos 2018 dan keputusan Mesyuarat Jemaah Menteri pada 17 Ogos 2018, penganugerahan kewarganegaraan kepada pemegang Kad Pengenalan Pemastautin Tetap (MyPR) tanpa mengira kaum yang berumur 60 tahun dan ke atas, Kementerian sedang melaksanakan tindakan segera terhadap semua permohonan kewarganegaraan secara berperingkat dan selaras dengan peruntukan perundangan di bawah Perlembagaan Persekutuan.

Setiap permohonan kewarganegaraan yang diterima oleh Kementerian akan diproses dengan teliti dalam memastikan setiap permohonan berkenaan memenuhi syarat-syarat yang ditetapkan dalam Bahagian III, Perlembagaan Persekutuan.

Untuk makluman Ahli Yang Berhormat, pertimbangan permohonan kewarganegaraan adalah berdasarkan kepada Prosedur Operasi Standard (SOP) yang telah mengambil kira aspek kemanusiaan serta diperincikan daripada peruntukan Perlembagaan Persekutuan seperti mana berikut:-

1. Memenuhi tempoh kemastautinan yang dikira daripada pegangan kad pengenalan Pemastautin Tetap (MyPR);
2. Mempunyai pengetahuan Bahasa Melayu yang diukur melalui tiga (3) komponen Ujian Pengetahuan Bahasa Melayu (UPBM) iaitu lisan, membaca dan menulis; dan
3. Berkelakuan baik yang dinilai melalui Tapisan Keselamatan oleh Polis Diraja Malaysia (PDRM).

NO. SOALAN : 46

PEMBERITAHUAN PERTANYAAN BAGI
JAWAPAN LISAN
MESYUARAT PERTAMA, PENGGAL KEDUA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB PUAN KASTHURIRAANI A/P PATOO
[BATU KAWAN]**

TARIKH MENJAWAB : 18 MAC 2019

SOALAN : 46

YB PUAN KASTHURIRAANI A/P PATTO [BATU KAWAN] minta **PERDANA MENTERI** menyatakan adakah Kerajaan akan menggubal Kanun Keseksaan untuk memasukkan jenayah menghendap (*stalking*) atau menggubal undang-undang yang baru dan apakah garis masa yang akan diambil untuk merealisasikan penggubalan ini serta apakah status terkini usaha Kerajaan untuk memperbaiki undang-undang sedia ada berkaitan rogol terhadap isteri.

**JAWAPAN: YB DATUK LIEW VUI KEONG
MENTERI DI JABATAN PERDANA MENTERI**

Tuan Yang di-Pertua

1. Kerajaan melalui Jabatan Peguam Negara sedang membuat kajian menyeluruh berhubung dengan kesalahan jenayah menghendap. Kerajaan akan mengambil kira input daripada pertubuhan bukan Kerajaan yang telah diberikan dan akan membuat pertimbangan selepas kajian menyeluruh tersebut dimuktamadkan.
2. Memandangkan kajian menyeluruh sedang dilaksanakan, buat masa ini garis masa penggubalan undang-undang tersebut masih belum dapat ditetapkan dan hasil kajian juga tidak dapat diperincikan.
3. Berkenaan dengan isu memperbaiki undang-undang sedia ada berkaitan rogol terhadap isteri, Kanun Keseksaan [Akta 574] telah dipinda untuk memasukkan seksyen baharu iaitu seksyen 375A mengenai kesalahan suami menyebabkan kecederaan untuk mengadakan persetubuhan dengan isteri. Pindaan ini mula berkuat kuasa pada 7 September 2007.
4. Pindaan tersebut menetapkan mana-mana suami yang menyebabkan kecederaan atau ketakutan kematian atau kecederaan kepada isterinya atau mana-mana orang lain untuk mengadakan persetubuhan dengan isterinya boleh dipertuduh di bawah peruntukan

undang-undang yang sedia ada iaitu seksyen 375A Kanun Keseksaan yang memperuntukkan hukuman penjara yang boleh sampai lima tahun.

Sekian, terima kasih.

**DEWAN RAKYAT
PEMBERITAHUAN PERTANYAAN
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN

TARIKH : 18 MAC 2019 (ISNIN)

**DARIPADA : Datuk Seri Ir. Dr. Wee Ka Siong
[Ayer Hitam]**

SOALAN :

Datuk Seri Ir. Dr. Wee Ka Siong [Ayer Hitam] minta PERDANA MENTERI menyatakan :-

- (a) perkembangan terbaru mengenai projek Landasan Kereta Api Pantai Timur (ECRL) setelah Kerajaan Malaysia berunding dengan China; dan
- (b) perihalkan pengurangan skop kerja (downsizing) berbanding speksifikasi asal dan kos pembinaan selepas “downsizing” dan pampasan perlu dibayar kepada China dan kaedah pembayarannya jikalau projek ECRL ditangguhkan.

JAWAPAN: **YB Datuk Wira Dr. Md Farid bin Md Rafik**
TIMB. MENTERI DI JABATAN PERDANA MENTERI

Tuan Yang di-Pertua,

1. Untuk makluman Ahli – Ahli Yang Berhormat, semua kerja dan perkhidmatan berkaitan projek ECRL masih digantung oleh Malaysia Rail Link Sdn Bhd (MRL), iaitu syarikat di bawah milik penuh Menteri Kewangan Diperbadankan semenjak notis penggantungan dikeluarkan pada 3hb Julai 2018.
2. Manakala pada masa ini, Kerajaan masih dalam rundingan dengan kontraktor utama, China Communications Construction Company (CCCC) bagi mengurangkan kos pelaksanaan Projek Laluan Rel Pantai Timur (ECRL). Ianya bakal menentukan status pelaksanaan projek ini kelak.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATO' SERI AHMAD FAIZAL BIN DATO'
AZUMU [TAMBUN]**

TARIKH : 18 MAC 2019 (ISNIN)

SOALAN NO : 48

Minta **PERDANA MENTERI** menyatakan apakah hala tuju Kerajaan Pakatan Harapan dalam memperkasakan inisiatif perpaduan masyarakat berbilang kaum dalam negara.

JAWAPAN

Yang Di Pertua,

Sejak merdeka lagi, negara kita telah terbina sebagai sebuah negara yang bertuah kerana memiliki rakyat yang majmuk iaitu kepelbagaian masyarakatnya yang terdiri dari latar belakang keturunan, kaum, agama, budaya dan bahasa yang berbeza. Para pemimpin negara yang terdahulu telah mentadbir negara ini dengan berteraskan semangat perpaduan bagi menjamin kebebasan, keadilan, kesejahteraan dan keamanan masyarakat Malaysia sehingga ke hari ini. Justeru, adalah menjadi tanggungjawab Kerajaan untuk terus memastikan keharmonian negara dan kesejahteraan rakyat terus terjamin melalui penetapan satu hala tuju yang jelas dan terancang.

Mengambil jejak sebelum ini, Kerajaan Pakatan Harapan juga tidak terkecuali dalam memastikan perpaduan dalam kalangan rakyat negara ini menjadi agenda utama negara. Ekoran daripada itu, Kerajaan semasa telah melaungkan satu konsep negara baru iaitu Malaysia Baharu yang memberi penekanan kepada demokrasi berparlimen, raja berperlembagaan dan kedaulatan undang-undang dan menghormati kehendak rakyat melalui urus tadbir negara yang baik, inklusif dan progresif berlandaskan lunas-lunas Perlembagaan

Persekutuan, Rukun Negara dan serta visi yang dibawa oleh para pejuang negara sebelum ini.

Ekoran dari itu, impian pucuk pimpinan Malaysia kini adalah menjadikan Malaysia sebagai negara model kepada dunia sebagai satu negara yang mempunyai bangsa, agama, bahasa dan budaya yang pelbagai tetapi hidup bersatu dalam suasana harmoni, demokratik, progresif dan makmur dengan kerajaan yang berintegriti yang dipimpin melalui tadbir urus yang baik dan bertanggungjawab. Lebih penting lagi, Kerajaan semasa bertekad akan memastikan semua rakyat pelbagai bangsa dan agama di negara ini dapat berkongsi hasil kemakmuran dan kemajuan negara secara adil dan saksama.

Jabatan Perpaduan Negara dan Integrasi Nasional (PERPADUAN) telah mengambil dan memperkasakan beberapa inisiatif bagi mencapai hasrat dan aspirasi kerajaan semasa seperti berikut:-

a) Program Sayangi Komuniti (PSK) yang dilaksanakan di 456 lokasi miskin bandar dan pinggir bandar (B40) sehingga tahun 2018 bagi meningkatkan keharmonian masyarakat setempat agar mereka hidup dengan selamat, aman dan sejahtera. Umpamanya, pelaksanaan PSK membolehkan PERPADUAN melaksanakan pelbagai aktiviti dan program bersama penduduk melalui kerjasama strategik dengan pelbagai agensi dan badan bukan kerajaan (NGO) bagi membendung, menangani dan menyelesaikan isu/masalah yang dihadapi oleh penduduk sebagai salah satu usaha untuk mengintegrasikan masyarakat pelbagai kaum di kawasan ini agar dapat terus memelihara perpaduan negara dan kesejahteraan sosial.

b) Program-program Detik-Detik Kebersatuan (*Moments of Unity*) yang telah dilaksanakan oleh PERPADUAN melalui kerjasama strategik dengan pihak swasta, pertubuhan/persatuan sukarela serta badan bukan kerajaan (NGO) juga merupakan salah satu usaha ke arah mengintegrasikan masyarakat di Semenanjung. Program ini bertujuan mengingatkan seluruh rakyat agar terus bersatu-padu, saling bertoleransi dan berhubung mesra dalam apa jua keadaan tanpa mengira kaum.

c) Pelaksanaan Program Latihan Industri Perpaduan (PLIP) merupakan salah satu platform untuk mengintegrasikan golongan muda bumiputera dan bukan bumiputera melalui program *internship* di syarikat-syarikat swasta dan *Government Linked Companies* (GLCs) sebagai usaha untuk menggalakkan perkongsian silang kerjaya dan budaya antara golongan mahasiswa universiti yang terdiri dari pelbagai kaum dan latarbelakang keturunan. Bermula dari 2015 hingga 2018, seramai 5,218 orang pelajar telah menyertai program ini.

d) Pelbagai aktiviti telah disusun melalui penganjuran program 1SRN 1Komuniti yang merupakan kerjasama antara PERPADUAN dan Kementerian Pendidikan Malaysia (KPM) di mana mahasiswa dari institut pengajian tinggi awam dan swasta berpeluang mendekati dan menabur bakti kepada komuniti setempat yang memerlukan bantuan dan keprihatinan generasi muda. Antara pengisian program tersebut yang memanfaatkan komuniti setempat adalah seperti:

- Membaik pulih rumah penduduk yang usang
- Pendawaian elektrik dalam rumah penduduk
- Khidmat jagaan warga emas
- Kelas motivasi dan tuisyen percuma kepada pelajar sekolah
- Aktiviti gotong-royong pembersihan kawasan perumahan

Jabatan juga melalui kerjasama dengan Jawatankuasa Mempromosikan Persefahaman dan Keharmonian Antara Pengikut Agama (JKMPKA) telah melaksanakan pelbagai program bagi meningkatkan sifat toleransi, persefahaman dan keharmonian antara kaum. Antaranya adalah seperti berikut:

- a) Penganjuran Dialog Keharmonian Antara Agama yang melibatkan perkongsian nilai-nilai murni dan amalan-amalan terbaik (*best practices*) antara agama;
- b) Sambutan Hari Toleransi Sedunia (*International Tolerance Day*) yang diadakan pada 16 November setiap tahun memberi fokus ke arah mendidik masyarakat ke arah persefahaman, keharmonian dan

keamanan sejagat melalui pengamalan sikap toleransi dan penerimaan dalam kalangan masyarakat Malaysia yang terdiri dari pelbagai kaum dan agama; dan

c) Sambutan Minggu Keharmonian Antara Penganut Agama Sedunia (*World International Harmony Week*) yang disambut pada 1 - 7 Februari setiap tahun bertujuan mewujudkan kesedaran dan kefahaman antara para penganut semua agama akan kepentingan memelihara keamanan sejagat dan sentiasa menghargai pendamaian dan menolak sebarang unsur yang boleh menggugat keharmonian.

Antara langkah jangka panjang yang dirancang oleh Kerajaan ke arah memelihara perpaduan negara dan kesejahteraan sosial adalah seperti berikut:

a) Kerajaan juga melalui PERPADUAN telah merangka *Blueprint* - Pelan Perpaduan, Kesepaduan dan Penyatupaduan Malaysia (PPKPM) sebagai *way forward* untuk mengharungi perubahan global di masa depan yang semakin mencabar dan kini sedang memuktamadkan Pelan Tindakan bagi melaksanakan syor-syor yang telah dikemukakan melalui *Blueprint* tersebut.

b) PERPADUAN juga sedang dalam proses membangunkan satu instrumen indeks yang akan menjadi kayu pengukur bagi tahap perpaduan negara ini. Melalui indeks ini, keberkesanan pelaksanaan program yang dirancangkan melalui Pelan Tindakan dapat dinilai.

c) Penjenamaan Majlis Konsultasi Perpaduan Negara (MKPN) kepada Majlis Perundingan Keharmonian Rakyat (MPKR) merupakan usaha kerajaan ke arah penyatuan nasional (*national reconciliation*) bagi mengurangkan polarisasi kaum dan membina bangsa Malaysia yang bersatu padu. Penubuhannya adalah untuk membincangkan isu-isu sukar dalam kalangan masyarakat Malaysia yang kompleks serta merintis jalan penyelesaian ke arah merapatkan jurang yang menghalang perpaduan. Selain itu, Majlis ini akan berperanan mewujudkan kesedaran dan memupuk nilai-nilai murni dalam kalangan rakyat Malaysia agar bersikap moderat bagi mengelakkan perpecahan antara kaum dan agama.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
**DARIPADA : Y.B. DATO' SRI HAJI ISMAIL BIN HAJI
MOHAMED SAID**
[KUALA KRAU]
TARIKH : 18 MAC 2019 (ISNIN)

SOALAN NO. 49

Y.B. DATO' SRI HAJI ISMAIL BIN HAJI MOHAMED SAID [KUALA KRAU]
minta **MENTERI KEWANGAN** menyatakan berapa jumlah peruntukan keseluruhan bagi Bantuan Sara Hidup tahun 2019 dan berapa jumlah yang mendapat manfaat daripada bantuan ini.

JAWAPAN

Tuan Yang di-Pertua,

1. Izinkan saya menjawab soalan Y.B. Kepala Batas pada 14 Mac 2019 dan Y.B. Kuala Krau pada 18 Mac 2019 secara bersekali memandangkan isu yang dibangkitkan adalah hampir sama iaitu jumlah peruntukan dan penerima manfaat Bantuan Sara Hidup (BSH) 2019.
2. BSH merupakan salah satu bantuan bersasar bagi golongan berpendapatan rendah (B40) meringankan kos sara hidup mereka di samping membuktikan keprihatinan Kerajaan Pakatan Harapan terhadap golongan yang memerlukan dan seterusnya memberi impak yang tinggi kepada rakyat.
3. Untuk makluman Yang Berhormat, tempoh pendaftaran/pengemaskinian BSH tahun 2019 telah dibuka mulai 1 Februari 2019 hingga 15 Mac 2019. Sehingga 3 Mac 2019, lebih daripada 1.5 juta permohonan BSH 2019 telah diterima merangkumi 310,000 permohonan baharu dan 1.19 juta permohonan kemas kini. Disebabkan tarikh pendaftaran/pengemaskinian BSH 2019 akan berakhir pada 15 Mac 2019, jumlah sebenar permohonan masih belum dikenal pasti. Sepertimana yang diumumkan oleh Kerajaan, BSH 2019 dijangka memanfaatkan lebih daripada 4 juta isi rumah dan melibatkan peruntukan hampir RM5 bilion.
4. Untuk makluman Ahli Yang Berhormat, Kerajaan akan memastikan semua bantuan Kerajaan adalah berkesan dan menepati kumpulan sasar yang ditetapkan terutamanya golongan B40.

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : TUAN HASANUDDIN BIN MOHD YUNUS
[HULU LANGAT]**

TARIKH : 18 MAC 2019 (ISNIN)

SOALAN NO : 50

minta **PERDANA MENTERI** menyatakan pegangan atas jawapan Menteri Perpaduan terhadap isu rusuhan di Kuil Seafield, Subang Jaya bagi menjaga keharmonian dan keamanan di Malaysia.

JAWAPAN

Yang Di Pertua,

Pada awal pagi, 26 November 2018, suatu insiden perselisihan faham antara dua kumpulan berhubung isu pemindahan tapak kuil Sri Maha Mariamman yang terletak di USJ 25, Seafield, Subang Jaya telah mengakibatkan punca pergaduhan yang besar.

Selaku Menteri yang bertanggungjawab terhadap hal ehwal perpaduan dan kesejahteraan sosial, saya telah menghubungi Timbalan Ketua Polis Negara, Tan Sri Noor Rashid Ibrahim pada 26 November 2018 bagi menyatakan keprihatinan masyarakat terhadap rusuhan yang menjadi ancaman keamanan dan ketenteraman masyarakat pelbagai kaum dan agama serta menzahirkan ketegangan emosi yang berlaku dalam kalangan masyarakat serta pelbagai tuduhan liar yang dilemparkan dan meminta pihak polis menyiasat secara menyeluruh mengenai insiden Kuil Sri Maha Mariamman di Seafield, USJ, Selangor.

Pada 29 November 2018, YAB Perdana Menteri, Tun Dr Mahathir Mohamad dan Menteri Dalam Negeri, Tan Sri Muhyiddin Yassin telah membuat sesi penerangan mengenai insiden di Kuil Sri Maha Mariamman di Seafield, USJ, Selangor di dalam Dewan Rakyat. Kedua-

dua pemimpin turut menegaskan bahawa Kerajaan memandang serius terhadap kejadian tersebut dan tidak akan teragak-agak untuk mengambil tindakan terhadap mereka yang mengancam keamanan dan keselamatan awam mengikut undang-undang negara.

Kenyataan-kenyataan yang dikeluarkan oleh saya selaku Menteri yang bertanggungjawab terhadap hal ehwal perpaduan dan oleh YAB Perdana Menteri dan Menteri Dalam Negeri ingin menjelaskan bahawa insiden pergaduhan di Kuil Sri Maha Mariamman di Seafield, USJ, Selangor tiada kaitan sama sekali dengan isu perkauman dan agama. Sebaliknya, pergaduhan tersebut mempunyai unsur jenayah yang melibatkan kerosakan harta benda serta mendatangkan kecederaan parah kepada anggota keselamatan yang bertugas di lapangan.

Saya menyeru kepada semua pihak supaya berfikir dan bertindak secara rasional dalam menangani isu seumpama ini di masa depan dan sebaliknya tidak cuba untuk memanipulasikannya untuk kepentingan pihak tertentu. Rakyat Malaysia telah mengecapi kehidupan yang aman dan harmoni sejak sekian lama. Janganlah disebabkan oleh insiden jenayah yang terpencil ini, kita sanggup merosakkan perpaduan dan keharmonian rakyat berbilang kaum dan agama yang kita kecapi selama ini seperti kata pepatah, “kerana nila setitik, rosak susu sebelanga.”

Saya ingin menegaskan bahawa Kerajaan tidak akan berkompromi dengan mana-mana pihak yang sengaja mengganggu-gugat keamanan dan ketenteraman awam, terutamanya dengan mengapi-apikan sentimen perkauman. Tindakan tegas berlandaskan undang-undang akan diambil oleh pihak berkuasa demi mempertahankan perpaduan kaum, keselamatan negara dan kesejahteraan rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
**DARIPADA : Y.B. PUAN HAJAH SITI ZAILAH BINTI MOHD
YUSOFF**
[RANTAU PANJANG]
TARIKH : 18 MAC 2019 (ISNIN)

SOALAN NO. 51

Y.B. PUAN HAJAH SITI ZAILAH BINTI MOHD YUSOFF [RANTAU PANJANG] minta **MENTERI KEWANGAN** menyatakan mengapakah jumlah hutang Kerajaan Persekutuan meningkat daripada RM687 bilion pada tahun 2017 kepada RM741 bilion pada tahun 2018.

JAWAPAN

Tuan Yang di-Pertua,

1. Secara amnya, paras hutang Kerajaan Persekutuan meningkat disebabkan Kerajaan perlu membiayai defisit bajet tahunan yang mana pinjaman dilaksanakan untuk menampung belanja pembangunan. Bagi tahun 2018, hutang rasmi Kerajaan Persekutuan meningkat daripada RM686.8 bilion atau 50.7% daripada KDNK pada tahun 2017 kepada RM741 bilion atau 51.8% daripada KDNK. Peningkatan sebanyak RM54.2 bilion ini digunakan untuk membiayai defisit tahun 2018. Hutang rasmi ini tidak merangkumi pembayaran hutang oleh Kerajaan Persekutuan sebagai penjamin.
2. Kerajaan akan terus membuat pinjaman baru pada setiap tahun selagi kedudukan kewangan Kerajaan Persekutuan mengalami defisit. Kerajaan Persekutuan membuat pinjaman bagi membiayai semula hutang yang matang dan menampung perbelanjaan pembangunan. Hutang Kerajaan Persekutuan hanya dapat dikurangkan sekiranya kedudukan kewangan Kerajaan Persekutuan mempunyai lebihan (*surplus*) yang mencukupi untuk membiayai hutang dan perbelanjaan pembangunan. Sebagai contoh, sepanjang tempoh 1993 - 1997, Kerajaan berjaya mengurangkan hutang daripada RM95.9 bilion pada 1993 kepada RM89.9 bilion pada 1997, berikutan lebihan fiskal dalam kedudukan kewangan tahunan.
3. Kepatuhan yang tegas terhadap disiplin fiskal serta pengurusan hutang yang baik terus diberikan penekanan bagi memastikan kedudukan fiscal dan makroekonomi terus kukuh serta dapat menampung sebarang krisis.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 18 MAC 2019 (ISNIN)

SOALAN NO.52

Minta **MENTERI HAL EHWAL EKONOMI** menyatakan tindakan dan strategi yang sedang dilaksanakan untuk memperbaiki keadaan ekonomi negara.

JAWAPAN

Tuan Yang di-Pertua,

1. Untuk makluman Ahli Yang Berhormat, Kerajaan telah membentangkan dasar dan hala tuju bagi memacu pertumbuhan ekonomi Malaysia untuk tempoh sehingga tahun 2020 dalam Kajian Separuh Penggal Rancangan Malaysia Kebelas (KSP RMKe-11), yang telah dibentangkan di Dewan yang mulia ini pada 18 Oktober 2018 yang lalu. Ini akan disusuli dengan pelan pembangunan tempoh pasca 2020 untuk merangka pembangunan sosioekonomi negara bagi tempoh sederhana dan panjang yang dijangka akan dibentangkan pada tahun hadapan. Dasar sosioekonomi yang diperkenalkan dalam KSP RMKe-11 ini akan melengkapi inisiatif Kerajaan dalam mengukuhkan lagi asas ekonomi dan meningkatkan daya saing negara bagi memastikan pertumbuhan ekonomi yang mampan ke arah negara maju dan inklusif. Bagi tujuan ini, enam tonggak dasar dengan 19 bidang keutamaan dan 66 strategi telah dikenal pasti dalam KSP RMKe-11 bagi meletakkan negara pada landasan yang betul.
2. Keutamaan dasar dalam menghadapi tahun-tahun yang akan datang ialah untuk mengimbangi usaha pengukuhan kedudukan fiskal dan objektif pertumbuhan ekonomi bagi menangani sentimen pasaran dan pelabur serta meningkatkan keyakinan rakyat terhadap prospek ekonomi. Kerajaan juga sentiasa mengambil langkah proaktif bagi memastikan momentum pertumbuhan ekonomi sentiasa meningkat. Tumpuan akan terus diberi untuk menggalakkan pelaburan berkualiti daripada sektor swasta dengan menyemak semula insentif sedia ada dan menyediakan pelbagai dana (seperti Dana Pelaburan Berkaitan Kerajaan sebanyak RM2 bilion dan dana pelaburan bersama sebanyak RM50 juta) bagi menyokong perkembangan teknologi di samping memastikan pelabur tempatan mempunyai sokongan pembiayaan yang mencukupi.

Tuan Yang di-Pertua,

3. Langkah dasar struktur serta program dan projek pembangunan berimpak tinggi akan terus dilaksana dengan cara yang lebih telus dan mampan dari segi kewangan bagi memastikan pertumbuhan ekonomi yang lebih bermakna untuk rakyat. Amalan kewangan yang tidak telus dan terurus perlu diberhentikan serta ketirisan pada semua peringkat perlu ditangani. Inisiatif juga akan dirangka bagi menangani cabaran baharu dan memanfaatkan sumber pertumbuhan baharu termasuk Revolusi Perindustrian Keempat. Di samping itu, Kerajaan juga akan menggalakkan peralihan sektor pembuatan ke arah pengeluaran produk yang mempunyai nilai ditambah yang tinggi, pelbagai dan kompleks. Usaha bersepada ini akan meningkatkan produktiviti dan daya saing serta memastikan Malaysia kekal di landasan pertumbuhan ekonomi ke arah mencapai sasaran sebagai sebuah negara maju dan inklusif.
4. Bagi melengkapi usaha di atas, pelbagai usaha dilaksanakan antara lainnya Kerajaan juga telah menubuhkan Majlis Tindakan Ekonomi (EAC) pada 11 Februari 2019. Tujuan penubuhan EAC adalah bagi meneliti dan menangani isu berkaitan hal ehwal ekonomi dan kewangan serta kebajikan rakyat. Penubuhan EAC telah membentuk satu gabungan kepakaran daripada pelbagai pihak termasuk pemain industri yang membolehkan Kerajaan mendapat pandangan dan idea yang lebih menyeluruh dalam usaha untuk merangka dasar daripada perspektif alternatif dalam menyelesaikan isu-isu semasa rakyat. Selain itu, dasar yang akan dicadangkan oleh EAC lebih bersifat *action-oriented* dengan menyahut dan bertindak secara pantas ke atas maklum balas rakyat terhadap masalah yang mereka hadapi, khususnya dalam hal-hal berkaitan ekonomi.

Sekian, terima kasih.

Kementerian Hal Ehwal Ekonomi
18 Mac 2018

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

PERTANYAAN : TUAN LUKANISMAN BIN AWANG SAUNI

TARIKH : 18.03.2019 (ISNIN)

Tuan Lukanisman Bin Awang Sauni [Sibuti] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah pihak Kementerian akan menetapkan harga maksima yang boleh dikenakan oleh pengusaha kedai makanan dan restoran terhadap penjualan harga air mineral botol 500ml agar kadar keuntungan yang diperolehi tidak melampau.

JAWAPAN:

Tuan Yang Di-Pertua,

Buat masa ini Kementerian tidak bercadang untuk menetapkan harga maksima ke atas air mineral botol yang dijual di pasaran. **Sekiranya berlaku aktiviti pencatutan di kedai makanan dan restoran**, Kementerian akan mengambil tindakan di bawah Akta Kawalan Harga dan Anti-Pencatutan (AKHAP) 2011.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPATBELAS**

PERTANYAAN : JAWAB LISAN

DARIPADA : TUAN LIM LIP ENG [KEPONG]

TARIKH : 18 MAC 2019

SOALAN : 54

Tuan Lim Lip Eng [Kepong] minta **MENTERI DALAM NEGERI** menyatakan keputusan siasatan semula kes kematian Teoh Beng Hock, nama-nama suspek terbabit dan tindakan undang-undang susulannya.

JAWAPAN

Tuan Yang di-Pertua,

Kementerian Dalam Negeri (KDN) mengambil maklum hasil keputusan Mesyuarat Jemaah Menteri (MJM) pada 20 Jun 2018 supaya siasatan kes kematian Teoh Beng Hock dibuka semula. Pihak polis telah menerima arahan daripada Jabatan Peguam Negara dan telah mengambil tindakan merakam percakapan 3 orang saksi awam dan seorang saksi pegawai Suruhanjaya Pencegahan Rasuah Malaysia (SPRM). Siasatan masih diteruskan dan kertas siasatan akan dimajukan kepada Timbalan Pendakwaraya setelah semua arahan yang diberikan diambil tindakan dalam tempoh yang terdekat ini.

PEMBERITAHUAN PERTANYAAN MESYUARAT PERTAMA,
PENGGAL KEDUA, PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : DATO' SERI HISHAMMUDDIN
BIN TUN HUSSEIN (SEMBRONG)**

TARIKH : 18 MAC 2019 (ISNIN)

SOALAN:

Minta **MENTERI PERTAHANAN** menyatakan status terkini jumlah pempamer dan delegasi asing yang akan terlibat dalam LIMA'19 serta berapa banyakkah pesawat dan aset maritim yang akan mengambil bahagian secara keseluruhan. Serta apakah matlamat dan harapan Kementerian hasil daripada penganjuran LIMA'19 ini.

JAWAPAN

Tuan Yang di-Pertua,

Sehingga 29 Februari 2019, sebanyak 387 pempamer telah bersetuju untuk menyertai pameran LIMA`19 dengan pecahan 192 syarikat tempatan dan 195 syarikat antarabangsa. Daripada jumlah tersebut, 70% merupakan syarikat pertahanan manakala 30% adalah syarikat dari sektor komersil. Bagi jemputan delegasi asing, sebanyak 598 tetamu jemputan Kementerian Pertahanan dari 61 buah negara dan 110 jemputan tetamu Kementerian Pengangkutan dari 38 buah negara telah dijemput hadir. Sehingga kini, seramai 220 delegasi telah menyatakan persetujuan untuk hadir ke LIMA`19.

Secara keseluruhannya, sebanyak 150 buah pesawat ketenteraan dan komersil dari seluruh dunia akan terlibat dalam menjayakan pameran LIMA pada kali ini. Bagi segmen maritim pula, LIMA`19 telah berjaya menarik penyertaan 104 aset maritim yang melibatkan kapal perang, kapal latihan, kapal selam, helikopter dan bot.

Penganjuran pameran LIMA sejak tahun 1991 telah menyumbang secara langsung dan tidak langsung kepada peningkatan pembangunan pertahanan negara. Ianya dapat dilihat dengan kerjasama industri pertahanan tempatan dan industri pertahanan luar negara yang berkembang dari semasa ke semasa. Objektif LIMA untuk melahirkan industri pertahanan tempatan yang berdikari dan berdaya saing akan terus dilaksanakan. Melalui LIMA, industri pertahanan negara akan mendapat manfaat dengan perkongsian idea serta teknologi dengan industri pertahanan terkemuka di dunia. Syarikat-syarikat industri pertahanan dari seluruh dunia yang terlibat dalam pameran ini dapat menggunakan peluang ini bagi mewujudkan jaringan kerjasama dan secara tidak langsung menjadikan Malaysia sebagai pusat (hub) untuk memasarkan produk mereka ke benua Asia khususnya di rantau Asia Pasifik. Dalam masa yang sama, ianya mampu memberi kesan kepada ekonomi negara menerusi sektor pekerjaan, pembangunan kemahiran dan penembusan rantai pembekalan global.

Selaras dalam meletakkan Pulau Langkawi dan Malaysia sebagai destinasi *Meetings, Incentives, Conventions and Exhibitions* (MICE) yang utama di Asia, Kementerian Pertahanan dengan kerjasama agensi kerajaan yang lain telah mengaturkan pelbagai program dan aktiviti bagi menarik kehadiran tetamu di Pulau Langkawi. Kehadiran tetamu-tetamu ini ke Pameran LIMA dapat mempromosikan Pulau Langkawi sebagai destinasi pelancongan dan istirehat utama di Malaysia.

Dalam penganjuran LIMA`19, penglibatan sektor komersil terus dipertingkatkan dengan penyertaan lebih banyak syarikat komersil bagi kedua-dua segmen maritim dan aeroangkasa. Ini bagi membolehkan LIMA terus bersaing setanding dengan pameran pertahanan dunia yang lain. Kementerian berharap LIMA`19 dapat memberi peluang kepada Angkatan Tentera Malaysia (ATM), agensi penguatkuasaan dan industri sektor komersil untuk menilai perkembangan teknologi terkini serta dapat membuat kajian pasaran ke atas aset-aset ketenteraan, keselamatan dan komersil di seluruh dunia.

NO SOALAN : 55

Pelaburan jangka masa panjang dan usahasama antara syarikat tempatan dan antarabangsa serta negara yang mengambil bahagian akan terus diperkuuhkan dengan perjanjian-perjanjian persefahaman dan kontrak yang ditandatangani semasa LIMA`19 berlangsung.

Justeru, Kementerian dengan penuh harapan akan memastikan penganjuran LIMA`19 berjalan dengan lancar. Setiap peserta pameran yang telah membuat pelaburan yang tinggi dalam menyertai LIMA`19 ini diharapkan mendapat pulangan di atas pelaburan yang telah dibuat melalui peluang yang ada dengan memasarkan produk kepada pembeli berpotensi melalui program-program business networking yang telah dirancang semasa LIMA`19 berlangsung kelak.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN JUNE LEOW HSIAD HUI
[HULU SELANGOR]**

TARIKH : 18.3.2019 (ISNIN)

SOALAN NO. 56

Puan June Leow Hsiad Hui [Hulu Selangor] minta **MENTERI PENDIDIKAN** menyatakan usaha untuk mengenal pasti faktor-faktor yang menyebabkan keciciran di kalangan pelajar sekolah menengah, dan langkah-langkah yang boleh diambil untuk membantu mereka terus belajar sehingga tingkatan lima.

JAWAPAN

Tuan Yang di-Pertua,

Kementerian Pendidikan Malaysia (KPM) amat memandang serius keciciran di kalangan pelajar sekolah menengah di seluruh negara. Oleh itu, KPM telah mewujudkan satu inisiatif khusus iaitu Peningkatan Akses daripada Peringkat Prasekolah hingga Menengah Atas yang bertujuan menangani masalah keciciran di sekolah. Inisiatif ini terdapat dalam Pelan Pembangunan Pendidikan Malaysia 2013-2025.

Beberapa faktor yang dikenal pasti mengakibatkan murid tercincir daripada sekolah menengah di KPM iaitu kemiskinan, sikap murid yang tidak berminat untuk bersekolah, sakit, masalah sosial, sikap ibu bapa dan termasuklah masalah pembelajaran. Bagi membendung masalah ini, KPM menyediakan pelbagai bantuan seperti pemberian buku teks secara percuma, Rancangan Makanan Tambahan (RMT), Program Susu Sekolah, dan pembinaan asrama sekolah supaya semua kanak-kanak dapat kekal bersekolah.

Bantuan lain yang turut diberikan adalah bantuan yuran khas sekolah, bayaran tambahan persekolahan, bantuan awal persekolahan, bantuan Kumpulan Wang Amanah Murid Miskin (KWAMP), pakaian seragam badan uniform, makanan asrama dan kenderaan asrama. Malah KPM juga menyediakan biasiswa kepada murid daripada golongan berpendapatan rendah yang cemerlang iaitu Biasiswa Kecil Persekutuan.

Sebagai tindakan terkini, KPM juga telah menyediakan satu garis panduan bagi membantu murid-murid yang berisiko untuk cicir agar mereka kekal bersekolah sehingga tamat tingkatan 5 iaitu Garis Panduan Mengurus Murid Berisiko Cicir di Sekolah (GPMBC). GPMBC ini telah dikuatkuasakan ke semua Sekolah kerajaan dan bantuan kerajaan mulai bulan Jun 2018. Objektif GPMBC ini adalah untuk membantu pihak sekolah mengenal pasti murid berisiko cicir serta mengurus murid berisiko cicir secara berkesan dan sistematik. Selain itu GPMBC ini juga mempunyai objektif bagi memastikan pemantauan murid khususnya murid berisiko cicir dapat dibuat oleh pihak Jabatan Pendidikan Negeri (JPN), Pejabat Pendidikan Daerah (PPD) dan sekolah secara berterusan.

Selain itu, Modul Intervensi Murid Berisiko Cicir Serlahkan Keunggulan Diri (SUDI) telah disediakan sebagai panduan melaksanakan intervensi dalam menangani keciciran murid. Di samping itu, lawatan ke rumah murid juga merupakan kaedah yang dilaksanakan oleh guru bimbingan dan kaunseling bersama-sama guru lain bagi memastikan murid hadir ke sekolah dan kekal dalam sistem persekolahan dalam usaha meningkatkan disiplin dan pembangunan diri murid. Bagi menangani keciciran murid usaha ini digiatkan lagi bagi mengenal pasti punca keciciran murid.

Sekian, terima kasih

RJM 35

NO. SOALAN 57

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB DATO' SRI AZALINA OTHMAN SAID
[PENGERANG]
TARIKH : 18 MAC 2019 (ISNIN)

SOALAN : 57

Minta **PERDANA MENTERI** menyatakan apakah status penyertaan Malaysia dalam Konvensyen Jenayah Siber Kesatuan Eropah “*Konvensyen Budapest*” yang mana Kerajaan sebelum ini telah bersetuju secara dasar dan kerangka undang-undang domestik juga mematuhi peruntukan artikel Konvensyen berkenaan.

JAWAPAN: YB DATUK LIEW VUI KEONG
MENTERI DI JABATAN PERDANA MENTERI

Tuan Yang Di-Pertua,

1. Pada ketika ini Kerajaan sedang meneliti semula segala keperluan dan tahap kesediaan agensi bagi tujuan penyertaan Malaysia kepada Konvensyen Budapest khususnya agensi penguatkuasa dan pihak Penyedia Perkhidmatan Internet (ISP) dari aspek teknikal, pengoperasian, cabaran dan kekangan yang bakal dihadapi. Penelitian ini turut mengambil kira kos dan pembangunan infrastruktur yang diperlukan bagi memastikan Malaysia dapat memenuhi kehendak dan obligasi yang ditetapkan oleh Konvensyen Budapest sekiranya Malaysia menyertai Konvensyen ini.
2. Pendirian Kerajaan pada ketika ini juga adalah untuk meneliti semula setiap dasar dan keputusan termasuklah cadangan pindaaan undang-undang yang telah diputuskan oleh Kerajaan terdahulu bagi memastikan setiap tindakan yang akan diambil atau dilaksanakan tidak akan menggugat kedaulatan dan kepentingan negara sekiranya Malaysia menyertai Konvensyen Budapest.
3. Disamping itu, pihak Kerajaan akan turut mengkaji semula tempoh masa yang sesuai dan diperlukan dalam melaksanakan semua tindakan ini sebelum sebarang keputusan berkenaan penyertaan Malaysia kepada Konvensyen Budapest diputuskan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KE-EMPAT BELAS**

PERTANYAAN : JAWAB LISAN

**DARIPADA : DATUK AHMAD JAZLAN BIN YAAKUB
[MACHANG]**

TARIKH : 18 MAC 2019 (ISNIN)

SOALAN NO. 58

Minta **MENTERI PENGANGKUTAN** menyatakan berapakah jumlah pengguna yang menggunakan Pas Bulanan Pengangkutan Awam dan adakah jumlah tersebut mencapai sasaran yang telah ditetapkan oleh pihak Kementerian.

JAWAPAN

Yang di-Pertua,

1. Sejajar dengan hasrat Kerajaan dalam meringankan kos sara hidup rakyat dan selaras dengan Janji No. 8 dalam Manifesto PRU14 Buku Harapan, inisiatif Pas Bulanan Tanpa Had Perjalanan telah dilancarkan pada 1 Disember 2018 oleh YAB Perdana Menteri Tun Dr Mahathir Mohamad. Di bawah program ini, setiap warganegara Malaysia dapat menikmati semua perkhidmatan bas, BRT dan rel (LRT, MRT, Monorel, tidak termasuk KTM Komuter) yang dikendali oleh Prasarana Malaysia di Lembah Klang tanpa had selama 30 hari dengan melanggani Pas Bulanan Pengangkutan Awam **MY100** dengan bayaran RM100 sahaja. Untuk pengguna bas yang tidak memerlukan perkhidmatan rel, pilihan yang lebih menjimatkan adalah Pas Bulanan **MY50** yang merangkumi semua perkhidmatan bas Prasarana tanpa had di Lembah Klang selama 30 hari. Cara melanggan Pas MY100 dan MY50 adalah melalui fungsi elektronik kad pengenalan MyKad untuk memudahkan rakyat tanpa perlu membeli kad baru.
2. Untuk makluman Dewan, program MY100 dan MY50 dibiayai oleh Kerajaan dengan peruntukan RM240 juta setiap tahun atau RM20 juta setiap bulan, iaitu RM12 juta untuk MY100 dan RM8 juta untuk MY50, masing-masing. Untuk setiap langganan MY100 dengan bayaran RM100, kerajaan membayar kos tambahan (*top-up*) sebanyak RM100 juga kepada Prasarana. Prinsip yang sama terpakai juga untuk program MY50.
3. Sasaran kerajaan adalah supaya lebih daripada 120,000 orang melanggani MY100 setiap bulan. Subsidi kerajaan akan berkurang secara berperingkat apabila jumlah pengguna melepassi tangga 120,000 orang setiap bulan, berdasarkan formula yang ditentukan oleh Kerajaan dan dipersetujui oleh Prasarana.

4. Untuk makluman Dewan, sambutan Pas Bulanan Pengangkutan Awam Tanpa Had di kalangan rakyat adalah sangat menggalakkan. Setakat 15 Mac 2019, jumlah langganan MY100 telah mencecah 238,012 kali terdiri daripada 112,897 orang pelanggan/pengguna yang unik. Jumlah langganan MY50 pula adalah 6,053 kali terdiri daripada 3,539 orang pelanggan/pengguna yang unik. Bilangan pengguna yang aktif menggunakan MY100 dalam tempoh 30 hari yang lepas adalah 130,822 orang. Perincian langganan MY100 dan MY50 adalah seperti berikut:

Bulan / Jenis Program	MY50	MY100
Disember	852	34,501
Januari	1,808	63,549
Februari	1,828	74,733
Mac (setakat 15/3)	1,565	65,229
JUMLAH	6,053	238,012

5. Memandangkan program ini baharu diperkenalkan selama tiga bulan, kerajaan yakin sasaran 120,000 orang pengguna MY100 akan tercapai pada tahun ini. Aktiviti promosi yang lebih giat melalui pelbagai saluran akan dijalankan. Kerajaan juga dalam persediaan memperluaskan pelaksanaan Pas Bulanan Pengangkutan Awam ke bandar-bandar di luar Lembah Kelang agar penggunaan pengangkutan awam di kalangan rakyat dapat bertambah dan bebanan kos sara hidup dapat dikurangkan.

Sekian, terima kasih.

PEMBERITAHUAN PERTANYAAN MESYUARAT PERTAMA,
PENGGAL KEDUA, PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : DATO' SERI ANWAR BIN IBRAHIM
(PORT DICKSON)**

TARIKH : 18 MAC 2019 (ISNIN)

SOALAN:

Minta **MENTERI PERTAHANAN** menyatakan status dan kemajuan siasatan oleh Jawatankuasa Siasatan Tadbir Urus, Perolehan dan Kewangan Kerajaan yang diketuai oleh Tan Sri Ambrin Buang dan menjelaskan kelemahan utama dalam tadbir urus Kerajaan yang membolehkan serta menyebabkan berlakunya ketirisan dan kecuaian.

JAWAPAN

Tuan Yang di-Pertua,

Jawatankuasa Siasatan Tadbir Urus, Perolehan dan Kewangan Kerajaan (JKSTUPKK) sedang menyiasat isu tadbir urus, kepatuhan tatacara perolehan dan kewangan di Kementerian Pertahanan sejak bulan Julai 2018. Jawatankuasa tersebut telah selesai menyiasat 16 kes *land swap* dan satu kes berkaitan *Automated Enforcement System* (AES).

Berdasarkan laporan yang dibentangkan oleh Jawatankuasa tersebut, didapati pelaksanaan projek *land swap* adalah tidak dirancang dengan teliti dan pemilihan syarikat pemaju yang tidak dilaksanakan *due diligence* secara komprehensif. Selain itu, terdapat juga campur tangan politik pihak-pihak tertentu yang menyebabkan sebahagian projek telah melangkaui tempoh kontrak yang dipersetujui. Terdapat juga, projek yang telah disiapkan tetapi kualiti pembinaan yang tidak memuaskan. Ini menjaskan *value for money* kepada kerajaan dan juga keberkesanan kesiapsiagaan pertahanan negara.

Pada masa ini, Jawatankuasa tersebut sedang menjalankan siasatan ke atas perolehan aset-aset dan kelengkapan pertahanan Kementerian Pertahanan.

**MESYUARAT PERTAMA, PENGGAL KEDUA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN
DARIPADA : YB DATO' HENRY SUM AGONG
KAWASAN : LAWAS
TARIKH : 18 MAC 2019 (ISNIN)

SOALAN :

YB DATO' HENRY SUM AGONG minta **MENTERI KERJA RAYA** menyatakan kepastian jajaran jalan Pan Borneo di kawasan Limbang dan Lawas sama ada masih melalui Negara Brunei Darussalam atau jajaran lain/baru dan berapakah jumlah peruntukan yang dikhaskan untuk projek tersebut di Sarawak pada tahun ini, 2019.

JAWAPAN :

Tuan Yang Di-Pertua,

Untuk makluman Ahli Yang Berhormat, Kementerian Kerja Raya (KKR) sedang dalam proses akhir penelitian bagi mengenal pasti jajaran Jalan Perhubungan Sarawak - Sabah (Sarawak - Sabah Link Road) yang tidak melalui Negara Brunei Darussalam. Kajian tersebut turut mengambil kira implikasi kos dan teknikal serta sosio-ekonomi dan guna tanah di kawasan pedalaman di utara negeri Sarawak iaitu melibatkan kawasan Baram, Limbang dan Lawas dan seterusnya menghubungkan ke negeri Sabah (Sindumin dan Long Pasia). Anggaran kos terlibat ialah sebanyak RM 4 bilion melibatkan jarak sekitar 400km. Namun demikian, kajian tersebut juga akan menentukan anggaran kos sebenar dengan mengambil kira tiada pertindihan jajaran dengan agensi kerajaan lain iaitu Kerajaan Negeri Sarawak dan Kementerian Pembangunan Luar Bandar (KPLB).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : DATUK DR. HASAN BIN BAHROM
[TAMPIN]
TARIKH : 18 MAC 2019 (ISNIN)

SOALAN NO. 61

Minta **MENTERI KESIHATAN** menyatakan status kakitangan-kakitangan Kementerian Kesihatan, khususnya pegawai-pegawai farmasi yang kontrak perkhidmatan mereka yang diperbaharui secara tahunan. Adakah mereka dibenarkan untuk berkerja di sektor swasta sekiranya kontrak mereka ditamatkan kerana di dalam klausa tempoh khidmat wajib mereka bersama Jabatan Perkhidmatan Awam adalah selama enam tahun.

JAWAPAN

Yang di-Pertua,

Untuk makluman, Kementerian Kesihatan telah melaksanakan **pendekatan liberalisasi** bagi latihan siswazah dan khidmat wajib bagi perkhidmatan Farmasi, di mana graduan farmasi tidak lagi terikat untuk berkhidmat dengan Kementerian Kesihatan bagi menjalani latihan siswazah atau khidmat wajib. Berdasarkan pendekatan tersebut, graduan farmasi **boleh dibenarkan** untuk memohon pekerjaan dengan sektor swasta bagi maksud memenuhi syarat latihan siswazah dan khidmat wajib tersebut.

Selaras dengan dasar tersebut, mana-mana graduan farmasi yang telah dilantik secara kontrak di Kementerian Kesihatan dan kemudiannya mendapat pekerjaan dengan sektor swasta, graduan berkenaan **boleh dipertimbangkan pelepasan** dari ikatan perjanjian kontrak dengan penaja pengajian dengan syarat graduan tersebut mengemukakan permohonan pelepasan kepada pihak penaja yang berkenaan. Dalam hal ini, pihak Jabatan Perkhidmatan Awam selaku salah satu pihak penaja boleh menimbang perpindahan atau pelepasan kontrak **secara kes demik kes** bagi graduan atau pegawai yang menamatkan kontrak perkhidmatan tetapi masih mempunyai ikatan atau baki kontrak berkhidmat wajib dengan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HASAN BIN ARIFIN
[ROMPIN]**

TARIKH : 18 MAC 2019 (ISNIN)

SOALAN NO. 62

Minta **MENTERI PERTANIAN DAN INDUSTRI ASAS TANI** menyatakan berapa banyakkah pengimportan beras dari luar negara pada tahun 2016, 2017 dan 2018. Berapa peratuskah jumlah ini daripada seluruh pengeluaran beras negara.

JAWAPAN

Tuan Yang di-Pertua,

Jumlah pengimportan beras dari luar negara pada tahun 2016, 2017 dan 2018 adalah seperti berikut:

Tahun	Jumlah Keperluan Negara (metrik tan, mt)	Pengeluaran beras tempatan (metrik tan, mt)	Jumlah Import (metrik tan, mt)	Peratus import berbanding pengeluaran tempatan (%)
2016	2,500,000	1,766,115	747,671	42.3
2017	2,500,000	1,656,302	725,532	43.8
2018	2,500,000	1,766,612	776,127	43.9

Jadual di atas menunjukkan peratus import beras berbanding pengeluaran beras tempatan bagi memenuhi keperluan rakyat Malaysia iaitu 2.5 juta metrik tan setahun.

Sekian, terima kasih.

NO SOALAN : 63

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL

TARIKH : 18 MAC 2019 (ISNIN)

SOALAN NO. 63

Puan Noorita binti Sual [Tenom] minta **MENTERI AIR, TANAH DAN SUMBER ASLI** menyatakan apakah tindakan pihak Kementerian dalam menangani hakisan tebing sungai yang dihadapi oleh penduduk kampung di kawasan Parlimen Tenom hingga menimbulkan kerosakan tanaman dan mengancam keselamatan penduduk.

NO SOALAN: 63

JAWAPAN

Tuan Yang di-Pertua,

Kementerian Air, Tanah dan Sumber Asli (KATS) melalui Jabatan Pengairan dan Saliran (JPS) telah diperuntukkan kos siling projek sebanyak RM50 juta dalam *Rolling Plan Ke-2* (2017), RMKe-11 bagi pelaksanaan Rancangan Tebatan Banjir Sungai Padas, Lembangan Sungai Padas, Tenom. Pelaksanaan projek ini adalah bagi menangani kemusnahan harta benda, tanaman dan ancaman kepada penduduk akibat banjir serta runtuhan tebing di Tenom. Komponen projek merangkumi pembinaan ban banjir sepanjang 3.85km di Sungai Padas untuk mengelakkan limpahan banjir ke kawasan Pekan Tenom termasuk juga membaiki tebing-tebing sungai kawasan yang berhampiran.

Projek tersebut masih dalam proses reka bentuk terperinci dan kerja-kerja fizikal dijangka akan dilaksanakan pada bulan Oktober 2019.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN CHOW KON YEOW
[TANJONG]
TARIKH : 18 MAC 2019 (ISNIN)

SOALAN NO. 65

Y.B. TUAN CHOW KON YEOW [TANJONG] minta **MENTERI KEWANGAN** menyatakan jumlah hutang terkumpul Kerajaan-kerajaan Negeri kepada Pusat sehingga 31 Disember 2018. Berapakah tunggakan pembayaran tahunan yang sepatutnya dibayar oleh setiap pihak-pihak berkaitan.

JAWAPAN

Tuan Yang di-Pertua,

Sehingga 31 Disember 2018, baki belum selesai pinjaman Kerajaan Persekutuan kepada Kerajaan Negeri berjumlah RM17.62 bilion manakala tunggakan pinjaman berjumlah RM4.79 bilion.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WONG TIEN FATT@WONG NYUK FOH
[SANDAKAN]
TARIKH : 18 MAC 2019 (ISNIN)

SOALAN NO. 67

Y.B. TUAN WONG TIEN FATT@WONG NYUK FOH [SANDAKAN] minta **MENTERI KEWANGAN** menyatakan hutang negara setakat ini. Berapa hutang negara telah dikurangkan sejak Kerajaan Pakatan Harapan mengambil alih Putrajaya.

JAWAPAN

Tuan Yang di-Pertua,

1. Secara amnya, paras hutang Kerajaan Persekutuan meningkat disebabkan Kerajaan perlu membiayai defisit bajet tahunan yang mana pinjaman dilaksanakan untuk menampung belanja pembangunan. Bagi tahun 2018, hutang rasmi Kerajaan Persekutuan meningkat daripada RM686.8 bilion atau 50.7% daripada KDNK pada tahun 2017 kepada RM741 bilion atau 51.8% daripada KDNK. Peningkatan sebanyak RM54.2 bilion ini digunakan untuk membiayai defisit tahun 2018. Hutang rasmi ini tidak merangkumi pembayaran hutang oleh Kerajaan Persekutuan sebagai penjamin.
2. Kerajaan akan terus membuat pinjaman baru pada setiap tahun selagi kedudukan kewangan Kerajaan Persekutuan mengalami defisit. Kerajaan Persekutuan membuat pinjaman bagi membiayai semula hutang yang matang dan menampung perbelanjaan pembangunan. Hutang Kerajaan Persekutuan hanya dapat dikurangkan sekiranya kedudukan kewangan Kerajaan Persekutuan mempunyai lebihan (*surplus*) yang mencukupi untuk membiayai hutang dan perbelanjaan pembangunan. Sebagai contoh, sepanjang tempoh 1993 - 1997, Kerajaan berjaya mengurangkan hutang daripada RM95.9 bilion pada 1993 kepada RM89.9 bilion pada 1997, berikutan lebihan fiskal dalam kedudukan kewangan tahunan.
3. Kepatuhan yang tegas terhadap disiplin fiskal serta pengurusan hutang yang baik terus diberikan penekanan bagi memastikan kedudukan fiscal dan makroekonomi terus kukuh serta dapat menampung sebarang krisis.

**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : LISAN

TARIKH : 18.03.19

**DARIPADA : YB TAN SRI NOH BIN HAJI OMAR
[TANJONG KARANG]**

SOALAN

YB TAN SRI NOH BIN HAJI OMAR [TANJONG KARANG] minta **PERDANA MENTERI** menyatakan perkembangan terkini projek ECRL dan mengapa ada desas-desus mengatakan projek ini akan ditangguh atau dibatalkan.

JAWAPAN

Tuan Yang di-Pertua dan Ahli Yang Berhormat,
Kerajaan masih dalam rundingan dengan kontraktor utama China Communications Construction Company (CCCC) bagi mengurangkan kos Projek Laluan Rel Pantai Timur (ECRL); yang bakal menentukan sama ada projek ini akan diteruskan atau sebaliknya.

Pada masa ini, semua kerja-kerja dan perkhidmatan berkaitan projek ECRL masih digantung oleh Malaysia Rail Link Sdn Bhd (MRL), syarikat khusus di bawah milik penuh Menteri Kewangan Diperbadankan semenjak notis penggantungan dikeluarkan pada 3hb Julai 2018.

Sebarang kenyataan atau keputusan berkenaan projek ECRL akan dimaklumkan oleh YAB Perdana Menteri.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' MANSOR OTHMAN
[NIBONG TEBAL]
TARIKH : 18 MAC 2019 (ISNIN)

SOALAN NO. 70

Y.B. DATO' MANSOR OTHMAN [NIBONG TEBAL] minta **MENTERI KEWANGAN** menyatakan kenapa hutang isi rumah rakyat Malaysia didapati meningkat agak ketara sepetimana dilaporkan oleh Jabatan Perangkaan Malaysia 2018, iaitu dari 61% daripada KDNK dalam tahun 2008 kepada 84% (RM 1.17 trilion) pada akhir Jun 2018 dan jelaskan juga perancangan dan langkah-langkah yang dilaksanakan bagi menangani isu ini.

JAWAPAN

Tuan Yang Di-Pertua,

1. Pada akhir Jun 2018, nisbah hutang isi rumah kepada keluaran dalam negeri kasar (KDNK) meningkat kepada 83.3% daripada 63.3% pada tahun 2008. Kenaikan ini adalah disebabkan oleh peningkatan jumlah pinjaman terutamanya bagi tujuan pembelian harta kediaman. Walau bagaimanapun, secara amnya nisbah hutang isi rumah telah menurun dari tahap tertinggi iaitu 88.4% pada 2015.
2. Sejumlah besar daripada hutang isi rumah adalah untuk pengumpulan harta kekayaan seperti membeli harta kediaman (52.6%) dan bukan kediaman (6.9%) serta pelaburan dalam dana simpanan (5.6%). Sementara itu, hutang isi rumah bagi tujuan kegunaan peribadi hanya meliputi 18% daripada jumlah keseluruhan hutang tersebut.

Tuan Yang Di-Pertua,

3. Kerajaan telah mengambil pelbagai langkah serius untuk mengurangkan kadar hutang isi rumah. Keberkesanan langkah-langkah yang telah dilaksanakan secara berperingkat sejak tahun 2010 oleh pihak Kerajaan menerusi Bank Negara Malaysia dapat dilihat melalui penurunan kadar hutang isi rumah berbanding tahun 2015 yang telah mencatatkan kadar hutang yang tertinggi. Langkah-langkah tersebut dilaksanakan berteraskan dua prinsip iaitu:
 1. memupuk amalan kredit yang bertanggungjawab dalam kalangan individu dan institusi kewangan, dan
 2. mengelakkan isi rumah daripada berhutang secara berlebihan.
4. Walaupun tahap keberhutangan isi rumah kian menurun, ia masih kekal tinggi berbanding negara serantau. Oleh itu, Kerajaan akan terus berusaha untuk meningkatkan kesedaran dan kemahiran pengurusan kewangan dalam kalangan masyarakat. Antaranya ialah:

NO SOALAN : 70

1. penubuhan Agensi Kaunseling dan Pengurusan Kredit (AKPK) bertujuan membantu individu yang menghadapi masalah menguruskan kewangan dan beban hutang melalui khidmat nasihat dan penyusunan semula hutang. Dari tahun 2007 hingga Jun 2018, lebih daripada 230,000 peminjam telah menyertai Program Pengurusan Hutang; dan
2. pelancaran Program Pengurusan Wang Ringgit Anda (POWER!) pada tahun 2011 bertujuan untuk meningkatkan keupayaan kewangan dalam kalangan pengguna kewangan di Malaysia, terutamanya generasi muda dan mereka yang baru bekerja. Sejak pelancarannya sehingga Jun 2018, lebih daripada 204,000 pengguna telah menghadiri program POWER!.

5. Bank Negara Malaysia sedang bekerjasama dengan Kementerian Perdagangan Dalam Negeri, Koperasi dan Kepenggunaan (KPDNKK) dan Kementerian Perumahan dan Kerajaan Tempatan (KPKT) untuk menggubal Akta Kredit Pengguna (AKP) yang akan memperkuuh rangka kerja pengawalseliaan aktiviti kredit pengguna di Malaysia.

1. menggalakkan budaya pemberian dan peminjaman kredit yang berhemat dan bertanggungjawab dalam kalangan pemberi kredit dan pengguna bagi memastikan kesejahteraan kewangan isi rumah; dan
2. keperluan untuk menjalankan penilaian kemampuan peminjam oleh pemberi kredit sebelum memberikan pinjaman kepada pengguna bagi mengurangkan risiko pengambilan kredit melebihi tahap kemampuan untuk membayar balik dan menanggung beban hutang yang tinggi.

6. Pada tahun 2016, beberapa agensi Kerajaan berserta bank telah membentuk Rangkaian Pendidikan Kewangan (*Financial Education Network, FEN*) untuk menghasilkan suatu pendekatan standard bagi pendidikan kewangan di peringkat kebangsaan. Pendekatan ini merangkumi pelbagai aspek pengurusan kewangan dan juga demografi. FEN sedang merangka Strategi Celik Kewangan Kebangsaan berlandaskan teras berikut:

1. memupuk nilai-nilai kewangan yang bertanggungjawab mulai di peringkat sekolah;

2. menggalakkan amalan gaya hidup yang sesuai dengan kedudukan kewangan;
3. menyemai sikap dan tabiat kewangan yang positif dalam kalangan kumpulan sasaran; menyokong perancangan kewangan jangka panjang dan perancangan persaraan; dan memperkasa setiap individu dalam pengurusan risiko dan pulangan.

Tuan Yang Di-Pertua,

7. Kerajaan akan terus mengambil langkah proaktif dalam menangani peningkatan hutang isi rumah bagi memastikan kesejahteraan rakyat terjamin.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI IKMAL HISHAM BIN
ABDUL AZIZ [TANAH MERAH]**

TARIKH : 18 MAC 2019 (ISNIN)

SOALAN NO. 71

Minta **MENTERI PENGANGKUTAN** menyatakan statistik jumlah kemalangan maut yang berlaku sepanjang Ops Selamat dijalankan dan sejauh manakah ia mampu mengurangkan kadar kemalangan.

JAWAPAN

Yang di-Pertua,

1. Untuk makluman Yang Berhormat, setiap tahun Jabatan Keselamatan Jalan Raya (JKJR), Kementerian Pengangkutan telah dipertanggungjawabkan untuk memantau dan menyelaras pelaksanaan Ops Bersepadu dan Kempen Keselamatan Jalan Raya bersempena dengan perayaan Tahun Baru Cina dan perayaan Hari Raya Aidilfitri Peringkat Kebangsaan. Pelaksanaan Ops bersepadu dan kempen ini melibatkan pelbagai kementerian, jabatan kerajaan, pertubuhan-pertubuhan bukan kerajaan dan juga pihak swasta.
2. Objektif utama pelaksanaan kedua-dua program ini adalah untuk meningkatkan kesedaran orang ramai bagi mematuhi peraturan-peraturan jalan raya seterusnya mengurangkan kadar kemalangan jalan raya di musim perayaan.
3. Jumlah kes kemalangan pada musim perayaan Tahun Baru Cina 2019 melalui Ops Selamat adalah sebanyak 20,829 berbanding dengan Ops Selamat pada Tahun Baru Cina 2018 seramai 21,041 kes.
4. Statistik menunjukkan terdapat sedikit penurunan kejadian kemalangan maut pada Ops Selamat 2019 berbanding 2018 iaitu dari 208 kes kepada 197 kes dengan kadar penurunan sebanyak 11 kes iaitu bersamaan 5.3%.
5. Bilangan nyawa yang terkorban pada sepanjang Ops Selamat Tahun Baru Cina 2019 adalah sebanyak 216 orang. Walaupun angka ini menurun berbanding 226 kematian dalam tempoh ops yang sama pada tahun 2018, ia masih menggambarkan keadaan keselamatan jalan raya yang kurang memuaskan. Kementerian Pengangkutan akan terus mengambil langkah yang sepatutnya dan bekerjasama dengan agensi-agensi dan kementerian-kementerian lain termasuk Lembaga Lebuhraya Malaysia, PDRM, Kementerian Kesihatan dan syarikat-syarikat konsesi lebuhraya untuk mencari formula terbaik dalam usaha mengurangkan kemalangan jalan raya.

6. Berdasarkan statistik jumlah kemalangan maut dan jumlah kematian akibat jalan raya semasa OPS Selamat Perayaan Aidilfitri pada tahun 2017 dan 2018, ia telah menunjukkan penurunan kes kemalangan maut sebanyak 4 kes dan penurunan jumlah kematian sebanyak 9 kes.

7. Kementerian Pengangkutan melalui Jabatan Keselamatan Jalan Raya juga giat menjalankan advokasi keselamatan jalan raya yang melibatkan syarikat-syarikat swasta bersama-sama jabatan kerajaan yang lain untuk melaksanakan program-program untuk manfaat pengguna jalan raya sepanjang OPS Selamat dijalankan. Antara jabatan kerajaan dan syarikat-syarikat yang terlibat adalah seperti berikut:

- i. Polis Diraja Malaysia (PDRM);
- ii. Jabatan Pengangkutan Jalan Malaysia (JPJ);
- iii. Jabatan Kerja Raya (JKR);
- iv. Institut Penyelidikan Keselamatan Jalan Raya Malaysia (MIROS);
- v. Kementerian Kesihatan Malaysia melalui Jabatan Kecemasan dan Trauma;
- vi. Jabatan Bomba dan Penyelamat (JBPM);
- vii. Angkatan Pertahanan Awam;
- viii. PETRONAS Dagangan Berhad (PETRONAS);
- ix. PUSPAKOM Sdn Bhd (PUSPAKOM);
- x. Lembaga Lebuhraya Malaysia (LLM);
- xi. Shell Malaysia (SHELL);
- xii. Petron Malaysia (PETRON); dan
- xiii. PLUS Malaysia Berhad (PLUS);

8. Data statistik perbandingan jumlah kemalangan, kemalangan maut dan kematian bagi operasi Ops Selamat Tahun Baru Cina yang telah dijalankan pada tahun 2018 dan 2019 adalah seperti di bawah.

PERKARA	OPS SELAMAT 12/2018	OPS SELAMAT 14/2019	PERBANDINGAN	
			%	BEZA
Jumlah Kemalangan	21,04 1	20,829	-1	-212
Jumlah Kemalangan Maut	208	197	5.3	-11
Jumlah Kematian	226	216	4.4	-10

(Sumber: JSPT Bukit Aman, PDRM)

9. Data statistik perbandingan jumlah kemalangan, kemalangan maut dan kematian bagi operasi Ops Selamat Perayaan Aidilfitri yang telah dijalankan pada tahun 2017 dan 2018 adalah seperti di bawah.

PERKARA	OPS SELAMAT 11/2017	OPS SELAMAT 13/2018	PERBANDINGAN	
			%	BEZA
Jumlah Kemalangan	22,402	22,411	0.04	9
Jumlah Kemalangan Maut	239	235	-1.7	-4
Jumlah Kematian	257	248	-3.5	-9

(Sumber: JSPT Bukit Aman, PDRM)

**MESYUARAT PERTAMA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN SABRI BIN AZIT
[JERAI]**

TARIKH : 18.3.2019 (ISNIN)

SOALAN : 72

minta **MENTERI PEMBANGUNAN LUAR BANDAR** menyatakan apakah projek utama di Pulau Bunting dalam daerah Yan setelah jalan persekutuan telah pun siap dibina ke pulau tersebut.

JAWAPAN

Tuan Yang di-Pertua,

Untuk makluman Yang Berhormat, pada masa kini tiada sebarang projek pembangunan di bawah Kementerian ini sedang dilaksanakan di Pulau Bunting, Yan. Walau bagaimanapun, sekiranya terdapat sebarang keperluan bagi projek pembangunan luar bandar di kawasan tersebut, cadangan projek boleh dikemukakan kepada pihak Kementerian melalui Unit Perancang Ekonomi Negeri (UPEN) untuk pertimbangan selanjutnya.

Untuk makluman Yang Berhormat juga, kelulusan pelaksanaan projek adalah bergantung kepada kedudukan semasa peruntukan Kerajaan dan Senarai Keutamaan Kerajaan Negeri.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 18 MAC 2019 (ISNIN)

SOALAN NO. 73

Minta **MENTERI KESIHATAN** menyatakan apakah rancangan Kementerian untuk menaik taraf klinik kesihatan. Pada suatu ketika, terdapat klinik kesihatan di sesebuah kawasan dengan penduduknya seramai 2000 orang. Pada masa kini, di sesetengah kawasan yang penduduknya mencecah seramai 20,000 orang, klinik kesihatannya masih mempunyai kemudahan yang sama. Adakah Kementerian dapat menambah kemudahan yang selaras dengan hospital Kerajaan.

JAWAPAN

Yang di-Pertua,

Kementerian Kesihatan memang mempunyai rancangan untuk mempertingkatkan perkhidmatan di klinik kesihatan (KK) seluruh negara agar selaras dengan kedatangan pesakit yang semakin meningkat. Antara pendekatan yang telah diambil oleh kerajaan bagi mempertingkatkan perkhidmatan di KK adalah dengan menaiktaraf KK sedia ada atau membina KK baru untuk menggantikan KK sedia ada. Pada masa lalu, kerajaan menyediakan klinik dan perkhidmatan kebidanan di rumah bagi setiap 2000 penduduk berkonsepkan *3 tier system* (dengan izin), namun kini kerajaan membina fasiliti kesihatan yang lebih baik iaitu KK jenis 7 menggantikan Klinik Desa yang tidak lagi dibina. Kemudahan Kesihatan sedia ada memang ditambah atau fasiliti kesihatan dinaiktaraf atau atau pembinaan klinik baru. Untuk makluman, ciri ciri utama yang digunakan untuk menentukan sesebuah fasiliti kesihatan dinaiktaraf berdasarkan keutamaan seperti berikut:-

- i. Tahap keselamatan yang mendesak;
- ii. Bangunan dan peralatan lama serta using;
- iii. Peningkatan beban penyakit;
- iv. Peningkatan penduduk dan keperluan meningkatkan akses kepada perkhidmatan penjagaan kesihatan; dan
- v. Naiktaraf akibat pertambahan skop perkhidmatan kesihatan di fasiliti kesihatan tersebut.

Keperluan membina atau menaiktaraf kemudahan kesihatan sentiasa diteliti dan dikajisemula dari semasa ke semasa dan juga tertakluk kepada keadaan kewangan kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD TARMIZI BIN SULAIMAN
[SIK]**

TARIKH : 18 MAC 2019 (ISNIN)

SOALAN NO. 74

Minta **MENTERI HAL EHWAL EKONOMI** menyatakan statistik pemberian dana kepada pekebun getah yang telah menerima Bantuan Musim Tengkujuh (BMT) sehingga kini.

JAWAPAN

Yang di-Pertua,

Untuk makluman Yang Berhormat, Kerajaan telah menyediakan peruntukan sebanyak RM164,783,400 bagi tujuan pelaksanaan Bantuan Musim Tengkujuh (BMT) tahun 2018 kepada 274,639 orang pekebun kecil getah yang berdaftar dengan RISDA dan memenuhi syarat-syarat kelayakan penerima BMT.

Sekian, terima kasih.

Kementerian Hal Ehwal Ekonomi
18 Mac 2019

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KE-EMPAT BELAS**

PERTANYAAN : JAWAB LISAN

**DARIPADA : TUAN LARRY SOON @ LARRY SNG WEI
SHIEN [JULAU]**

TARIKH : 18 MAC 2019 (ISNIN)

SOALAN NO. 75

Minta **MENTERI PENGANGKUTAN** menyatakan perancangan untuk membuka lapangan-lapangan terbang di Sarawak untuk menerima penerbangan dari luar negara bagi memudahkan kedatangan pelancong asing ke negeri itu.

JAWAPAN

Yang Dipertua,

1. Pada masa ini, Malaysia telahpun mempunyai 6 buah lapangan terbang antarabangsa iaitu di KLIA, Kota Kinabalu, Kuching, Pulau Pinang, Langkawi dan Johor Bahru. Lapangan-lapangan terbang lain adalah berperanan sebagai *feeder* kepada lapangan-lapangan terbang antarabangsa ini.

2. Sarawak mempunyai sebuah lapangan terbang antarabangsa (Kuching) dan 5 lapangan terbang domestik (Sibu, Miri, Bintulu, Limbang dan Mulu) serta 12 buah *Short Takeoff and Landing Airports* (STOLports)

3. Walaupun tidak berstatus antarabangsa, lapangan-lapangan terbang domestik di Sarawak mampu mengendalikan penerbangan antarabangsa berjadual dan tidak berjadual dengan penyediaan kemudahan-kemudahan yang menyokong kepada penerimaan penerbangan antarabangsa tersebut seperti kemudahan CIQ. Kerajaan dari semasa ke semasa sentiasa memastikan kemudahan di semua lapangan terbang di Sarawak mencukupi melalui projek-projek pembangunan lapangan terbang yang ada.

4. Untuk makluman Yang Berhormat, Kerajaan sentiasa menggalakkan mana-mana syarikat penerbangan negara atau asing untuk mewujudkan perkhidmatan penerbangan terus dari mana-mana negara ke/dari Sarawak dengan mengambil langkah-langkah seperti berikut:

- i. rundingan udara dua hala dengan negara-negara asing pada setiap tahun bagi mewujudkan / meningkatkan hak-hak trafik penerbangan di antara Malaysia dan negara-negara tersebut;
- ii. memasukkan lapangan-lapangan terbang Sarawak sebagai salah satu destinasi yang diliberalisasikan di bawah *ASEAN Multilateral Agreement on the Full Liberalisation of Passenger Services* (MAFLPAS) dan *Air Transport Agreement Between The*

Governments Of The Member States Of The Association Of Southeast Asian Nations And The Government Of The People's Republic Of China (AC-ATA). Di bawah Perjanjian yang telah ditandatangani dan diratifikasi oleh Malaysia ini, syarikat-syarikat penerbangan negara-negara ASEAN dibenarkan untuk mengadakan penerbangan di antara mana-mana destinasi ASEAN dan Republik Rakyat China (RRC), tanpa had kekerapan, kapasiti dan jenis pesawat; dan

iii. memasukkan destinasi-destinasi seperti Miri, Sibu dan Bintulu sebagai salah satu daripada destinasi yang diliberalisasikan di bawah kerjasama Brunei Indonesia Malaysia Philippines East ASEAN Growth Area (BIMP-EAGA) Memorandum of Understanding (MoU) on Expansion of Air Linkages.

Di bawah Perjanjian yang telah ditandatangani dan diratifikasi oleh Malaysia ini, syarikat-syarikat penerbangan negara-negara BIMP-EAGA dibenarkan untuk mengadakan penerbangan di antara mana-mana destinasi BIMP-EAGA, tanpa had kekerapan, kapasiti dan jenis pesawat;

iv. menawarkan pelbagai insentif kepada syarikat-syarikat penerbangan daripada luar negara yang beroperasi ke mana-mana lapangan terbang negara termasuk ke Sarawak oleh Malaysia Airports Holding Berhad (MAHB) menerusi *Airlines Incentives Programme*.

5. Dalam hubungan ini, sebarang rancangan untuk mewujudkan perkhidmatan penerbangan antarabangsa secara terus dari luar negara ke bandar-bandar utama di Sarawak adalah merupakan perancangan yang ditentukan oleh syarikat-syarikat penerbangan di Malaysia dan asing berdasarkan kepada *commercial viability* sesuatu laluan.

6. Selain daripada langkah-langkah yang telah dilaksanakan seperti di atas, terdapat juga keperluan untuk meningkatkan daya tarikan dan promosi produk-produk pelancongan dalam negara sebagai satu usaha berterusan bagi menggalakkan lagi perkhidmatan penerbangan antarabangsa dari pelbagai laluan ke Sarawak.

PEMBERITAHUAN PERTANYAAN
MESYUARAT PERTAMA, PENGGAL KEDUA,
PARLIMEN KEEMPAT BELAS,
DEWAN RAKYAT

PERTANYAAN : LISAN

**DARIPADA : DATO' SRI DR. HAJI WAN JUNAIDI
BIN TUANKU JAAFAR [SANTUBONG]**

TARIKH : 18 MAC 2019

SOALAN : 76

Dato' Sri Dr. Haji Wan Junaidi bin Tuanku Jaafar [Santubong] minta **PERDANA MENTERI** menyatakan semenjak Kerajaan baru mengambil alih, berapa buah jabatan dan agensi Kerajaan telah dibubarkan dan berapa jumlah pegawai, pekerja dan anggota telah ditamatkan perkhidmatan. Berapakah wang Kerajaan boleh diselamatkan. Adakah Jabatan atau agensi baru ditubuh dan berapa jumlah anggota dan berapa kos pengendaliannya.

**JAWAPAN: YB DATUK WIRA DR. MD FARID BIN MD RAFIK
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, sejajar dengan dasar pengoptimuman sumber manusia bagi mengawal perbelanjaan Kerajaan, sebanyak empat (4) agensi telah dibubarkan iaitu Suruhanjaya Pengangkutan Awam Darat (SPAD), Jabatan Hal Ehwal Khas (JASA), Jabatan Latihan Khidmat Negara dan Biro Tatanegara (BTN). Pembubaran empat (4) agensi tersebut melibatkan penjimatan kepada Kerajaan sebanyak RM 100 juta setahun meliputi antara lain pembayaran

emolumen dan kos operasi. Walau bagaimanapun, pegawai dan anggota di agensi yang dibubarkan tersebut tidak ditamatkan perkhidmatan, sebaliknya ditempatkan ke agensi lain yang bersesuaian melainkan bagi pegawai yang meletak jawatan secara sukarela dan tidak bersetuju dengan penempatan baharu.

Berkenaan dengan jumlah pegawai Kerajaan yang ditamatkan perkhidmatan, tiada pegawai Kerajaan lantikan tetap yang diberhentikan. Walau bagaimanapun, sejak Jun 2018, hanya 1,691 (11.3%) pegawai daripada sejumlah pegawai lantikan kontrak seramai 14,869 orang telah ditamatkan kontrak kerana projek atau tugas yang dilaksanakan oleh pegawai berkenaan telah tamat dan tidak lagi diteruskan oleh agensi berkenaan, manakala 13,178 (88.7%) akan terus kekal berkhidmat.

Bagi memastikan kelangsungan peranan Kementerian Pengangkutan dalam merancang pembangunan sektor pengangkutan awam darat negara dimantapkan, satu (1) agensi baharu telah ditubuhkan iaitu Agensi Pengangkutan Awam Darat (APAD) dengan 361 perjawatan, lebih rendah dengan SPAD yang mempunyai 802 perjawatan. Kos pengendalian APAD yang meliputi emolumen dan pengurusan untuk tahun 2019 adalah berjumlah sebanyak RM 44 juta.

Kajian Rasionalisasi Program Pemetaan Kementerian yang dilaksanakan oleh Jabatan Perkhidmatan Awam (JPA) akan mengkaji secara terperinci bagi memastikan tidak berlaku pertindanan fungsi antara agensi dan Kementerian yang mengakibatkan pembaziran sumber kewangan Kerajaan. Kajian ini akan dapat menentukan agensi-agensi yang akan dibubarkan, dipindahkan atau dikekalkan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW

TARIKH : 18 MAC 2019 (ISNIN)

SOALAN NO. 77

Tuan Chow Kon Yeow [Tanjong] minta **MENTERI AIR, TANAH DAN SUMBER ASLI** menyatakan adakah perbincangan akan diadakan dengan Kementerian Pertanian Industri Asas Tani berhubung kadar pelepasan air mentah dari Empangan Muda dan Empangan Beris sebagai langkah memastikan takungan air mentah adalah mencukupi dalam menghadapi musim kemarau yang dijangka sehingga Mei 2019. Jika tidak, apakah langkah yang akan diambil merujuk kepada fenomena El Nino pada tahun 2016.

JAWAPAN

Tuan Yang di-Pertua,

Mesyuarat Penyelarasan dan Penetapan Jadual Bekalan Air di Lembangan Sungai Muda Bagi Musim 1/2019 bagi membincangkan agihan sumber air di Lembangan Sungai Muda telah diadakan pada 26 Februari 2019. Mesyuarat ini telah dihadiri oleh pegawai daripada Pejabat Lembangan Sungai Muda (PLSM), Jabatan Pengairan Dan Saliran (JPS) (iaitu bagi pihak Kementerian Air, Tanah dan Sumber Asli- KATS) dan *Integrated Agriculture Development Area* (IADA) Pulau Pinang (iaitu bagi pihak Kementerian Pertanian Industri Asas Tani). Agenda perbincangan adalah melibatkan perkara-perkara pengemaskinian *Standard of procedure* (SOP) Operasi Kemarau yang sedia ada termasuklah pengagihan sumber air dan penjadualan semula tanaman padi.

Dalam aspek memastikan kecukupan sumber air di masa akan datang, KATS melalui JPS telah membangunkan satu sistem pengurusan sumber air yang bersepadu iaitu dinamakan *National Water Balance Management System* Sungai Muda (NAWABS). Objektif projek NAWABS adalah menambahbaik pengurusan sumber air dalam mengoptimumkan penggunaan dan agihan sumber air serta memampangkan kolaborasi dalam tadbir urus pembangunan sumber air. Projek NAWABS yang melibatkan Lembangan Sungai Muda kini telahpun 80% siap.

Pihak MADA bertanggungjawab menyelia tiga (3) buah empangan iaitu Empangan Muda, Pedu dan Ahning. Empangan Muda dan Pedu merupakan

takungan utama bagi tujuan pengairan aktiviti penanaman padi dua (2) kali setahun dalam Kawasan Muda dan juga sumber bekalan air domestik/industri bagi kawasan Kedah Utara, Pulau Langkawi dan sebahagian Negeri Perlis. Pelepasan air dibuat melalui Empangan Pedu bagi tujuan tersebut.

Pelepasan air mentah oleh Empangan Muda hanya dibuat sekiranya terdapat permohonan daripada kerajaan negeri sepetimana pelepasan sebanyak 33mm³ bagi menangani kekurangan air dalam lembangan Sungai Muda pada bulan April dan Mei 2016 semasa fenomena el-nino. Penyelarasan dari masa ke semasa akan dibuat bersama Pejabat Pengurusan Lembangan Sungai Muda di bawah Jabatan Pengairan dan Saliran (JPS) bagi memastikan paras air Sungai Muda mencukupi. Pada kebiasaananya, kekurangan air di Sungai Muda akan ditampung oleh pelepasan air daripada Empangan Beris terlebih dahulu sebelum Empangan Muda. Pihak MADA sentiasa memantau tahap takungan air di kesemua empangan bagi memastikan tindakan proaktif dan dapat dilaksanakan dalam menangani sebarang kemungkinan.

Sekian, terima kasih.